

# DIBUULULA DYÀ

## YESÙ KILISTÒ



Twasàkidila, wa manza tètè, Mwanèètù Neville.

Nudi mwà kusòmbaayi.

<sup>2</sup> Ngeela meeji ne bàakamba musangu kampànda, ne: “Mvwa ne disànkà pààkangambilabò ne: “Tuye mu nzùbu wa Mukalenge.””

<sup>3</sup> Mpindyewu, nwatùfwilaayikù luse mutùdi katùyi ne myaba, anyi myaba yà disòmba, bwà bwònsò bàdi mwab’ewu aba, nènku pàmwàpa nebàvule mu lumingu lùlwalwà elu, bantu bààlwà, pùumvwàbò bwà masangisha aa.

<sup>4</sup> Kàdi kabingila kàà cikondo cyà pabwàci eci kàvwa bwà twamòna mwà . . . Nyumà Mwìmpè uvwa mutèèke didimwija dyà ditwishilbwa edi pa mwoyi wànyì, ne: “Bivwa bikèngela bwà Èkèleeziyà mu ditùkù edi kwikalaye ne Mukenji ewu.” Bwalu, ndi ngiitabuuja ne m’Mikenji yà mitàmbe kwikala yà pabwàyì yà Bible, bwalu yidi yibuulula Kilistò mu Èkèleeziyà Wendè pa dîbà edi.

<sup>5</sup> Niènku, muntu kèna mwà kwikala ne diitabuuja anyi kumanya cidìye wenza, anyi kuyaayàye to, ànu yèyè mwikale ne cikampànda, cintu kampànda cyà kushindikilayepu meeji èndè ne diitabuuja. Ki bwà cinyi, pàikalà Mufùndu mutùbuulwile Kilistò mu matùkù à ndekeelu aa, ne ngiikàdilù wa cikondo, mbifwànyine kutwenzela bimpè bwà—bwà kuCikenketa ne kujandula ne tudi penyì.

<sup>6</sup> Mpindyewu, tudi—tudi tuumva bibi be mùdi èkèleeziyà wetù kàyì mutàmbe bunène to, dîngà ditùkù tudi tutèkemena bwà kupeta wa munène.

<sup>7</sup> Nènku matùkù ànaayi a ndekeelu aa, nangàngà, a dilonga dyà cyòci eci pa citùpà cyà maalu malonda cyà—cyà Mukàndà wà Bwàkabuulwibwà, Ndi mukapone pa bintu bîmvwà nciyi mwà kwela meeji ne bikaatukù byenzeke bulelèlà to. Nènku mbimfikishe too ne—ne ku dyumvwa ne, paanyimà pàà *Bikondo Mwandamutekète byà Èkèleeziyà* ebi, mèmè mubijikije, Ndi njinga kwikala ne mulongolongo wa masangisha à mùshindù awu bwà kutwala “Èkèleeziyà mu—mulelèlà ne èkèleeziyà wa mashimi,” yònsò pàmwè, ànu mu maalu malonda ne mu Mifùndù. Byenze bu musangu kampànda wùntù ndwangana, mu diyiiisha kampànda, bwà kwangata “Mvinyò mulelèlà ne mvinyò wa mashimi,” yidi yisanganyilbwa mu Bible. Nènku tudi . . .

<sup>8</sup> Netwikale mwà kuteeta bwà kupeta ndambù wa nkwasà, pândi ngeela meeji bwà mùshindù wà bantu kusòmbabù apa. Nènku netùpete, netùteete bwà kupeta, ndambù mukwàbò wa nkwasà, bwà kuteeta kuuja bibambalu byà paanyimà ebi, ne pambelu, ne ndambù mukwàbò eku ne eku, bwà twamòna mwà kusòmbeshaku ndambù mukwàbò wa bantu mu masangisha aa.

<sup>9</sup> Mpindyewu, pa bwalu ebu, ndi muswè kulòmba muntu ne muntu wa kunùdi udi maalu aa makùngàme bulelèlè, mmufwànyine—mmufwànine kulwa díbà dyònsò ditwikalà mwà—mwà kuByùmvwija. Nènku ncyèna mufwànyineku kubanga to, anyi mwva ngeela meeji mèmè mwine ne... [Katùpà kàà mukàbà wà mèyi munda mutupu—Muf.] ... kubanga bwà... [Katùpà kàà mukàbà wà mèyi munda mutupu.] ... Mukàndà munène wà Bwàkabuulwibwà ewu wà... [Katùpà kàà mukàbà wà mèyi munda mutupu.] ... Bikondo Mwandamutekète byà Èkèleeziyà. Kàdi ndi ngeeyemena Nzambì ne mwanyì mwònsò, bwà—bwà kucimbuulwila pândi mfikakù.

<sup>10</sup> Bwalu bulonda bwà mu bufùki ebu, bwikale bwà... bwangacila kùdi bafùndi bàà maalu malonda bàà batàmbe kwikala bàà pabwàbù bándiku mumanye. Ndi mwadije mu bìrò byànyì mwàmwa, ànu mpindyewu ewu, mèyi a nsèka matwè ku ataanu anyì àsambòmbò, *Baabùlona Yibidi* wà Hislop, *Mukàndà Wà Bafwile Diitabuujà* wà Foxe, ne mikwàbò mikàndà minène; bu mùdi Nsangilu wa Kumpàla kwà Nicée, mikàndà mitwè ku yinaayi pa bwalu abu, mukàndà wònsò ne mabeji àmba kutwa ku nkamà yinaayi. Nènku mwaba awu Nsangilu wa Nicée, ne maalu malonda ónsò atùdi pèètù mwà kupeta awu. Bwalu, paanyimà pàà cyòci eci, kwangacila ku mukàbà wà mèyi, netùfunde dyela dyà nsèke pa Bikondo Mwandamutekète byà Èkèleeziyà, bwà kutuma pa buloba bujima, mutùdi mwà kukòkeshila pèètù amu, bwalu tudi mu matùkù à ndekeelu. Tukaadi ku cikondo cyà nshìikidilu.

<sup>11</sup> Kabuvwaku bwanji kungiimana ku mwoyi bikolè mùshindù ewu to ànu ku ma—masungulangana à ndekeelu aa, ne pashìishe mèmè kumòna mwaba utùvwà tusanganyibwa. Pashìishe ke Nyumà Mwîmpè kubanga kunsokolwela, bwà—bwà kudimwija bantu, ne kuteeka cyòci eci. Nènku ncyèna mwà kucyènza mu—mu èkèleeziyà bu nùnkù, mu mùshindù mukumbane to. Nènku díbà adi mèmè musòmba paanshi ne kudítwa ànu mu difùndà dyà mukàndà... Ndi ndyùmvwà ne bu mèmè mwà kufika ku cyambilu, ne disonsodiibwa dyà Nyumà Mwîmpè munkaci mwà beena Kilistò adi kulwadì pambidi pàanyì, bwà kunkwàcishakù, díbà adi ndi mufwànyine kutàmba kukumbana bwà kufùnda mukàndà awu pa díbà adi, paanyimà pàà mèmè mumane kubyàngàcila pa mukàbà wà mèyi, bwalu kwàka tudi bafwànyine kupeta disonsodiibwa dyàbi. Mikàndà, mu bushùwà bwà bwalu, neyìlongolodiibweku ndambù mu

mùshindù kampànda, bwalu, apa, tudi twamba bintu bitùdi katùyi mwà kufùnda mu mukànda to. Ne pashiishe tudi... Ne tudi tupicisha dîbà dipitepите búngi mu dyambulula bintu twètù biine, anyi ki muntù ngenza's. Ne pashiishe, mu mukànda, nebilongolodiiwbè byònsò. Kàdi netùteetè bwà kubiteeka byònsò, ne mwètù pèètù mwònsò amu, pa mikàbà yà mèyi.

<sup>12</sup> Mpindyewu, mikàbà yà mèyi, dilòòlò dyònsò, maalu mafùnda à kubala ne bikwàbò, nsongàalùme ayi neyìkale naabi pambelu pàà nzùbu pàapa.

<sup>13</sup> Mpindyewu, ndi mwa kwikala ncìyi ne mùshindù dilòòlò dyònsò to, bu mutwängàci twètù biine dipangadika bwà kuteeta bwà butùmbi bwà Nzambi, bwà—bwà kutwàla Mikenji mwandamutekète yà èkèleeziyà eyi, anyi Bikondo Mwandamutekète byà Èkèleeziya, mu malòòlò mwandamutekète; kwangata dilòòlò dyònsò, cikondo cìmwè. Bu mùdi, mu dimwè dilòòlò, Efèso; mu dibiidi dilòòlò, Seemùnà; mu dísààtù dilòòlò, Pèegàmo; mu dînàayi dilòòlò, Twatilà; mu dítàànù dilòòlò, Saadi; ne mu diisambòmbò dilòòlò, Filàdelèfiyà; ne mu dyàlumingu mu dindà ne mu dyàlumingu dilòòlò, cyà Laòdikiyà, cikondo cyà èkèleeziyà citùdi ne mwoyi eci. Mfili maalu malonda à èkèleeziyà wa ku cibangidilu, ne—ne bafundi ne balongi bàà maalu malonda, ne banjelo bàà cikondo aci, ne—ne mikenji, ne lwendu lwà èkèleeziyà, mudiye mulwè too ne ku cikondo eci.

<sup>14</sup> Nènku bìdi bikemesha bwà kumòna mùshindù ùdi bwalu ne bwalu budyanjila kwamba bwònsò bwà Mufùndu awu bünwangana menemene ne maalu malonda, ànu menemene, ku meeji a cyòci aci. Civwa mene cinkèmeshe bikolè be, mu mùshindù wà ne, makèlèlèlè awu, mvwa mubale too ne pàmvwà ngumvwa byenze bu ne mèsù àànyi avwa mùle àmba kutaayika. Kì mèmè kupatuka e kwambila mukàjàànyi ne: “Kacya ncitu mwanji kwelaku meeji ne bìdi mwà kwikala mùshindù awu to.” Nwamònu anyi? Mùshindù mwine ùvwàbi bwalu bunène's!

<sup>15</sup> Nènku mpindyewu, misangu mikwàbò, ndi mwà kwikala ncìyi mufwànyine kucijikija dilòòlò dimwèpelè to, èkèleeziyà, mukenji wà èkèleeziyà. Nènku mèmè ncìyi mwà kucijikija, dilòòlò to, dîbà adi nèncijikije pààcyabu mu dindà dyàlonda pa dîbà dikumi jaajaaja. Nebàcìmanyishe dilòòlò dyònsò, kùdi aba bàdi baswè kulwa bwà kutèeleja citùpa cikwàbò aci, bwalu tuyààya, tuteeta, bwà kubikwàta pa mukàbà wà mèyi. Nèngenzè masangisha pashiishe kuumukila pa dîbà dikumi jaajaaja, mu dindà, too ne mu nkànkala, mundaamuunya, bwà kuteeta kuwutwala, citùpa cikwàbò cyà mukenji aci, bwalu bàdi mwà kuwùkwàta pa mukàbà wà mèyi. Kabiyi. . .

<sup>16</sup> Tudi bamanyishe ne kakwàkwikala masangisha à dyondopa to, bwalu tudi tuteeta kushàala mu cipaapu cyà cipròfetà cyà mu

Bible. Dîbà adi, tudi benze disangisha dyà dyondopa ànu àbìdì àdì panshì aa mwab'ewu. Pashiishe paanyimà pàà masangisha aa mamane kujika, dîbà adi netwikale ne masangisha à dyondopa paanyimà mwaba ewu.

<sup>17</sup> Kàdi mpindyewu ndi—ndi muswè kutòokeshà eci menemene, bwà muntu yònsò wàmòna mwà kuvùluka, ne mpindyewu, mu mwab'ewu, bìdì mwà kwenzeka ne binutape ne binùhulùmune panshì, ne bitùpèeshe twètù bònsò dinyùkishiibwa dinène. Kàdi mémè ndi mwambule bujitu, kabiyi bwà—bwà cingà cintu to ànu kuyiisha kwà Dîyì. Aci, s' ki kwajiki. Ànu—ànu kacya ngaakwàta ku Dîyì. Nènku misangu yàbùngì mbifwànyine, mu bikondo byà èkèleeziyà ebi, mbifwànyine kudileeji pa òngumba dyà muntu kampànda. Nènku byòbì byenzè nànkù, kí mbwena kwamba ne mbyenza bwà kufiitangana mèyì à àtapangana to. Bìdì—bìdì ànu kwamba cìdì Mufùndu mwambe, ne dibuulula dindì naadi bwàCì. Nènku nwènù nwela meeji ne ndi mutùpàkane mu bwalu abu, dîbà adi kanushàadi bacìndamine ku mwoyi to, nwànsambidilaayikù ànu bwà Nzambì wàndeejakù cìdì cìmpè, bwalu ndi muswè bulelèlè kwikala mu bululàme.

<sup>18</sup> Ne pashiishe cikwàbò cintu, mu kujingulula bujitu bùndì naabu, mu—mu disangisha bu edi nùnkù ewu, bwà kulongesha bantu, ne Nyumà Mwímpè neàndumbùlwishe bwà mèyì àndì ngamba mu cyambilu emu. Pa nànkù nudi numòna mutùdì tulenga bwalu ebu byà kakùyì tuseku to. Mpindyewu, wetù. . .

<sup>19</sup> Nùnkù's mvw'a kuswa kwenzela cyòcì eci mwaba mukwàbò wà cyanààna. Kàdi, bu mùdìbì ne ndilongesha, dîbà adi mu wetù. . . Mu masangisha à butangadiki à pambelu, muntu ne muntu wa kutùdì ùdì ne mmwenenu kampànda anyì—anyì dijingulula, anyì wa bwena utukù mu cikondo cijima eci, ne tudi ne èkèleeziyà yètù twètù, ne bìdì èkèleeziyà yètù ayì yitùlongesha, ne bitùdì twitabuuja. Tudi. . . Ncitu muswe kubwela mu èkèleeziyà wa muntu mukwàbò, anyì munkaci mwà bantu mùshindù awu to, ne kwamba cintu kampànda cyà cibèngangane ne mùdì bantu balongeshiibwe. Bwalu, ndekeelu wa byònsò, ntu nkaadi mwakule patòòke ne. . .

<sup>20</sup> Muntu yèyè mwikale mwena Kàtòlikè, ne yèyè mweyemene Èkèleeziyà wa Kàtòlikè bwà lupandu, mmujimine. Yèyè mwikale Baptiste, ne mweyemene Èkèleeziyà wa ba-Baptiste, s'mmujimine. Anyi mwena Mpenta, mweyemene Èkèleeziyà wa Mpenta awu bwà kumusùngilaye, s'mmujimine. Kàdi. . . Èkèleeziyà kanà yònsò ewu's! Kàdi muntu nkààyà awu yèyè mwikishile ne dísù dikolè pa diitabuuja mu byenzedi bijikija byà Kilistò ku Kàlvariyo, mmusùngidiibwe, nànsha yèyè mwikàle wa mu èkèleeziyà kaayi. Bwalu: "Ku diitabuuja nkunùdì basùngidiibwe, ne ciine aci ku ngàsà."

<sup>21</sup> Mpindyewu, misangu mikwàbò, mu kwenza kwà cyòcì eci, dîbà adi nèngeelè meeji, mu nzùbu wànyì sungasunga mukese

ewu utùvwà babange kukaadi bidimu byàbùngì, ànu ne mushiki wa kale wà mabwe à nshàmenda ne bikwàbò, nènku bwètù twètù ùdi bu mwaba wa cijila. Katwena baswe, nànsha byà munyi, baswè kucimòna cishintuluke to, bwalu ewu ki mwaba wà kumpàla wàkabanga Nzambi kutwilangana neetù, mpatuvwa mene katùyi nànsha beele mabwe panshi pèndè apa to. Kàdi mbi—mbikafike mu cipidi cyà ne mpindyewu too ne mukàadii ùkùlakaja emu, ne tudi ne ndongamu wa lwibaku—lwibaku mwab'ewu, bwà kupatakaja èkèleeziyà eku ne eku kwà mwaba wònsò ewu's.

<sup>22</sup> Mpindyewu, ne patwàmba kufikila ku diine dîbà adi, ndi ndyùmvwà ne pândi mfùma mu budimi bwà bwambi, pândi ncìyi mwà kutapa bânà bèètù ku mwoyi ne, anyi, mayiisha ne bikwàbò to, dîbà adi bidi bimpèesha bukenji bwà kwamba patòoke mmwenenu wanyì mèmè sungasunga, mu—mu wànyì. . . mu cyambilu emu. Ne pa nàнку wèwè mwambe ne: “Ndi mulongeshiibwe mu mùshindù mushiilàngàneku ndambù,” Ndi mufwnàiyine. . . Ne pashiishe, mu cyòci eci, tudi ànu tubiikila muntu kanà yònsò udi muswè kulwà awu. Nwamònu anyi? Kakwena muntu nànsha umwe udi ucìtuudila mfranga to, anyi nî ncinyi cyònsò. N'Tabernacle ewu's. Nènku muntu yònsò udi muswè kulwà awu, tudi tumwakidila ànu bimpè bwà kulwaye. Lwàku wèwè ànu kulwa. Pa nàнку ndi nnulòmba bwà nulwe ne Bible wenù, mu disangisha dyònsò, ne nulwe ne kidiyò ne dibeji.

<sup>23</sup> Nènku mpindyewu, ne mèyi ònsò à dyela naawu nsèke ne bikwàbò, ncìvwa nkumbana bwà kutwàla mikàndà yònsò ayi to. Pa nàнку ndi ànu mufunde, mufunde apa, musangu wònsò, pa dibeji kaaba aka, tuntu tukesè tündi mwangate mu maalu-malonda ne dyela dyà nsèke, ne bikwàbò, bìndi mufwànyine kukùmbana ànu mwà kubibadila mu—mu tuntu tufùnda etu etu, pamutù pàà kwangata mukàndà ne kubanga kubuulula mabeji awu. Kàdi, pakàadibi bikafika ku Mifùndu, netwangate Bible. Nènku pashiishe mu dyela dyà nsèke, nèngumvwije; anyi mu maalu-malonda, ne mmufùndi kaayi wa maalu malonda uvwa mucyàmbe, ne bikwàbò. Dîbà adi mu. . . Mu bushùwà bwà bwalu, bwà mukàndà wikala ne cyà kulwa awu, mòna's, dîbà adi's tudi mwà kuwùfùnda bimpè ku cyamù dîbà adi, ne biikale mwà kupeta byònsò byenza mùdibi bikèngela.

<sup>24</sup> Mpindyewu, netwènzè ne mwetu mwònsò bwà kubanga kumpàla kwà dîbà ne kupatuka kumpàla kwà dîbà mu mishindù yònsò. Neciikale matùkù mwandamukùlù, à masangisha, kubangila ku dyàlumingu too ne ku dyàlumingu dikwàbò.

<sup>25</sup> Mu dindà emu ndi mbanga ne nshapità wa 1 wa Bwàkabuulwibwà, wa Mukàndà wà Bwàkabuulwibwà. Ne Bwàkabuulwibwà mbukosa mu bitùpà bisatu. Nènku nshapità yisatu yà kumpàla ki yitwikala ne cyà kukwàta naayi mudimu mu matùkù mwandamukùlù aa. Pààbi, cikondo cyà èkèleeziyà cimwèpele cidi mwà kutwangata ngondo mujimà.



kuya kule; ku mulongo mwinâyì, kujiminaye ne kukabwela mu—mu civùmvù, èkèleeziyà kulela èkèleeziyà wa civùmvù.

<sup>31</sup> Ne pashiishe Èkèleeziyà mùle tente ne Nyumà! Byôbi biine, ndi ngamba bwalu ebu ne kaneemu kàà difwàna dyà Nzambì bwà ntèndeleeleu wa muntu yònsò. Kuumukila ànu ku cibangidilu, too ne mu cikondo eci, Èkèleeziyà mulelèlè, wa bushùwà úvwà ànu ng'Èkèleeziyà wa mpenta. Mbulelèlè. Nzambì wàkalaminyina Èkèleeziyà ewu.

<sup>32</sup> Kàdi mèmè ntu ànu ndikonka misangu yàbùngì, pàakamba Yesù dìyì adi, wàmba ne: “Kanùcìnyì to, nwènù kasumbù kakesè kàà mikòòkò, ndiswa dyakàne dyà Taatù wenù bwà kunùpeesha bukalenge.” Ntu misangu yònsò ànu ndikonka civwa aci ciswa kumvwija, kàdi ndi ncyùmvwa mpindyewu's.

<sup>33</sup> Lumingu lushààle elu tuvwa benze disangisha mu Shreveport, mu Louisiane, disangisha dyà ditàmbe bunène dyà mu nyumà dìmvwàku mubwele kacya, bwà kacya bandela. Shreveport!

<sup>34</sup> Mvwa . . . Mvwa ne ndambù wa matùkù à diikisha, nènku mvwa muye mu Kentucky ne Mwanèètù Wood ewu, umwe wa ku balami bàà mu èkèleeziyà, anyi balubuludi's we, bwà kulemba nyama. Twètù kubwela mu meetu.

<sup>35</sup> Mvwa mwase nshìndì wa kumpàla. Ki mèmè kwamba ne: “Nèngǎnji ànu kwindila,” bwalu muntu kampànda mmupicilemu ne yimwè mbwa. Ki mèmè kwamba ne: “Nèngǎnji ànu kwindila too ne pàapatuka nshìndì mu milundu. Kubàndayi lubilu mu micì amu, mu milundu ayi, kàdi kusokomayi mpindyewu.” Mèmè kwamba ne: “Pàapatukayi . . . Mèmè nènsembè apa bwà kwindila.” Bwalu kùdi mashika à menemene ne à makolè, ne macì àmba kutuuka. Kàdi, nudi bamanye's, mpepèle yèbè yà—yà mikole yipicila mu mpòngò amu's. Mèmè ne: “Nèngǎnji ànu kwindila too ne pàapatukà nshìndì.”

<sup>36</sup> Ndi mwenze ànu ntwa nyimà panshi, s'ki Nyumà Mwimpè kwamba ne: “Juuka, nda lwà mu mwaba unùdi nubiikila ne 'lupòngò lwà mwena manayi mwimpe.' Nèngàakulemù neebè.”

<sup>37</sup> Ki mèmè kuya mu mwaba awu úmvwà mwinyike ne “lupòngò lwà mwena manayi mwimpe.” Bwalu, cìmvwa mwinyikile mpòngò ayi dìnà, mèmè mwine, mbwà ngamòna mwà kumanya mwaba úmvwa nsanganyibwa. “Lupòngò lwà mwena manayi mwimpe,” bivwa mbwalu bavwa ne . . . Mvwa mubwele muntwamu ne kumòna nshìndì dikumi ne yisambòmbò misòmbè ku mucì; kwasa bùngì bungaanyishila, kushiya mikwàbò ayi mwaba awu, ne kukwàta njila kuya. Nènku aci's ki dinàya adi, mwà kudyenza. Nànku dībà adi mèmè kucibiikila ne: “lupòngò lwa mwena manayi mwimpe.”

<sup>38</sup> Ki Yèyè kuntèelela ne: “Mwaba útù ubiikila ne 'lupòngò lwà mwena manayi mwimpe awu.’” Kì n'Yèyè uvwa mulùbiikila to, kàdi mèmè nguvwa mulùbiikila nànku.

<sup>39</sup> Pashìishe mêmè kuya lwà ku mutù kwà lupòngò alu ne kusòmba mwinshi mwà mucì wà lusanga lutòòke, ne kwindila bu citùpà cijima cyà dîbà, kàdi cintu nànshapu cimwe cyà kwenzeka. Mêmè kudyàdija panshi, kupona mikookwela panshi mêmè mwine, kwela byanza muulu. Ki kushiishaYe kwakula naanyi.

<sup>40</sup> Nènku pààkenzaYe nànku, Mèyì àkambuulwilaYe, pa Mufùndu mwine ewu utùdì ne cyà kufikaku mu dindà emu ewu, Ncivwaku kacya mwanji kucimòna kwònsò aku to, kacya bândela.

<sup>41</sup> Nènku pashìishe pângààkafikà ku Shreveport, mu Louisiane, mukàji kampànda udi mukàji mwikale ne mapà, dîna dyèndè m'Mandamu Schrader . . .

<sup>42</sup> Kukaadi bidimu byàbûngì, pààkatuutakeena naanyi Mwanjèlo wa Mukalenge lwà kwinshì ku musulu eku, bwà musangu wà kumpàla, ne kumwènèka mu Bukènkè abu, ne Mèyì àkambaye mwaba awu; paanyimà pàà bidimu dikumi ne cimwè, pângààkabwelà mu disangisha kampànda, mukàji mutekète ewu wàkajuuka ne kwakulaye mu myakulu ne kwandamunaye. Cìvwa mmwaku ku mwaku cintu cimwècimwè cyàkamba Mwanjèlo aci.

<sup>43</sup> Nènku mukàji mutekète umwèumwè ewu, pângààkabwelà mu tabernacle ku . . .anyi mu mwaba mwine wà ku Shreveport wutùvwà tusanganyiibwamù ewu, Life Tabernacle, Nyumà Mwîmpè kupwekaye pa mukàji awu ne kwàmba ku mwaku ku mwaku cyàkangambilaYe lwà pa kakùnà apu. Dîbà adi Nyumà kubanga kunyunga ne kufila dikudimuna, ùdyanjila kwamba maalu ku dibuulula, ku cipròfetà, bintu bìvwà mwà kwenzeka mu disangisha dilòòlò dìvwà dilondà adi, kàdi musangu nànsha ùmwè kabitukù byanji kupangila to.

<sup>44</sup> Kumpàla kwà cyòci aci, mukàji mutekète kampànda kujuukaye mu disangisha amu, mukàji kampànda wa ba-Baptistes kulwaye mwaba awu kàyi mumanye cìvwàye mwà kwenza to. Nènku ùvwa mwimane munkaci mwà disangisha ne Nyumà Mwîmpè kumutuulukilaye pambidi, ki kubangaye kwakula mu myakulu, mukàji kampànda wa ba-Baptistes wa mu Èkèleeziyà wa ba-Baptistes wa Dyàmbedi wa mu Shreveport. Ne pashìishe kàvwa mumanye cìvwàye mwenze to. Nènku dîbà adi, kumpàla kwà yèyè kwamba nî ncinyì nî ncinyì, Nyumà Mwîmpè kufila dyandamuna, kwamba ne: "EMU MMUDÌ MUKALENGE WÀMBA, 'Munda mwà ngondo yisatu, nekwikale Nyumà wa Mòsà, Eliyà, ne Kilistò, munkaci mwà kukwàta mudimu mu tabernacle emu.'" S'ki cyòci aci cyenzeke, ànu menemene.

<sup>45</sup> Muntu mulùme baptiste kampànda wa ku Meridian, mu Mississippi, kwenzaye ne àteekà cyanza cyèndè pa frigo wendè, bwà kupatula cintu kampànda mu frigo amu, ki Nyumà wa Nzambì kumupwekela pambidi. Ne yèyè wàkaakula mu



myakulu, kàyi mumanyè cìvwàye wènza aci to. Nènku kumpàla kwà yèyè kupeta...kumpàla kwà yèyè kuumvwa cìvwàye wenza, Nyumà Mwîmpè kwakula kwamba ne: “Nda ku Shreveport, mu Louisiane. Musadidi wanyì neàkwambile cyà dyenza.”

<sup>46</sup> Ki kulwaye mwaba awu, kwambaye ne: “Ebu bwalu ncyèna mbuumvwakù to; kacya kabùtu bwenzekekù nànsha.” Kaa, ekèlekèle!

Tudi ne mwoyi mu matùkù à ndekeelu pabwîpì menemene ne Dilwa dyà Mukalenge.

<sup>47</sup> Èkèleeziyà mukese awu ùtu misangu yònsò ànu wa banyààbanyà, wa Mpenta awu. Ncyèna nswa kwamba dingumba dyà beena Mpenta adi to. Kî ndîndî nswa kwamba to. Kàdi, mbantu bàdi ne dilabula dyà mpenta! Mpenta kî mbulongolodi nànsha. Mpenta ndilabula didi diya kùdi ewu yònsò udi muswè. Mwena Kàtòlikè, mwena Yuda, muntu ucìdi witabuuwilakù, ba-Méthodistes, ba-Baptistes ne: “Ewu yònsò udi muswè, àlwe.” Ndilabula didi muntu nkaaya...Nzambi kàtu ùkwàta mudimu ne dingumba to, Yèyè kàtuku nànsha ùkwàta mudimu ne bàà Bisàmbà byà bendè bu—bu cisà anyi cisàmbà kampànda to. Ùdi ùkwàta mudimu ne bantu nkààya ne: “Ewu yònsò udi muswè.” Ikalè mutòòke, mufiike, wa kalaabi, mufiikuluke; Méthodiste, Baptiste, mwena Mishòonyi, mwena Kàtòlikè, cyònsò cidiye aci: “Àlwe,” nî nganyì yònsò. Ndi ne disànkà dyàbùngì bu mudiYe mucyènzè mùshindù awu. Ndi... .

<sup>48</sup> Ànu muvwa muntu awu mwambe musangu kampànda ne: “Mbipicìibwe ne mèmè mMuumvwa wamba aci pamutu pàà kuteela dínà dyànyì ne: ‘William Branham àlwe,’ bwalu nkufwànyìne kwikala bakwàbò baa William Branham. Kàdi pààkambaYe ne: ‘Ewu yònsò,’ ndi *mumanye* ne aci ncingangate.”

Pa nànkù mùshindù awu ke utùdi bwònsò mwà kudyùm vwa ne: “Ewu yònsò udi muswè, àlwe.”

<sup>49</sup> Mpindyewu, ndi mumanye ne kùdi bantu bààbùngì munkaci mwà kwindila pambelu apa mu nzùbu ya bilaala-beenyi ne bilaala-beenyi byà bàlaminyinamu màshinyi, bàdi bàfùmìna pa buloba bujima. Nwamònu anyi? Kùdi bantu mwab’ewu bafùmìne ku Irlandè ne mu myaba mishiilèshiiilàngane, bindile bipungidi ebi. Kàdi ncyèna mwà kubyangata mpindyewu mene to. Ndi muswè kufila díbà dyànyì ku cyòci eci, bwà nwènù kuumvwa.

<sup>50</sup> Pàndì mfùma ku ngendu eyi, ndi ngààlukila nangananga bwà kupeta—kupeta muntu kampànda wa kukwàcila mudimu, bwalu bàtu balama bipungidi. Kàdi mpindyewu mene bìdi bìkèngela bwà twètù kubiteeka ku luseka bwà Cyòci eci.

<sup>51</sup> Mpindyewu, cintu ànu cìmwèpele kumpàla kwà twètù kubanga Mukàndà ewu. Ku cibangidilu kwakadi Èkèleeziyà wa Mpenta. Èkèleeziyà wa Mpenta awu wàkapàtuka mu bukolè bwà

Nyumà ne kufùnda Mukàndà wà Byenzedi. Musangu mwibìbì, ùdì ubanga kukèepela, èkèleeziyà kulwa wa kwisùkwisù. Cikondo ciibìdì cyà èkèleeziyà, cìvwa ànu bintu byà kwisùkwisù byètù byà menemene ebi, kàdi kaaDimiinu kakesè kàà Mpenta aku kavwa ànu katungunuke ne kulwa, kàà nyumà. Pashiishe kubwelaci mu bikondo byà mîdimà, byà bidimu bitwe ku cinunu ne nkàmà yinaayi ne byà mu njila, cyà dikèngeshiibwa dyà mîdimà. Cikondo cikesè cyà Mpenta aci kutùngùkaci ànu ne kwikala ne mwoyi ku cyòci aci. Mùshindù mwine ùdici cipandukè, kanunkonkiku to. Cìvwa ncyanza cyà Nzambì, cintu cimwèpelè cìvwa mwà kwikala cicyenze.

<sup>52</sup> Bwalu, bàkabàpoopela, ku makunji. Nènku kwangatabò bantu balùme ne kubiinamijabo pa—pa cikuuku, ne kwangatabo mpoopo ya micì e kubafinyikabo mu mikòlò, kàdi kulekela nyama, mbwa, yibadiila lwànyimà, yibatuulakaja mala, kumpàla mene kwà kufwàbo. Kwangata bantu bakàji, kubàkosa mabèèle, ne lushoola mùshindù *ewu*, dibèèlè dyàbo dyà dyàbalùme adi, kàdi biimana ne balekela mashi awu ànu àtuuta lubòlèlèlè panshi, too ne mudibo batuula nkìndà. Bàngata bânà mu mafu à baamaamù bwà kwelela mbwa ne ngulube, piine apu mbòbò ànu babàtàngile's. Wa bwalu bàmba muvwaci bwena Kilistò; kàdi's Bible mmwambe, ne Yesù wàkamba ne: "Nebyènzekè ne nebiikalè mwà kunùshipa, beela meeji ne bàvwa bènzela Nzambì mudimu." Nwamònu anyì?

<sup>53</sup> Nènku mpindyewu cintu aci ncilambe too ne mu cikondo cikwàbò. Kì ndekeelu wa byònsò kupatukaci. Pashiishe tudi tumòna ne pàvwà èkèleeziyà ùpatuka mu dilongolola amu, kulalukaye ànu kulaluka, kubangila ànu musangu awu, ne kuyayè kule ne Nyumà, kuyayè kule ne Nyumà, ànu nàнку too ne ku cikondo cyà ndekeelu eci pakaadiye pabwìpì ne kudyenza cimuku ne kwenza cimfwànyì cyà nyama wa lwonji.

<sup>54</sup> Kàdi Nyumà mukèsè awu neikale ne mwoyi munda mwà myoyi yà bantu too ne pààlwà Yesù. Bikèngela bwà kwikalabi nàнку. Lamàayi aci mu meeji.

<sup>55</sup> Netùcizole pa mbòdi pààpa, kwangata maalu-malonda ne bikwàbò byònsò, bwà kunuleeja ne bìdi ànu mùshindù awu menemene. Nenwàngate maalu-malonda, nwènù biine, bwà nucibale. Numònè cidì Bible mwambe, ne pashiishe cidì maalu-malonda mambe. Numònè mùdici cìpetangana ànu menemene mùshindù awu. Kaa!

<sup>56</sup> Katùteeciku bwònsò kwangata eci ànu bu dilonda dyà bwalu to, kàdi ne dîsù dikolè, ne dîsù dikolè twangate madimwija à Nyumà Mwîmpè bwà kusambila, muunya ne bufùku. Kanulekediku cintu nànsa cimwè cinupangisha bwà kusambila to.

<sup>57</sup> Patùdi tuditwamù, netùpatulemu nsòmbelu yà bantu banène bàà kale wàwa, ne mùshindù wàkadikèngeshabo. Neumòne

mùshindù ùdi cyùdi wêwè mwenze cikesè. Bitu bimfikisha ku didyùmvwa mêmè mwine bundu misangu mikwàbò, mùshindù ùdibi bikèngela bwà twètù kwikala ne bintu byònsò ànu bipeepèle nùnkù ewu, kàdi bóbò bààkapeta bintu byònsò ne lutàtu. “Bààkalalakana,” mwàkamba Pòlò mu Ebèlu 11, “bavwàle bisèbà byà mikooko ne byà mbùji, bakengeshiibwe ne batàcishiibwe, banyengibwe byònsò.” Bujaadiki bwètù nebwikale cinyi kumpàla kwà bwàbù’s? Mmùshindù kaayi wikalàbu ku luseke lwà aci’s? Kàdi twètù bikèngela twikale ne bintu byònsò ànu byà bilenga.

<sup>58</sup> Mpindyewu, ànu bwà kaneemu cyanàànà, bangabanga ne twètù kubuulula Mukàndà, ndi njinga bwà twètù bònsò, bàdi mwà kucyenza abu, kajuukilaku ànu kuulu katanci kakesè cyanàànà bwà disambila. Mpindyewu ne meeji matòòke a mu mwoyi wèbè, nunganaku mwaku wà disambila bwà...kùdi Nzambi.

<sup>59</sup> Mukalenge Nzambi, Mufùki wa maulu ne buloba, Mfukyamu kele wa Mwoyi wà Kashidi, ne Mufidi wa mapà ònsò mîmpè ne mapwàngane. Tudi baswè kuKulòmba, Mukalenge, dyàmbedi, bwà kutùfwilaku luse ku dibenga kucyùka dyètù dyònsò dyà myanda, ne ku mpèkaatù yètù ne matomboka ètù biKwenzela, ne benzelangane muntu ne mukwèndè ne bakwètù.

<sup>60</sup> Swàkukù bwà cikondo cikesè cyà didisanga eci kacikadi ànu bwà diibakiibwa dyà misùukà yètù twètù nkaayaayi to, kàdi swàkukù bwà biikale bwà kutùtòkeshila mu mùshindù wà, ne kutùpa disonsodiibwa, mu mùshindù wà twàya kambila bakwàbò. Swàku bwà cikàle cikondo cyà didilambulula, biikale tudisanga ne Mubidi wà Kilistò mu kaabujimà ne biikale badilongòlole bwà Dyambwibwa.

<sup>61</sup> Taatù Nzambi, kî nku njiyà yàànyi mêmè mwine to, mumanye ne musadidi Webè, ne basadidi bakwàbò bwònsò aba, kî mbakumbane bwà mudimu munène ewu to. Tumòna muvwa bantu banène, bàà kale, bapete bujitu pa myoyi yàbo bwà kuteeta kubuulula Eci, anyi bwà kwela nsèke pa Dibuuulula dinène edi; díbà adi tudi tufika ku dyumvwa ne tudi, bapite ne mùdibo, katùyi bakumbane to. Kàdi Wêwè ke dyètù dikùmbànyina.

<sup>62</sup> Nènku ndi ndòmba, Taatù wa mu Dyulu, bwà Wêwè kwenza cintu kampànda cyà pabwàci munda mwà díbà edi, bwà Nyumà Mwîmpè kwikalaYe ne bukòokeshi pa mwoyi ne mwoyi wònsò. Tengùla mishiku yidi yàkula ne maci àdi atèeleja. Nènku pààjika cyònsò, ne twètù kucilambula Kùdi, swàku bwà tupatukeku ku mushiku wà mbèlù wà nzùbu ewu, twenda twamba ne: “Bivwa bìmpè bwà twètù kwikalapù’s. Nyumà Mwîmpè mmwakule neetù patùvwà basòmbe mwaba awu apu. Nènku mpindyewu tudi bakange mwoyi bwà kwenza cyònsò citùdi mwà kwenza

pàcìdì Makênkè à dilòlò munkacì mwà kuteema.” Enzàku nàнку, Mukalenge.

<sup>63</sup> Swàku, mu disangisha edi, bwà kufikisha balùme ne bakàjì ku dipeta dyà lukunukunu, mu mùshindù mupyamùpyà. Swàku Ùjuulà baakudi bàà mu myakulu, bandamunyi bàà myakulu. Swàku Ùjuulà mapà à cipròfeta. Juulaku bayiishi, bampaasàtà, batangadiki, ne bikwàbò, bwà Èkèleeziyà wàmòna mwà kwibakiibwa. Juulaku ba-missionnaires bwà kuyabò mu budimi bwà bwambi mwàmwa ne kutwàla Èvànjeeliyò wa butumbi ewu. Kwònsò kwàyà Dìyì aku, swàku bwà Dyàmata mu buloba bwìmpè, dipàtula makwàbò lukama, bwalu tudi twitabuuja ne tudi ku ndekeelu wa cikondo. Dikùmbana dyà maalu ónsò dikaadi pabwìpi.

<sup>64</sup> Twènzèlèku bintu ebi, Taatù. Ne kumutù kwà maalu ónsò, Mukalenge, pa dîbà edi, Nkwacisheku, mèmè mwena Lukengelu ewu. Bwalu ndi ndòmba nàнку, pàndì ndilambula Kùdì bwà masangisha aa apa, mu Dîna dyà Yesù Kilistò. Amen.

[Mwanèètù wa bakàjì kampànda ùdi wakula mu mwakulu mukwàbò, mwanèètù wa balùme kampànda ùdi wandamuna—Muf.]

<sup>65</sup> Nzambi wa Bukolè, Wàkabiisha Yesù ku bafwè, tudi ne disànkà dyàbùngì dyà kumanya ne Nyumà Webè mmusòmbèle munkacì mwètù. Yèyè ùtu misangu yònsò ànu wa cyà bushùwà ne kacya kàtukù mwanji kwamba mwaku wà mashimi to. Nènku mpindyewu, Taatù, shindikaaku Dìyì Dyèbè patùdì tubala apa, bwà butumbi Bwèbè. Nènku swàku bwà mwoyi ne mwoyi wònsò, bu muWàkamba ne: “Yikalaayi badilongololè ne pabwìpi, bwalu nekùlwe cintu kampànda.” Cìdi mwà kwikala bantu bààkidila didimwija dyàbò dyà ndekeelu bwà kuumuka ku bintu bìdìbo benza mpindyewu ebi, kuya ku njila wa bushùwà. Tudi tuKwela twasàkidila, Nzambi wa Cijila, mu Dîna dyà Mwàn’Èbè, Mukalenge Yesù. Amen.

<sup>66</sup> Tubuulula mpindyewu mu Mukànda wà Bwàkabuulwibwà, nshapità wa 1. Mpindyewu, dyàmbedi, ndi muswe kubala mvensa yisàtù yà kumpàla yà Bwàkabuulwibwà.

*Dibuulula dyà Yesù Kilistò, didì Nzambi mumupe, bwà kuleeja musadidi wendè maalu àdi ne cyà kukumbana mu cikòsò; nènku wàkatuma ne kuwùmwijila kùdì mwanjèlo kùdì musadidi wendè Yone:*

*Yèyè udi ufila bujaadiki bwà dîyì dyà Nzambi, ne bwà bujaadiki bwà Yesù Kilistò, ne bwà byònsò . . . bwà bintu byònsò byàkamònaye abi.*

*Wa disànkà ng’ewu udi ubala, ne aba bàdì buumvwa mèyì à cipròfeta eci, ne balama maalu àdi mafùndamù: bwalu cikondo cikaadi pabwìpi.*

67 Ànu muumvwa mwambe kumpàla, mpindyewu, mu eci netùteetè bwà kwenza ditaata dikesè dyà Mukàndà mpindyewu, bilondeshile maalu-malonda ne bikwàbò. Nènku musangu wònsò panùdi nummòna ntafa dísu ku mabeji àndi mufùnde apa aa, ncintu cìndi mwangacile mu nsèke myela ne bikwàbò.

68 Mpindyewu, mufùndi wa Mukàndà ewu n'Yone, Yone Munsantu wa Nzambì, wàkafùndila lukòngò lùcilwalwà (A). (B) Kutumina banjèlo mwandamutekète bàà bipungu mwandamutekète bisunguluke byà cikondo cyà beena Kilistò, cikondo cyà kuumukila ànu ku matùkù à bapostòlò too ne ku Dilwa dyà Mukalenge. Nènku. . . mpindyewu, bikondo bìdi bimweneka mu dilondangana, cikondo ne cikondo, kuumukila ku dibànda dyà Mukalenge wetù too ne ku Dilwa Dyèndè cyàkàbìdi. Cikondo ne cikondo cyà èkèleeziyà ncileejìbwe ku ngiikadilu waci wa nyumà. (E) Cikondo ne cikondo cyònsò cyà èkèleeziyà cidi mwà kudìmweneshila ku ngàakwilu waci wa mu Mifùndu ne wa nyumà. Pàdi Nyumà wakula, cikondo cyònsò cidi cidìmweneshila. Cikondo cyònsò cidi citwala Mvinyo mulelèlè wa Kilistò, virgo wa Meeji awu's. Nènku cikondo cyònsò cidi citwtwàla mvinyo musomeka, virgo mukùtākane awu's.

69 Bafùndi bàà maalu-malonda bàdi biitabuuja ne, eci ki nsòmbelu wa Yone. Yone uvwa musòmbelu munda mwà bidimu byèndè byà ndekeelu mu cimenga cyà Efèsò ne wàkafwilamu. Yèyè uvwa mu cisanga cyà Patèmò, dìbà divwàye ufùnda Mukàndà, wà Bwàkabuulwibwà. Kacivwa bwalu-bulonda bwà nsòmbelu wendè to, kàdi bwalu-bulonda bwà Kilistò mu bikondo bìcivwà bilwa. Nwamònu anyi? Civwa ncipròfetà. Kì nnsòmbelu wa Yone to, kì nnsòmbelu wa Kilistò to, kadi kwamba kwà cipròfetà cyà cikondo kampànda cìcivwà cilwa. Kacivwa mèyi èndè à cipròfetà to; kàdi, makùmbù à Mukalenge, à ne dísu dikolè. Kacivwa Dibuulula dyà Yone Munsantu wa Nzambì to, kàdi Dibuulula dyà Kilistò Mukalenge.

70 S'ki Mukàndà wà ndekeelu wà Dipungila Dipyadiyà's, kadi ùdi wamba bwà mbangilu ne ndekeelu wa cipungu cyà Èvànjeeliyò. Bamanyi bàà mabàlà bàà Bible bàtu biitaba aci.

71 Mikàndà mifùndila bikondo mwandamutekète byà èkèleeziyà yàkafùndiibwa, mu cipròfetà, bwà bikondo bìcivwà bilwa abi. Pòlò ngwàkafùnda bwà mwoyi ne butumbi bwà èkèleeziyà mwandamutekète yìvwàpu mu ditùkù dyèndè ayi. Yone wàkafùnda bwà mwoyi ne butumbi bwà èkèleeziyà mwandamutekète mu matùkù àcivwà alwa, ne Yone ùvwa wàmbila bampaasàtā anyi misànjeelā mwandamutekète kàbìdi buludi beena Kilistò bàvwà mwinshì mwà banjèlo mwandamutekète bashiilèshìlàngàne aba.

72 Mpindyewu, Mukàndà wà Bwàkabuulwibwà, mpindyewu netwàngate, bu mutùdi tusunsula cyòci eci mu dindà emu ne mu dilòòlò edi. Nènku netùteete bwà kupàtuka lwà pa dìbà

dikumi ne òm̀wè jaajaa anyi òbà dikumi ne òm̀wè ne tusunsa makumi asatu, cintu bu nànkú awu, ne pashìishe kubanga cyàkàbìdì dilòòlò edì pa òbà mwandamutekète.

<sup>73</sup> Mpindyewu bìdì byakula mu nshapità 1 ewu. Mvènsa wa 1 ewu, ùdì—ùdì cyà bushùwà wàm̀ba patòòke cidìYe, bwalu n'Dibuulula dyà Yesù Kilistò. mvènsa mwi<sup>2</sup>, Munsantu Yone wa Nzambì kì mufùndì ne musadidì. Mvènsa mwi<sup>3</sup>, mabenèsha mmambiibwe. Mvènsa mwi<sup>4</sup> too ne ku mwi<sup>6</sup>, ndyela dyà èkèleeziyà mwoyi. Mvènsa wa 7, dimanyisha. Mvènsa wa 8, Buzambì bwà kumutu kwà bwònsò bwà Yesù Kilistò. Kuumukila ku mvènsa wa 9 too ne ku wa 20, neikèènà-kumòna cyà Patèmò.

<sup>74</sup> Nènku, kàbìdì, mvènsa wa 14 ne wa 15 ayi yìdì yìleeja butùmbì Bwèndè misangu mwandamutekète bwà Mupersona Wèndè. Kaa, s'mbilenga kumòna patùdì tumòna Kilistò mu bantu Bèndè misangu mwandamutekète bàà wènd-... ngiikadilu misangu mwandamutekète yà bantu Bèndè, mu dibìishiibwa Dyèndè dyà butùmbì.

<sup>75</sup> Mpindyewu, myanzu yìdì yìleeja ngiikadilu.

*Dibuulula dyà Yesù Kilistò, . . .*

<sup>76</sup> Kì ndibuulula dyà Yone Munsantu wa Nzambì to, kàdì Dibuulula dyà Yesù Kilistò, Mwànà wa Nzambì.

<sup>77</sup> Mpindyewu, mwaku wa cyena Ngelika bwà *dibuulula m'bwàkabuulwibà*, cidì cyumvwija ne “divùngùlula.” Nènku mvwa ngàngata mwaku awu ngenda ngukenketa. Ùdì umvwija, bwàkabuulwibwà awu, ùdì bwà . . . Mbyenze bu mùdì musongi wa mpìngù, mwenze lupìngù kampànda lunène, kàdì kacya wàshààla mululame lubwikila ne cibwikilu kampànda. Nènku pashìishe uya kapanda cibwikilu aci ne ùbuulula ciwaye naaci paanyimà pàà cibwikilu aci. Aci's ndyumusha dyà cibwikilu's.

<sup>78</sup> Kàdì Mukàndà ewu kì ndyumusha dyà cibwikilu, mu mùshindù awu, dyà Mupersona wà Yesù Kilistò to. Nànsha nànkú, ncyà bushùwà ne cidì cyàkula bwà Buzambì Bwèndè ne bwà misangu mwandamutekète yà buntu Bwèndè, ne kàbìdì bwà bintu bidìYe, bu mùdì Mwakwidì, Mfùmù, ne bikwàbò. Kàdì ndibuulula dyà byenzedì Byèndè mu matùkù àcilwalwà mu bikondo mwandamutekète byà èkèleeziyà bìdì bilwa. Cìdì . . .

<sup>79</sup> Pàvwà Mukalenge wetù pa buloba, bayiidi kuMukonkabo, bàmba ne: “Mulongeshi, newikalè mu cikondo eci mwà kwalujulula bukalenge kùdì Izàlèèlà anyì?”

<sup>80</sup> Kì Yesù kwamba ne: “Kì mbwalu bwèndù bwà kumanya òbà adi anyì cikondo to.” Nènku muntu nànsha umwe kì mmufwànyine kumanya to. Yèyè ne: “Nànsha Mwànà mwine,” kàbìdì, “kàvwa mumanye to.”

<sup>81</sup> Kàdì paanyimà pàà lufù Lwèndè, dijiikiibwa, ne dibìika dyà ku lufù, ne dibànda dyà mu Butùmbì, Wàkapetela

kùdì Mukalenge maalu àcilwalwà à Èkèleeziyà. Pashiishe kwalukilaYè, bwà kutwádila Èkèleeziyà Mukenji ewu, ne Mukenji wà dilwa Dyèndè ewu ne ngiikadilu wa èkèleeziyà Yèndè munda mwà Cikondo.

<sup>82</sup> Kàvwa mwà kucyènza kumpàla kwà lufù Lwèndè, dijiikiibwa, ne dibiika dyà ku lufù to, bwalu Yèyè kàvwa mwanji kucimanya to. Kàdi nuvwaku bamòne mùdì Mufundu wàmba mwab'ewu anyi?

*Dibuulula dyà Yesù Kilistò, dyàkamupa Nzambi (Kilistò), . . .*

<sup>83</sup> Mùshindù mwine wàkafilà Nzambi Taatù Dibuulula kùdì Mwân'Endè Yesù Kilistò. Nènku kutùmaYè mwanjèlo Wèndè kùdì Yone, bwà kuumvwija maalu aa àvwàku; àvwàku, àdiku, ne ikàlaku. Kaa, mbileejiiibwe mu mùshindù mulenga wà dikema's wè!

<sup>84</sup> Mpindyewu, mu cikondo cinène cìcilwalwà cìvwà Yone mumòne eci's! Mpindyewu, aa, Dibuulula edi divwa dimupèèbwe, menemene, bwà kubuulula kiipacila kasungùlùke kàà Kilistò, cìvwaYe mwà kwikala ne muvwaYe mwà kwikala, mu cikondo ne cikondo cyònsò. Ki bwà cinyi mvwa mwambe, mu dindà emu ne, lamàayi meeji ènù pa Èkèleeziyà mulelèlè. Èkèleeziyà mulelèlè wàkabanga mu Ditùkù dyà Mpenta.

<sup>85</sup> Kakwenaku mwena tèlòlòji nànsha umwe, mumanyi wa dibàla wa Bible, anyi mumanyi wa maalu malonda, ùdì mwà kwamba ne wàkabanga mu matùkù à Martin Luther, à Wesley, mu cikondo cyà Kàtòlikè, anyi mu cikondo cikwàbò kanà cyònsò eci to. Wàkabanga ku Mpenta. Aci's ke cìvwà dibanjija dyà Èkèleeziyà. Aci's ke cìvwa ntwadijilu's. Nànku, ki bwà cinyi, mu muyiiki wa dipiyangana ne muntu kanà yònsò, imannyina wèwè ku ciibi cyà Mpenta aci, nènku kabeena ne kukwàbò kwà kuya to.

<sup>86</sup> Mbyenze bu kutèeka kalulù mu budimi kampànda. Wèwè's udi mumanye mwaba ònsò ùdì masoso ònsò, nànku wèwè muàjike. Nebikèngele bwà kwalukidilaku ànu mwaba ùmwèùmwe uvwaku kalwile awu.

<sup>87</sup> Èè, s'ki mùshindù ngwòwò awu, muntu kanà yònsò udi wakula bwà maèkèleeziyà ne bikondo byà èkèleeziyà, ne byenzedi byà Nyumà Mwímpè, nebikèngele bwà nwenù kwalukila ku mbangilu, ku cibangidilu. Nebikèngele bwà kwalukila kwòkò aku bwalu Nzambi kèna ne mikalu to, ne Yèyè ngwa bukolè bwònsò. Ki bwà cinyi, Yèyè bu mùdiye kàyi mikàlù, Yèyè kèna mwà kwenza cintu kampànda *kaaba aka*, ne kwenza cintu kampànda cya cibengangana naaci, *mwab'ewu* to. Bikèngela bwà Yèyè kwenza musangu wònsò mwàkenzaYe musangu wa kumpàla awu.

88 Bu mwàkambà Peetèlo, mu ditùkù dyà. . . pàakapetà bàà Bisàmbà byà bendè Nyumà Mwímpè apu, yèyè ne: “Tudi mwà kubàkandika màyi, bu mudibi ne mbapete Nyumà Mwímpè bu mutwàkapeta ku cibangidilu anyi?”

Yesù, pàvwàYe pa buloba, wàkaakula wàmba ne: “Bìdi. . .”

89 Muntu kampànda kulwa kwamba ne: “Mikenji yidi yitwànyishila bwà kwipata bakàji bèètù, bwà bwalu kanà bwònsò ebu anyi?”

90 Yesù wàkamba ne: “Ewu wàkenza muntu mulùme, ngwàkenza mukàji. Bwà bwalu ebu muntu mulùme neikale. . .”

Yèyè ne: “Kàdi Mòsà wàkatwànyishila bwà kufùnda mukàndà wà kushipa naawu dibàkà.”

Yesù wàkamba ne: “Kabìvwa nàнку ku cibangidilu to.”

91 Alùkilaayi ku cibangidilu. Ki bwà cinyi, twètù baswè kwakula pa cikondo cyà èkèleeziyà, bìdi bìkèngela bwà twètù kwalukila ku cibangidilu, kutèeka ku luseke diyi dyònsò didi muntu kanà yònsò mwakùle munda mwà cikondo.

92 Ewu m’Mukàndà wà bukenji kutàmbe Mukàndà kanà wònsò wà mu Bible. Ewu ki Mukàndà umwèpelè ùdi Kilistò mutwèpù citampì Cyèndè. Ùdi ùbanga ne dibènesha ne ùdi ùjika ne mulawu. “Wa disànkà ng’ewu udi ubala.” Ne: “Wa dyàkabi nguumusha nì ncinyi cyònsò mu Wòwò awu.”

93 Ke Mukàndà umwèpelè wàkafùnda Kilistò, Yèyè mwine, wà mu Bible mujimà. Mikenji Dikumi, Yèyè ngwàkafùnda ne munu Wèndè. Ncyà bushùwà. Beena Yuda bàakatungunuka ànu ne kwikala bakwàtekù. Nènku, leelù ewu, cintu’s n’—n’Dibuulula.

94 Nènku pìikalaku kùtuku Mukàndà ùtu Sàtaanà mukine mu Bible, ngwà Bwàkabuulwibwà. Kùdi yìbìdi. . . Ùtu mukine Mufùndu ónsò, nènku ówò’s nsangilu yònsò nkóng wa Mifùndu. Kàdi, pìikalaku cintu kampànda, cidiye mutàmbe kukina, m’Bwàkabuulwibwà ne Genèsè. Bwalu, Genèsè ùdi wàmba cibangidilu. Bwàkabuulwibwà bùdi bùbuulula cùikalà mwà kumwenzekela mu ditùkù dyà ndekeelu. Neàswikiibwe munda mwà bidimu cinunu; pashiishe yèyè, ne mupròfetà wa mashimi, ne nyama wa lwonji, nebiimanshiibwe, ne mwoyi, mu Dijiba dyà Kapyà.

95 Nènku yèyè neàlwishe Mukàndà wà Genèsè pa ne ùdi—ùdi mwikale wà bushùwà. Neàmbè, ne: “Ki ngwà cyà bushùwà to.” Nènku yèyè neàsalakajè meeji à bantu. Tàngilàayi mwaba wùdi dyabulu ùsanganyibwa, Mukàndà wà Genèsè awu anyi Mukàndà wà Bwàkabuulwibwà, wà kumpàla ne wà ndekeelu.

96 Ne Mukàndà wà Bwàkabuulwibwà ùdi ne bimfwànyì bipite bùngì mu ówò kutàmbe ne Mikàndà mikwàbò yònsò yà mu Bible. Ùdi ne bimfwànyì bipite bùngì bwalu m’Mukàndà wà cipròfetà. M’Mukàndà wà cipròfetà. Ki bwà cinyi bìdi bìkèngela bwà kuumvwibwawu kùdi kasùmbù kàà bantu kàà cipròfetà.



Ewu Mukàndà kî mmwenzela bantu bwónsò to. Kakwena muntu nànsha umwe udi mwà kuwùmvwà to, nànsha kakesè. Mukàndà ewu mmwenzela kasùmbù kampànda kàà bantu. Lwà mu Dutèlònòma amu, Mbambe ne: “Bintu bisokoka bidì byà—byà—byà Mukalenge.” Ncyà bushùwà. Ne Yèyè ùdi ùtùbuulwila twètù, bânà Bèndè, bintu bisokoka. Pa nàнку kabyena byenda. . .

<sup>97</sup> Meeji à musunya kaènakù mwà kuumvwà maalu manène à mu Mifùndu aa to, bwalu mmakutakane bwàbò bòbò. Kàdi kùdì aba bàdi banangi bàà Dìyì dyà Nzambi, ki bàdi Mukàndà mufùndila, kùdì Èkèleeziyà. Dibuulula dyà Yesù Kilistò: “Kùdì èkèleeziyà ku Efèso, kùdì èkèleeziyà wa Seemùnà, kùdì èkèleeziyà, kùdì maèkèleeziyà,” ànu nàнку. Dibuulula dyà Yesù Kilistò kùdì Èkèleeziyà. Mèmè ntu munange aci.

<sup>98</sup> Ne mònaayi, cidi kàbìdì dikùmbana dyònsò dyà Mifùndu, dikùmbana dyà maalu ònsò mu kaabujimà. Nènku ncitèèkìibwe pa mwaba mwìmpè, ku ndekeelu kwà Bible. Dibuulula dyà cintu cyònsò mu kaabujimà nditèèka paanyimà apa ne dibènesha kùdì udi uCibala ne ùCitèèleja, ne mulawu kùdì aba bàdi bàsàkidilaku anyì buumushilakù. Ki nsangilu ònsò mu kaabujimà, kaa, cyeyemenu aci. Cintu nànsha cimwè kacyèna mwà kusàkidiibwaKù to. Nènku pàdi muntu uteeta kuumushilaKù cintu kampànda, anyì kusakidilaKù cintu kampànda, Nzambi mmwambe ne Yèyè ùvwà mwà kuumusha citùpà cimwècimwè aci mu Mukàndà wà Mwoyi. Nwamònu anyì? Ùvwà mwà kuumusha citùpà cyèndè mu Mukàndà awu, bu yèyè mwà kusàkidilaKù.

<sup>99</sup> Ki bwà cinyi, patùdi tumòna mishindù yà Dibuulula dyà Mukalenge wetù, mùdiYe, cidiYe, muntu nànsha bamwamba ne nganyì wadidìnga kusàkidila ku Aci anyì kuumushilaKù kantu kampànda, ncipròfetà cyà mashimi. Bààbùngì bakaadi bateetètèète kwamba ne bàvwa ne cintu kampànda paanyimà pàà Cyòci aci. Kàdi Aci ki Dibuulula mu kaabujimà dyà Mukalenge Yesù mu cikondo Cyèndè cyà èkèleeziyà ne mu Ditùkù Dyèndè, Dibuulula dyà Mukalenge wetù.

<sup>100</sup> Mpindyewu—mpindyewu, *kubuulula*, mwaku wa cyena Ngelika, cintu kampànda citu cisokoka, kaciyi cibuul-... “cibuulula” Kilistò.

Mpindyewu, mvensa udi ulonda awu, tudi tusangana, mu mvensa mwi2.

<sup>101</sup> Mvensa wa 1 udi ubuulula Kilistò, Dibuulula, anyi dibuuludiibwa. Kaa! Mùshindù mwine wùvwà cikondo cyà ndekeelu ne Dilwa dyà Mukalenge biikale kabiy-... bibwikila, kùdì bapostòlo’s wè! Bààkeela lukonko alu, kàdi umwèpelè ngwakashààla ne mwoyi bwà kupeta Dibuulula adi’s. Nènku kàbìdì, kàvwa nànsha mucyumvwe to, bwalu bwalu-bulonda abu kabuvwa bwanji kwenjibwa to.

<sup>102</sup> Mpindyewu, bwalu-bulonda bwà Mukàndà ewu, anyi dyu—dyumvwija dyà Mukàndà ewu, bivwa byambila èkèleeziyà mwandamutekète mu Asie Mineure, yìvwàku mu ciine cikondo aci's. Bivwa byambila èkèleeziyà mwandamutekète ayi. Kuvwa èkèleeziyà mipite kutàmba mwandamutekète ayi, mu ditùkù adi. Kàdi dinà yònsò wa ku èkèleeziyà ayi uvwa mukumbanangane ne ngiikadilu wa mu èkèleeziyà awu amu, aci ncifwànyine kumulondesha mu cikondo cyònsò, ngiikadilu wa èkèleeziyà awu. Bu mùdi wa Efèso, ùvwa ne ngiikadilu kampànda. Seemùnà, Peegàmò, ànu nànkù, Filàdèlèfiyà, yònsò wa ku èkèleeziyà ayi ùvwa ne ngiikadilu munda mwèndè amu, aci ncifwànyine kumweneka cyàkàbìdi mu bikondo bìcivwà bilwa. Kaa! Bu wèwè ànu mwà. . .

<sup>103</sup> Muntu kanà yònsò ewu ùdi mwà kumòna ngangàcilù wa—wa mu nyumà wa Mifùndu ne mufwànyine kwamba ne bòbò kabàvwa basonsòdiibwe to anyi? Cyenzi di cyèbè wèwè mwine, kabingila kiine, twipàcilà mene twà bantu atu, mòna's, s'bidì bijaadika ne Mufùndu mmusonsola, pa kumòna mùshindù ùdi Nzambì ukumbaja bintu abi. Cinùdi ànu wenza, *apa* eci, ncimfwànyì cyà cintu kampànda.

<sup>104</sup> Bu mùdi Abraham ùlambula Izàkà, mwanèndè umwèpelè wa balùme; cimfwànyì cyà Nzambì ùfila Mwân'Èndè, nkama yà bidimu mimane kupita. Mùshindù ùvwa Yòzefù musùmbìshìibwe ne mwediibwe mu buloko, mukinyiibwe kùdi bàna bààbo ne munangiibwe kùdi tatwèndè; Yesù's, mu cimfwànyì. Muvwa Nyumà mukwate mudimu munda mwà Yòzefù, muntu wetù ewu, kàdi mwikàle uleeja cimfwànyì cyà nsòmbelu wa Kìlistò, ànu menemene. Mùshindù, Davìdì, ùvwa Mwànà wa Davìdì musòmbe pa mukùnà ùmwèùm wè awu's. Pààkabèngiibwà Davìdì bu mfùmù ne pààkabàndàye pa kakùnà aku, Mukùnà wà Olèvà, kutàngila paanyimà, ùdila, bu mfùmù mubèngiibwe; nkama yà bidimu ndambù paanyimà pàà aci, Mwànà wa Davìdì wàkabànda kakùnà kòkò kàmwèkàmwè aku, bu Mfùmù mubèngiibwe, ne wàkadidila Yèlusàlèmà. Nyumà mu cimfwànyì ne mu mmwenekelu. Kaa!

<sup>105</sup> Dìbà adi nudi mwà kumòna Èkèleeziyà munène wa mpenta awu mu ditùkù dyà ndekeelu edi anyi? Nudikù mwà kumòna mùvwà Nzambì mumubanjije mu Ditùkù dyà Mpenta anyi? Bivwa bìkèngela bwà Nyumà awu kushààlayè mu Èkèleeziyà munda mwà bikondo byònsò.

<sup>106</sup> Bakaadi ne bintu byà kwìsùkwìsù ne kabàyi bacyùka maalu to. Byàkakèngela biikale ne dìngumba. Byàkakèngela bwà bòbò kusangisha èkèleeziyà ne mbùlámàtadi pàm wè, ne ndekeelu wa byònsò bàakacyènza ne bàakatwala nkàmà yà bidimu byà dikengeshiibwa. Pashìishe, Dilongolola, bààkapàtuka. Nènku cidimu cyònsò, bàvwa benda buumusha byà Nyumà ne bàsàkidilakù byà mubidi, bàkose byà Nyumà ne bàsàkidilaku byà mubidi, mu mùshindù wà ne mpindyewu bakaadi pabwipi

ne kucyenza cyàkàbìdì. Tudi ne mwoyi mu mēbà à ndekeelu aa, à dyoya edi, dikumbana dyà maalu ónsò à èkèleeziyà. Tudi mu Filàdelefiyà. . . anyi mu Cikondo cyà Èkèleeziyà wa Laòdikiyà.

107 Mpindyewu, nshapita wa 1, mvensa wa 1, wàkafidiibwa kùdì—kùdì Yone. Mpindyewu, mufùndi nganyi? Yone. Yone. Kacivwa dibuulula dyà Yone to, ne tudi bamanye ne kabivwa nànkù to, bwalu civwa n’Dibuulula dyà Mukalenge Yesù Kilistò. Yèyè ùvwa eci, yèyè wàkasungudiibwa bu muyiidi. Ne Mukàndà Wòwò mwine ùdi ùbuulula cintu civwàku, Yesù Kilistò, kuvwaYe ùbuulula.

108 Nènku wàkatùmiibwa kùdì. . . “Ne wàkamanyisha eci kùdì mwanjèlo wendè kùdì Yone.” Katwèna bamanye ne mwanjèlo awu uvwa nganyi to. Bible kèna wamba ne mwanjèlo awu uvwa nganyi to. Kàdi tudi bamanye ne ùvwa mmupròfetà, bwalu Bible mmwambe pashìshe, ne: “Mémè Yesù ndi mutùme mwanjèlo wanyì bwà kufila bujaadiki bwà maalu àdi ne cyà kukumbana mu citùpà ciipì eci’s.”

109 Pashìshe tudi tujandula ne pàkaavwà Yone ukeba kukuukwila mwanjèlo awu, mwanjèlo wàkamba ne: “Mòna ne kwenji nànkù to.” Bwàkabuulwibwà 22, ngeela meeji ne mmwòmò. Ki yèyè ne: “Bwalu mémè ndi musadidi neebè ne umwe wa ku bânà bèènù bapròfetà.” Ùvwa mufwànyine kwikala Eliyà. Ùvwa mufwànyine kwikala umwe wa ku bapròfetà. Yone uvwa mùpostòlò. Kàdi mupròfetà ewu uvwa mutumùibwe.

110 Nènku Yone, bu mùvwàye mùpostòlò, tàngilààyì ngiikadilu wa mikàndà yèndè mifùndilangana ayi, yijaadika ne kavwa n’Yone wàkayifùnda to, bwalu kayivwa ne ngiikadilu bu wa Yone to. Angataayi Yone wa Kumpàla, Yone Mwibìdì, ne bikwàbò, nuyibale. Nènku tàngilààyì ngiikadilu waayi, pashìshe tàngilààyì ngiikadilu wa eci. Yone ùvwa mufùndi ne ùvwa mùpostòlò, kàdi eci nnyumà wa mupròfetà. Mmuntu mushiilàngàne, ànu byà menemene. Nwamònu anyi? Kacivwa mifundu yà Yone to. Kacivwa dibuulula dyà Yone to. Civwa n’Dibuulula dyà Nzambì dyà Yesù Kilistò kùdì maèkèleeziyà. Nènku civwa ne. . . Yone ùvwa ànu mufùndi cyanààna, mufùndi’s, ne—ne Mukàndà ùdi wamba cintu cimwècimwè aci.

111 Mpindyewu, kabivwa bitùmina Yone to. Bivwa bitùmina Èkèleeziyà. Èyo. Yone, pa diine díbà adi, ùvwa mpaasàtà wa èkèleeziyà wa Efèso. Nènku mpindyewu Mukàndà mmutùmina Yone. . . anyi mutùmina èkèleeziyà, kí n’Yone to.

112 Mpindyewu mvensa mwi3, Ùdi ùmanyisha dibèenesha. Tèlejàayaaku eci nùnkù.

*Wa disànkà ng’ewu udi ubala, ne aba bàdì buumvwa mèyì à cipròfetà eci, ne balama maalu àdi mafùndamù: bwalu cikondo cikaadi pabwipi.*

113 Ncikondo kaayi cikàadi pabwîpî? Cikondo cidî bintu ebi byenzeka, pàdi Dibuuulula dyà Yesù Kilstò edi dijikijibwa mu cikondo ne cikondo cyònsò cyà èkèleeziyà.

114 Mpindyewu cidîYe mucifùndile mùshindù ewu. Bu yéye mwambe ne: “Èè, mpindyewu, Yéye. . .” Bavwa baMwindile; bu ne cívwa cibuuulùdibwe, bu Yéye. . . nùnkù’s ncibuuulùdibwe kùdi Yone, bwà ne Úvwa ne cyà kulwa ànu pàvwà èkèleeziyà ne yájikièè. Ki mwákadyàmbidilaci Yone’s. Kàdi bu byôbì nànkù, èkèleeziyà ayi, pavwayi ànu ne yájiki, yivwa yilwa. . . Bu yéye mumanye, bu byôbì bimubuulwila ne kùvwa ne cyà kwikala bikondo mwandamutekète bileebilè byà èkèleeziyà, bidimu binunu byàbúngi, anyi nkàmà ya bidimu búngi cyanàanà, díbà adi kakuvwa kufwànyinekù kwikala kabingila nànsha kàmwe kàà dindila to. Bòbò’s bàvwa bafwànyine ànu kwikala benze maalu à cyàbo cikondo cyà èkèleeziyà.

115 Ki bwà cinyi, Nzambì úvwa mucyàmbè, kàdi kacívwa cibuuulùdibwe kùdibò to. Kacívwa cibuuulùdibwe kùdi Martin Luther to, bintu bìvwà John Wesley mumanye pa Mifùndu abi’s. Ki mbibuuulùdibwe kùdi ba-Baptistes, bìdi beena Mpenta bamanye pa Mifùndu to, bwalu bidi mu cikondo cishìilàngàne. Ncikondo cishìilàngàne. Ne Nzambì útu úbuulula maalu Èndè ànu mu movù wààwù. Kaa!

116 Kwèna mwà kukuna matalà mu movù wa bintu bitoloka ne kunowa ànu musangu úmwèumwè awu to. Udi ukuna dimiinu ne didi dìtòloka too ne ku diboba. Nzambì údi úkùna Dîyi Dyèndè ne pashiishe Didi dìtòloka. Ne pashiishe tudi tutàngila paanyimà twamba ne: “Divwa aci.” Mòna’s, cyà bushùwà, tudi tuDimòna paanyimà pàà Dimane kubuuuludibwa.

117 Mpindyewu: “Babènèshìibwe,” Dîyi, dimanyisha dyà dibènesha, pa mvensa mwi3 ne: “kùdi aba bàdi babala anyi batèeleja maalu masokoka àadi.”

118 Enza. . . meeji à musunya acyèpuka, bwalu meeji à musunya kî mmamanye kantu nànsha kàmwè pa bwalu abu to. Kabyena bikèmesha to pàdi meeji à musunya kaayi macimanyè to, bwalu n’Sàtaanà mu meeji à musunya awu. Nènku Sàtaanà mmwedibwe patòòke, ne Sàtaanà kàtu muswè bwà kwediibwaye patòòke.

119 Nudi numòna mùdibi byenza Sàtaanà bwòwà pàdiye wela meeji ne neèdiibwè patòòke anyi? Tàngilàayi mu dimwè dyà ku masangisha. Tàngilàyi numòne cyenzedi cyà bantu. Tàngilàayi pambelu, mu disangisha amu. Pabwîpî menemene ne Sàtaanà kwedibwayè patòòke, pa muntu kampànda, s’nudi mwà kumòna mùdi kwísù kwèndè kùshintuluka’s. Nudi numòna’s, kî mbamanye cyà kwela meeji to. Dyàkàmwè, Nyumà Mwîmpè údi úpweka ne útandula démon awu. Kaa! Yéyè’s útu ukina disangisha dyà mùshindù awu’s. Ki bwà cinyi tudi bapeté mvità

yà mùshindù awu's, mbwalu Dìyi dyà Nzambi didi ditandula dyabùlù. Nwamònu anyi? Dyôdi ndidi dyamba cidiye.

<sup>120</sup> Bu mùdi wamba ne: “Mukàjì udi musòmbe apa ewu,” ku disonsodiibwa dyà Nyumà Mwîmpè, wamba ne: “dîna dyèndè m'Mandemwanzele *Jones*. Mmufùmîne ku *Mwaba kampànda*.” Aci cidi cyènza cinyi? Cidi cibakula nyumà wendè, cimufikisha mu mwaba kampànda.

<sup>121</sup> “Wămmanÿi munÿi? Muntu awu kî mmumanyà mêmè to, nânku's cidi ne cyà kwikala nyumà kampànda. Nnyumà wa mùshindù kaayi?”

“N'Nyumà wa Nzambi's.”

“Mmunÿi? Mbwalu kaayi ebu kûndi?”

<sup>122</sup> “Udi ne dîsaamà dyà cyâdî, kansêrè,” nànsha ciikàle cinyi, “kadi EMU MMÛDÌ MUKALENGE WĀMBA . . .”

“Kaa!” Kaa, mùshindù mwine ùdi Sàtaanà ukina ciine aci's, bwalu Cidi cimutandula.

<sup>123</sup> Mpindyewu, meeji a musunya's adi àtàngila, àmba ne: “Ndibala dyà meeji à mu mutù, lubùku.” Ki mbamanyè to. Ncikutakane bwàbo bôbò.

<sup>124</sup> Kàdi bwà aba bàdi bamanyè Cidìci, kaa, dibènesha kaayi's wè! Ncinyi ciine aci? Dibuulula. Dibuulula dyà nganyì? Dyà muntu udi ku cyambilu anyi? Dyà Yesù Kilistò mu cikondo cyà ndekeelu cyà èkèleeziyà eci, mwikale uDibuulula yèyè mwine mùvwàYe mulaye ne Neènzè. Nwamònu anyi?

<sup>125</sup> Ndibuulula, nwamònu's, ne Sàtaanà ùtu ukina aci. Èkèlekèle, mùshindù mwine udiye ùcikina's wè! Yèyè mmutandùdiibwe, citandula ndongamu wendè. Sàtaanà ùtu ùkina Bwàkabuulwibwà ne Genèsè, ndi mufunde kaaba aka. Ncyà bushùwà menemene.

<sup>126</sup> Mpindyewu, yèyè ùdi ukina dibuulula bwà cinyi? Bwà cinyi yèyè ùdi ubèngangana ne dibuulula's? Mbwalu kaküyi tuseku to nsangilu yònsò nkòng wa Dìyi dyà Nzambi ne Èkèleeziyà wa Nzambi mbiibakila pa dibuulula.

<sup>127</sup> Kabyàkwikala ku dilonga dyà—dyà tûlaasà, nànsha twètù biikale ne sèminèrè milenga ya bishi. Mbaalukile kule be mu cikondo cyà mifitù. Kaküyi mpatà to Bible ne Èkèleeziyà n'dibuulula.

<sup>128</sup> Tubuululàayi, ndi ne ndambù wa Mifundu mifunda kaaba aka, Maatàayi, nshapità wa—wa 16 ku mvensa wa 18. Tùtapàayi ànu dîsù kakesè—kakesè cyanàànà mu Maatàayi 16:18, tumòne mwaba udi Mifundu ayi, mwaba ùdi dibuulula. Úpweka ùfùmîna ku mukùnà, ku mvensa wa 17.

*Ki Yesù kwandamuna ne kumwambila ne: Udi mubènèshùbwe, Simona wa Bàà-Yona: bwalu kî*

*mmunyiinyi ne mashi bìdì bikubuulwileci to, kàdì Taatù wanyì udi mu dyulu.*

*Nènku ndi nkwambila...wèwè ne,...wèwè udi Peetèlo, kàdì pa lubwebwe elu mèmè nêngùbakilepu èkèleeziyà wanyì; ne biibi byà iferno kabyàkumutàmba bukolè to.*

<sup>129</sup> Mpindyewu, èkèleeziyà wa Kàtòlikè ùdi wàmba ne: “Yèyè mumwibakile pa Peetèlo.” Èè, aci, ncyà bushùwà ne aci’s ngeelelu wa meeji wa mu musunya’s. Kwena mwà kudifwànyikijilaku bwà ne ngeelèlu wa meeji wa nyumà ùdi mwà kuumvwa cintu bu nàнку to; mùdì Nzambi, ne Mwàn’Èndè Sungasunga mwimane mwaba awu, kàdì mufwànyine ànu kwibakila Èkèleeziyà Wendè pa muntu wetu wa patupù, bu bantu bònso, mulela mu mpèkaatù ewu. Muntu awu kucijaadikaye. Yèyè, mwikàle ne nyumà ùmwèumwè awu pambidi pèndè, wàkeela Yesù mulawu ne kuMuvilayè ànu mwìsù Mwèndè amu’s. Kacivwa Peetèlo to.

<sup>130</sup> Anyì, kacivwa nànsha mene lu—lubwebwe kampànda lùvwù lusanganyibwa mwaba awu, bu mùdì èkèleeziyà mikwàbò yàmba ne ki mùvwàbì to. Kacivwa lubwebwe to. Bwalu, Peetèlo...

<sup>131</sup> Lubwebwe lùvwàYe wàmba mwaba awu alu, kalùvwa Peetèlo nànsha, anyì Yèyè mwine to.

<sup>132</sup> Mpindyewu, bantu bààbùngì bàà mu beena Mishòònyì bàdì bàteeta kwamba ne: “Civwa n’Yesù. Civwa mpa Yèyè pààkiibakilaYè Èkèleeziyà awu. Yèyè!” To, aci’s cìcìdì ànu ntùpàkànyì. Nwènù bamòne, kacivwa Yesù to, anyì kacivwa nànsha Peetèlo to. Civwa ndibuulula.

*...ki mmunyiinyi ne mashi bìdì bikubuulwile eci to, kàdì Taatù wanyì udi mu dyulu ngudi mufile dibuulula edi.*

<sup>133</sup> Tàngilààyì. Ndi muswè kunùkonka. Mu budimi bwà Edènà, kamùvwa Mifùndu mifùnda to. Nènku pashìishe ke bânà bàà balùme bàbìdì abu, Kaayina ne Abèlè, ne bònso bàbìdì bàvwa bajinga kufila mulambu bwà kwanyishiibwa kùdì Nzambi. Pààkenzabo nàнку, Kaayina wàkalwa ne kwibakayè cyoshelu; Abèlè wàkiibaka cyoshelu. Èè, pìikalabi ne aci ki cyònsò cìdì Nzambi ùlòmba, Nzambi’s mmufwànyine kwikala ne kànsungànsungà bwà kupiisha Kaayina. Èyo. Pashìishe Kaayina kufilaye mulàmbù; ki mwakenza Abèlè. Bònso bàbìdì bààkafila mulàmbù. Kaayina kukuukwilaye, ne ke mwà kenza Abèlè pèndè. Kaayina wàkenza cyònsò cyàkenzà Abèlè aci.

<sup>134</sup> Nàнку awu pìikalabi kuya kwà mu èkèleeziyà, kushààla wa mu èkèleeziyà, kufila milàmbù, ne kusambila, ne kukuukwila Nzambi, ki cyònsò cìdì Nzambi ùlòmba, díbà adi Nzambi mmufwànyine kwikala ne kànsungànsungà bwà kupiisha

Kaayina bwalu wàkenza ànu menemene byàkambaYe bwà kwenza abi.

<sup>135</sup> Kàdi, nudi numòna's, Abèlè, ku dibuulula, wàkamanya ne kacivwa mamuma àvwà mabàpàtule mu budimi bwà Edènà to, bu mùdì meeji à musunya àbùngì enza leelù ewu. Abèlè kulwaye ne kulàmbula mamuma à mu buloba abu, kàdi Nzambì kubibengaye, kàdi cyàkabuuludiibwa... Ndi muswè kwamba ne, Kaayina ngwàkacyenza, nùmfwileku luse. Kaayina wàkalàmbula mamuma à mu buloba bwalu yèyè wàkadyelela meeji ne ki cyàkabàpàtulà mu budimi bwà Edènà's. Tàngilààyì dibuulula adi's. Tàngilààyì dipangilangana dyàdì. Tàngilààyì mùdìdì dyanza bibì leelù ewu's. Kàdi kabivwa bimuma bivwà bibàpàtule to. Evà kààkadyaku bimuma byà pomme to. Cyà bushùwà's. Mmunyì mwàkafikàye ku dimanya ne ùvwa butakà, piikalabi ne ndidyà dyà pomme? Cìvwa nku disangila dyà mulùme ne mukàji. Ki cìvwàci ne cyà kwikala!

<sup>136</sup> Mpindyewu, tudi twangata aci bu dilonga, nènku tudi ne, twalukilamù. Kabeena ne Mufùndu nànsha wùmwe to.

<sup>137</sup> Bàmwè bàà kudibo bàdì bàmba ne: "Èè, yèyè's mmwàmbe ne: 'Ndi mupete mwànà wa balùme wa kùdì Mukalenge.'" Èyowà's, mukalenge. Ki mùdì ndumbà wàmba pèndè. Nzambì ke udi ne cyà kufila mwoyi wònsò ewu's.

<sup>138</sup> Kàdi's mmwoyi munyangakaja. Tàngilààyì ngiikadilu wa mwànà wa balùme awu. Ùvwa wa tatwèndè, dyabùlu awu's; mwena lukinu, mwena lwonji, mushipyanganyi. Nwamònu anyi?

<sup>139</sup> Nènku pashiishe mmunyì muvwabi ne, Abèlè, pàvwàbo... baledi bèndè bàvwa pàmwàpa bamwambile ne—ne micì yìkaavwa mikwame bimuma, ne bikwàbò. Kàdi, cyàkabuuludiibwa kùdì Abèlè. Abèlè wàkaya kangata mwànà wa mùkòòkò, bwà mashi, wangata mwoyi. Kì mmuci wà bimuma, ukwama pomme ne bibote ne bilòwalowa to. "Kàdi Abèlè, ku dibuulula dyà nyumà," Ebèlu 11, "wàkalàmbula Nzambì mulàmbu mwìmpè mutàmbe. Nzambì mwikàle ùwùfidila bujaadiki, bwalu wàkabuuludiibwa kùdiye ku diitabuuja."

<sup>140</sup> Ki mwaba wàkii bakila Nzambì Èkèleeziyà Wendè awu. "Bwalu kì mmusunya ne mashi bidì bikubuulwile eci to." Kacya kùtu muCìlonge mu sèminèrè to. Muntu kì mmukulongesheCi mu mwaba kampànda to. "Kàdi Taatù wanyì udi mu dyulu ngudi mukubuulwileCi." Mwaba awu, cintu cyònsò mu kaabujimà cidi mu dibuulula, Èkèleeziyà mujimà, "Pa lubwebwe elu lwà Dibuuulula dyà Yesù Kilistò, Nèngiibakilèpu èkèleeziyà wanyì."

<sup>141</sup> Udi mufwànyine kwangata cidi mpaasàtà wàmba. Udi mufwànyine kwangata cidi sèminèrè ùlongesha. Udi mufwànyine kwangata cidi èkèleeziyà wàmba. Ne kì mbyanjì ànu kukumbana to, nànsha nànkù. Udi mufwànyine kwikala mukumbane mwà kucyùmvwija ne ngàakwilu wa kapelu.

Kàdi pàdì ànu Nzambì kàyì mukubuulwile ne Yesù Kilistò m’Mwân’Endè, ne wêwè musùngidiibwe ku Mashi Èndè; pa dibuulula adi, dyà ne: “Yêyè ki Musùngidi wanyi.”

142 “Pa lubwebwe elu Nêngiibakilèpu Èkèleeziyà Wanyi, ne biibi byà iferno kabyèna mwà kumutàmba bukòlè to.”

143 Pa nàнку nudi numòna bwà cinyi Sàtaanà ùdi ùbengangana ne Mukàndà wà Bwàkabuulwibwà. Cyònsò cidi cibuułudiibwe, dibuulula dyà nyumà, Sàtaanà ùdi ùbengangana naaci. Ki bwà cinyi yêyè udi ulwishangana ne mudimu wà bwambi leelù ewu. Bwalu, ncinyi ciine aci? Dibuułudiibwa dyà Kilistò.

144 Èkèleeziyà àtùngunukè ànu ne màngumba èndè manène awu ne malongolodi awu, ne tuumayiisha twèndè tukesè tulengeja ne bikwàbò. Bàlekelaayi bàtùngunuke, Sàtaanà kààkubàtàcishaku to. Kabeena ne ntatu to. Bantu bònsò’s bàdi bàbàtuuta tuumapi paanyimà.

145 Pàdiku kulwa cikondo cidi Nzambì, ku Nyumà Mwîmpè, ùbuulula Kilistò mu Èkèleeziyà amu, ne bukòlè ne dileeja dyà patòoke dyà dyondopiibwa dyà babèedi, ne wenza bwà bimanyinu byàkambaYe ne bìvwa mwà kulonda beena kwitabuuja, kwenzekabi, dîbà adi Sàtaanà ùdi ùbinduluka’s. Yêyè ùdi wenza cintu kampànda pa bwalu abu. Too ne pa diine dîbà adi, Sàtaanà kèna ucyùka èkèleeziyà kùdi mudiswike to. Nànsha wêwè mudileeje wa bishi. Kàdi pàdì Kilistò ukubuulwila ne Yêyè ùdi Mwànà wa Nzambì, ne byenzedi byàkenzaYe udi ubyènza pèbè; kacyi byenzedi bikwàbò to, kàdi byenzedi bimwèbimwè abi.

146 “Ewu udi ungiitabuuja mêmè...” Yone Munsantu 14:7. “Ewu udi ungiitabuuja mêmè, byenzedi bìndi Mêmè ngèna neàbyènzè pèndè. Wenza byenzedi bimwèbimwè abi, ne binène bipite ebi.” Bwalu, Kilistò kàvwa mufwànyineku kuyiisha dibatiiza dyà Nyumà Mwîmpè to, mbifwànyine kwikala bitàmbe bunène. Kavwa mwà kubatwadilaci to, bwalu Nyumà Mwîmpè kàvwa mwanji kwikala mufidiibwe to. Kàdi pàakalwà Yesù ne kufilayè Mwoyi Wèndè, ki Nyumà Mwîmpè kwalukilayè, dîbà adi bàvwa mwà kufila Mwoyi wà Cyendèlèlèlè kùdi bantu. Ke “citàmbe bunène ncyàci”.

147 Kàdi bimanyinu ne maalu à kukema, Yesù wàkamba bitòoke tòò, mu Maako 16 ne: “Ndàayi pa buloba bujimà, nùkayiiishè cifùkiibwà cyònsò èvànjeeliyò.” Too ne penyì? Pa buloba bujimà. Mbanganyi? Cifùkiibwà cyònsò. Pàcidi ànu Èvànjeeliyò uyiishiibwa, bimanyinu ebi nebifile bàdi biitabuuja. Nènku pàdì aci cilwa dibuulula, mwanèètù, wêwè udi pabwîpi ne Bukalenge dîbà adi. “Pa lubwebwe elu Nêngiibakilèpu Èkèleeziyà Wanyi, ne biibi byà iferno kabyèna mwà kumutàmba bukòlè to.”

148 Bwalu, mulùme anyii mukàjì ukàadikù mu cipèèlè cyà kale cyàcya nkàayende, bu mùvwà Mòsà amu, ne dibuulula dyà Nzambì dimwènèshiibwe kùdiye ku Nyumà Mwîmpè,



kakwèna cìdì mwà kumunyungisha to. Yèyè mmushindame ne mukolakane ànu ne mwèndè mwónsò.

Sàtaanà ùtu ukina Dibuulula. Kàtu mudinange to, nànsha kakesè; didi dinyangakaja ndongamu yèndè.

<sup>149</sup> Ngiikadilu wa Mukàndà ùdi ùleeja ne Yone kî nguvwa muwùfunde to. Ncyà bushùwà. Bwalu yìdi—yìdi bwà bakwàbò. . . Mmifundu yèndè, kàdi kî ndisonsodiibwa dyèndè nànsha. Ndisonsodiibwa dyà Nzambi dìdì difunde Mukàndà. Èyo.

<sup>150</sup> Tumònààyibi cìdiwu wàmba mpindyewu's.

*Wa disànkà ng'ewu udi ubala, ne aba bàdì bumvwa . . .  
cipròfetà eci, ne bàlama maalu àdì mafundamù: bwalu  
cikondo cikaadi pabwìpì.*

<sup>151</sup> Mpindyewu: “Cikondo cikaadi pabwìpì.” Cinyi? Pàdi Dibuulula mu kaabujimà dyà Yesù Kilistò dimanyishìibwe kùdì èkèleeziyà Yèndè's. Nènku bu mùdì bikondo byènda bitungunuka, didi ànu dibuulùdìibwe kudibo.

<sup>152</sup> Mpindyewu tukaadi ku cikondo cyà nshìikidilu, nènku mpindyewu tukaadi bulelèlè ku nshìikidilu wa buloba. Tudi ku dikùmbana dyà maalu ónsò dyà maalu-malonda àà buloba. Nènku kumpàla kwà lumingu elu kujikalu, ne bu Nzambi mwà kwikala neetù, mwà kutukwacisha, netùjaadike ne tudi ku dikùmbana dyà maalu ónsò dyà bikondo byà èkèleeziyà. Tudi mu Filàdèl- . . . anyì mu Cikondo cyà Èkèleeziyà wa Laòdikiyà, dikùmbana dyà maalu ónsò dyà bikondo byónsò. Tudi ku dikùmbana dyà maalu ónsò bwà maalu àà cìdìdì cyà buloba. Tudi ku dikùmbana dyà maalu ónsò dyà—dyà buloba bwètù ebu. Tudi ku dikùmbana dyà maalu ónsò dyà bintu byónsò. Tudi ku ndekeelu wa cintu cyónsò cyà mu bufùki, badilongòlole bwà kubwelamù.

<sup>153</sup> Ditùkù dikwàbò ngènda ndwa, ngeela meeji ne mvwa munkaci mwà kuya ku Shreveport, anyì kulwila mwaba kampànda. Mémè kutàngila. Mémè ne: “Mici's ki kufwayi eku. Mashinde's ki kufwawù eku. Bilòngò ki kufwàbi eku's. Ndi munkaci mwà kupùnga ne lufù. Buloba bìdì munkaci mwà kupùnga ne lufù. Byónsò bìdì munkaci mwà kupùnga ne lufù. Bintu byónsò pa buloba ebu bìdì munkaci mwà kupùnga ne lufù.” Tudi basómbe mwab'ewu mu dìndà emu, munkaci mwà kupùnga ne lufù.

<sup>154</sup> Ncyà bushùwà ne kudi buloba mwaba kampànda, mùdì bintu byónsò kabiyi bifwa to. Pìikalaku buloba mwaba ùdì bintu byónsò bìpùnga ne lufù, kùdì ne cyà kwikala bùmwe mwaba ùdì bintu byónsò ne mwoyi. Ki citùdì tujinga ncyòci aci, bwà kufika mwaba mu awu mùdì. . . mici yìdì yishààla kayiyi yìfwakù to. Kaa, mwaba ùdì bintu byónsò kabiyi bifwakù to kàdi biimane mu—mu butùmbi bwà Nzambi.

155 Mpindyewu, mpindyewu, mvensa yìsatu yà kumpàla yitùvwà naayi mpindyewu ayi, mmitèèke mwaba wa kushindamijila bitùdi twamba. Wa 1 ne: “Dibuulula dyà Yesù Kilistò.” Mwi2 ne: “Dyàkafidiibwa kùdi Yone kùdi mwanjèlo.” Ne mwi3, ùdi ne: “Wa disànkà, dibènesha kùdi aba bàdi babala, ne,” pawikala kùyi mwà kubala to, “wa disànkà ng’ewu udi umvwà.” Kwèna mwà kubala anyi? Udi uCitàèleja ànu cyanàànà. Kwajiki. “Wa disànkà ng’ewu udi ubala, ne,” pawikala kùyi mwà kubala to, “wa disànkà ng’ewu udi umvwà, bwalu cikondo cikaadi pabwìpi.”

156 Mpindyewu, cinkaayibi cìdi nsangilu wa eci umvwija, ngwa ne, Yone, mufùndi awu, mudicifùnda, uvwa...Ewu n’Yone mwaba ewu, wàmba ànu “mabènesha” ne bikwàbò. Mpindyewu, cìndi ngeela meeji ne civwa, mu Dipungila Dikulukulu, mmwakwidi ùvwà wìimana mu dindà ne ùbala Mifùndu. Disangisha òvwà dìtèèleja. Bààbùngi kabàvwà mwà kubala to. Pa nàнку kwambàye ne: “Wa disànkà ng’ewu udi ubala, ne ewu udi umvwà.” Nwamònu anyi? Mubadi ne muumvu; ewu udi ubala, ne uumvwà, mmubènèshiiibwe. Pa nàнку wèwè ànu musòmbè ne mucitàèleje, udi mubènèshiiibwe. “Wa disànkà ng’ewu udi ubala, ne ewu udi umvwà, bwalu cikondo cikaadi pabwìpi.”

157 Mpindyewu, kuumukila ku 4 too ne ku 6 ndyela dyà Èkèleeziyà mwoyi. Mpindyewu tudi baswè kwangata mwi4 ne mwi6 ewu.

158 Mpindyewu, kumpàla kwà twètù kumulenga, ndi muswè bwà muntu ne muntu ateete bwà kwela meeji bikolè mpindyewu. Ncinyi ciine aci mpindyewu? Ndibuulula dyà Yesù Kilistò, mwaba wàkuumusha Nzambi cibwikilu cyà cikondo. Ki cikondo ncyòci eci, civwa Yesù kàyi mwà kumòna pàvwàYe pa buloba apa, bikondo byà èkèleeziyà, cìvwà mwà kwenzeka. Pa nàнку, Nzambi kuumushaye cibwikilu aci, kucìpulumuna, kàdi kulekela Yone utàngilamu bwà kumòna civwa cikondo cyònsò cyà èkèleeziyà ne cyà kwenza, ne kucifùnda mu mukàndà ne kucitùminaye èkèleeziyà mwandamutekète.

159 Ncinyi ciine aci? Kilistò mubuulùdiibwe mu matùkù à cyenzedi Cyèndè—Cyèndè. Mmùle tente ne cyenzedi, Mukàndà awu’s. Nèнку m’Mukàndà wà—wà cipròfeta ùdi Kilistò mufile, Nzambi mmutùpèèle kùdi mwanjèlo Wendè, mufùnda kùdi Yone. Ne dibènesha kùdi muntu yònsò wikala mwà kuWùbala anyi kuumvwà bàWùbala, bwalu—bwalu cikondo cikaadi pabwìpi pàdi eci cyònsò cikùmbana.

160 Tudi ne nshindameenu mwìmpè mpindyewu. Kàdi vùlukàayi ne, tudi balame Èkèleeziyà mu meeji. Ku luseke lùmwè, Èkèleeziyà kubangayè; ku lukwàbò luseke, èkèleeziyà ùdi ùjika. Netùtambe kubwelamu, mu òmwè dilòlò, patwàlenga bikondo byà èkèleeziyà.

*Yone kùdì èkèleeziyà mwandamutekète yìdì mu Asie: Ngàsà ikale kunùdì, ne ditalala, byà kùdì ewu udiku, . . . uwwaku, ne udi ne cyà kulwa; ne byà kùdì Nyumà mwandamutekète yìdì kumpàla kwà nkwasa wa butùmbi ayi.*

161 Mpindyewu tudi tubwela mu bitùpà bìdì kabìyì byùmwika ne byà ndondo byà bimfwànyì abi. Mbambila èkèleeziyà mwandamutekète yìdì mu Asie Mineure. Bavwa ne—bavwa ne. . . Bi—bikondo, pa diine dîbà adi, bivwa ne cyà kulwa mu matùkù àcìvwà alwa. Ki kubazàngikaye ne—ne kubatumbisha bwà mudimu wabo ne byàkenzàbo. Kàdì, mpindyewu, mbambila èkèleeziyà ayi's, èkèleeziyà mwandamutekète yìdì mu Asie Mineure ayi's.

162 Mpindyewu, Asie Mineure kàvwa Asie musanga ntete nànsha, cipaapu cyà buloba cyà Asie. Civwa ànu citùpà cikesè cyanàànà. Bàdì bàmba ne, mmwaba wa bunène bwipacila État wa Pennsylvanie ewu, nwamònu's, anyi cintu bu nàнку awu, anyi Indiana; ànu kaaba kakesè cyanàànà kàdì èkèleeziyà mwandamutekète eyi misòmbele. Kuvwa èkèleeziyà mipite ayi cikondo aci's. Nènku, kàdì, cyàkabuulula ngiikadilu wayi. Mpindyewu ndi mbala kaaba aka cìndì mupete ku dibala dyànyì dyà maalul malonda a cyòci aci.

163 “Nènku ùdì . . . Mwediibwe mulawu ng'ewu udi uumvwa ne, anyì, ne udi kàyì uCitéèleja to.”

164 Nènku—nènku mpindyewu, cìdì cipweka ne mu cikondo cyà mvensa mwi4 utùdì baswè kuumvwija cintu kampànda mwab'ewu ewu. “Byà kùdì Ewu uwwakù, ne udikù, ne udi ne cyà kulwa, ne udi ne Nyumà mwandamutekète; byà kùdì Nyumà mwandamutekète yìdì kumpàla kwà nkwasa Wendè wa butùmbi ayi.” Mpindyewu: “Nyumà,” netùfike kudiya aku pashiishe.

165 Mpindyewu, mwab'ewu cìdì cìleeja patòòke ne, bu nwènù mwà kumòna mwómò—mwómò amu. Kàbìdì mu mvensa wa 7, anyi mvensa wa 8, Yèyè udi ulwa cyàkàbìdì ne wàmba, kàbìdì patòòke. Mpindyewu tàngilàayi. Mbambila Èkèleeziyà mwandamutekète's. “Kùdì Ewu udiku, uwwaku, ne udi ne cyà kulwa. Úvwaku, musangu kampànda; ùdiku mpindyewu; ne udi ne cyà kulwa awu.” Mpindyewu, Údì uleeja patòòke mwab'ewu mìshindù Yèndè yìsàtù, mìshindù Yèndè yìsàtù yà dimwenesha patòòke dyà mudimu Wèndè.

166 Mpindyewu bu nwènù mwà kwangata mvensa wa 8. Netùkafikeku, ànu mu katancì kakesè emu. Netwàngatè mvensa wa 8.

*Mèmè ndi Alpha ne Omega, cibangidilu ne ndekeelu, mùdì Mukalenge wàmba, udiku, . . . uwwaku, ne udi ne cyà kulwa, wa Bukolè bwònsò.*

167 Mpindyewu tudi tukwàta mvensa mwi4 ne mwi6 eyi's, yònsò yìbìdì yìdì cintu cimwè. Mu umwe, Yèyè ùdì wàmba ne: “Kùdì

Ewu uvwakù, udikù, udi ne cyà kulwa.” CidiYe uteeta kutèèka kumpàla kwà Èkèleeziyà ncinyi? Bunzambi Bwèndè. Leelù ewu, bantu bàdi bateeta kuMuvwija mu—mupròfetà. Yèyè's ùdi mutàmbe ne mupròfetà. Ne bàmwè bantu bàdi bateeta kuMuvwija Nzambi yisàtù. Yèyè kèna Nzambi yisàtu to. Yèyè ùdi Nzambi umwèpelè uvwa musòmbèle mu midimu yisàtù, didimwenesha mishindù yisàtù yà Nzambi umwèumwè awu.

<sup>168</sup> Mpindyewu, vùlukàayi ne, eci ki Dibuuulula ne: “Ne ewu yònsò udi udyùmva kàdi kàyi ulama mèyi à mukàndà ewu to, cyèndè citùpà necyùmushiibwe mu mukàndà wà mwoyi.” Yesù kèna uDibuuulula bu Nzambi yisàtu to, kàdi Nzambi umwèpelè ne midimu yisàtu. Kaa! Nebiikale mwà kubanjika paanyina pàà katanci kakesè, patùdi tubwela mu bikondo byà èkèleeziyà abi bwà kumòna ne mmwaba kaayi ùdìbo bajimije cyòci aci. Cyàkafikisha dipanduluka dinène ku Nsangilu wa Nicée. Bùbidi bwàbò bàakaya kwa nàka.

<sup>169</sup> Ne bàakenza cyàkàbidi cintu cìmwècìmwè aci mu matùkù à ndekeelu aa, ànu bu Nsangilu wa kumpàla kwà Nicée kàbidi, bwalu nekwikale mukwàbò. Cyà bushùwù ùnu mùndi mwimane kaaba aka emu, èkèleeziyà yà Kàtòlikè ne yà Mishòònyi neyìikale mwà kudisanga mu cintu kampànda, anyi kwitabangana muntu ne mukwèndè. Tàngilàayi mwepiskòpo wa mutambidile wa ku Canterbury udi lwà kwàka mpindyewu awu. Byònsò bidi munkaci mwà kudisanga pàmwè. Ne kakwenaku dilongesha dyà Nzambi yisatu mu umwe mu Bible to. Kùdi Nzambi umwèpelè.

<sup>170</sup> Ne ncibuulùdìibwe mwaba ewu mu Mukàndà wà Bwàkabuulwibwà, ne nsangilu mujimà wa Mifundu mmufwànyine kwikala mujaadikiibwe mwab'ewu, ne Kilistò mmutèèkepu citampi Cyèndè. Eci's ki Cyòci. Muntu yèyè muumushe anyi musakidile, cintu cìmwècìmwè aci necyùmushiibwe ku Mukàndà wà Mwoyi, bwèndè yèyè. Pa nàнку tusemenàayi ku eci kabiyi byà citù to, semenaayi ku eci ne mwoyi mukangula ne meeji munzulula.

<sup>171</sup> Mpindyewu, ku Nsangilu wa Nicée, bàakafika ku mapàngadika manène àbidi. Pa . . . Kaa, bààbùngi bàà kùdìbo mu ditùkù adi dyà baataatù bàà èkèleeziyà wa ku cibangidilu, bavwa ne mmwenenu yìbidi mishilàngàne kule ne kule. Umwe wa ku yòyi uvwa Nzambi yisàtù mu umwe, mwena busàtù. Ne mukwàbò uvwa—n'Nzambi umwèpelè. Nènku yònsò yìbidi kupatukilayi patòoke ne kuyayi pa matàmbà àbidi mapanduluke, mipatuke mùshindù *awu's*. Bunzambi busàtù mu umwe abu kushààlabu mwaba wà muntu umwe mulwè nzambi yisàtù. Ci-unitaire kulwaci bwena Nzambi umwe, ànu mu cilema menemene muvwa cikwàbò aci amu's. Pa nàнку bùbidi bwàbò kutùngùnukabò pa matàmbà, kàdi ànu mwòmò *Emu* mmubuulule Bulelèlà.

<sup>172</sup> Yesù kavwa mwà kwikala Tatwèndè Yèyè mwine to. Nànsha,

bu ne Yèyè ùwwa ne taatù pa kuumusha Nyumà Mwímpè, dìbà adi Yèyè's mmwànà mulela mu masandi. Nènku kèna . . . Nyumà Mwímpè ngwàkaMwimita, ne Yèyè wàkamba ne Nzambì ngùwwa Taatwèndè Yèyè. Pa nàнку Nyumà Mwímpè ne Nzambì. . . Ki Maataàyi 1:18 awu's. Byòbi ne . . . Bidi bikèngela bwà Nyumà Mwímpè ne Nzambì bìkale Muntu umweumwe awu, cyanààna Yèyè ùwwa ne baataatù bàbìdì's. Ne Yèyè wàkabiikidiibwa ne *Emanùwèle*, bwena kwamba ne: “Nzambì neetù.” Ùwwa wàmba, pàvwàYe pa buloba apa ne, Yèyè ne Taatù bàwwa Umwe.

173 Ndi ne Mifùndu yònsò mifùnda mwab'ewu bwà nupete mùshindù wa kupeta, bu twètù mwà kupeta lukonko elu—elu, anyì cintu kampànda.

174 Mpindyewu, pààkamwèneshiibwàYe kaaba aka, bu mishindù yisatu yà mudimu yà bumùntù Bèndè abu, “Ewu uvwakù, Ewu udiku, Ewu wàlwa awu, wa Bukolè bwònsò,” mpindyewu, kakwèna Nzambì yisatu mwaba awu to; kùdi Nzambì umwèpelè.

175 Kàdi mu Nsangilu wa Nicée, bwà kwenza cyòci eci, bwà kwenzabo ciine eci, byàkakèngela bwà kwangatabò búsàtù, bwalu mu beena Loomo bàwwa ne nzambì búngì cyanààna. Bavwa bàsambila bankambwa bààbo bafwè. Ndi ne bwalu-bulonda abu apa mene mwaba utùdi mwa kucyàngacila. Nwamònu anyi? Bàwwa bàsambila bankambwà bààbo bafwè abu's. Ki bwà cinyi bàdi ne Cecilia Munsantu, ne Markus Munsantu, ne munsantu, munsantu, munsantu, munsantu, munsantu.

176 Piine apu, mpàakamba mupostòlò Peetèlo ne: “Kakwèna mutwangaji mukwàbò pankaci pàà Nzambì ne bantu to, pakuumusha Muntu awu Kilistò Yesù.” Umwe.

177 Byàkakèngela bwà kwikalabo ne nzambì wa búsàtù. Pa nàнку, bôbò—bôbò bavwa ne Jupiter, Mars, Venus. “Kàdi kacivwa cijaalame to, kuciteeka cyònsò pa Nzambì umwèpelè,” ki kucikosololabo ànu mu tutùpà, ne kuvwija midimu yisàtù yà Nzambì ayi bwà kwikalayi Nzambì yisàtù mishìilàngàne.

178 Kàdi Yèyè ùdi wàmba patòoke mwab'ewu, mu Bwàkabuulwibwà ne, Yèyè ùdi Nganyi. “Mémè ndi Ewu wàkadiku, Ewu udiku, ne Ewu udi ne cyà kulwa, wa Bukolè bwònsò.” NetùfikeKu pashiishe ndambù mwab'ewu, Ewu Z, cyònsò nkòong, alphabet wa cyena Ngelika awu. “Mbata wa mu Cibanda, Rose wa Shalònà; Taatù, Mwànà, Nyumà Mwímpè; Ewu wàkadiku, udiku, ne wàlwa awu; Muji ne Mùtòlokù wà Davidi.” Yèyè udi Nzambì, Nzambì's. “Kakù-. . .” Timòtè wa Kumpàla 3:16, “Kakùyì dipanganangana to, bwalu busokoka bwà difwànà dyà Nzambì mbunène: bwalu Nzambì wàkamwèneshiibwa mu mubidi, mumòna kùdi Banjèlo, mwitàbùùjìibwe pa buloba, mwakidila mu Butùmbi.” Nzambì's

wè! Kí mmupersona mwisâtù anyi mupròfètà to, kàdi Nzambi Yèyè mwine, mumwèneshiibwe mu mmwenekelu wa buntu. Mpindyewu, eci ndibuulula, nwavùlukaayi's.

<sup>179</sup> Mpindyewu, Nzambi, ku cibangidilu, ùvwa Yèhowàh munène uvwa musòmbèle mu Dikunji dyà Kapyà awu, mulembèlèle kumutù kwà Izâlèlèlè, e kubàlombolayè. Awu ùvwa n'Nzambi, Mwanjèlo wa Cipungidi. Wakatùùluka pa mukùnà; mukùnà mujimà kukwàtawù Kapyà. Kapyà kutùuka ku mukùnà aku, ne kufùnda Méyi matùma Dikumi. Yèyè wàkabiikidiibwa ne "Buutaatù bwà Nzambi," bwà bânà Bèndè, cisà Cyèndè cisungula cyà bantu, beena Yuda.

<sup>180</sup> Pashiishe Nzambi umweumwe awu kumwèneshiibwaye mu mubidi mulediibwe kùdì virgo wàkafukaYe munda mwà Màriyà, ne kusòmba ne kuvwàngala ne kwasaYe nntentà, mutùdì mwa kwamba's, munkacì mwà bantu. Ne Nzambi umweumwe awu wàkavwijiibwa mubidi ne wàkasòmbela munkacì mwètù. Bible ngudi mwambe nànkù. "Nzambi uvwa munda mwà Kilistò." Mubidi awu uvwa n'Yesù. Yesù ne: "Munda Mwèndè muvwa musòmbèle kaabujimà kàà Bunzambi mu mmwenekelu wa mubidi." Mpindyewu, kanwèna mwà kuMuvwija bantu bàsàtù to. Kanùbatiiji mu Nzambi yisàtù to. Kùdì Nzambi umwèpelè. Nwamònu anyi? Nzambi umwèpelè. Mpindyewu, Nzambi umweumwe ewu wàkavwijiibwa mubidi.

Wàkamba ne: "Ndi mufùme ku Nzambi, ne Ndi nya ku Nzambi."

<sup>181</sup> Paanyimà pàà Yèyè mumane kuumuka pa buloba, ku lufù Lwèndè, dijiikiibwa, ne dibìika dyà ku lufù, ne dibànda, Pòlò wàkatuutakeena Nendè mu njila wa ku Damàsèkà, pacicivwaye ànu ubiikidiibwa ne "Shawùlà." Ki Dìyì kampànda kulwadì, dyàmba ne: "Shawùlà, Shawùlà, udi uNkengesha bwà cinyi?"

Yèyè ne: "Wèwè udi nganyi?"

Yèyè ne: "Ndi Yesù."

<sup>182</sup> Nènku Yèyè uvwa Dikunji dyà Kapyà, Bukènkè bwàkafofomija mèsù à mupostòlò awu abu. Ùkaavwa mwalùkilekù. Yesù umwèumwe awu ukaavwa mwalukile ku Nzambi, Taatù awu, cyàkàbìdì. Ki bwà cinyi Yèyè mmwambe kaaba aka ne: "Mèmè ndi wa Bukolè bwònsò," mu mmwenekelu umwèumwè uvwaYe kumpàla kwà kuvwijiibwaYe mubidi awu; ne mubidi Wèndè ùvwaYe musòmbèlemù, ùdìbo babiikila ne n'Yesù awu, Muntu utùdì bamanye awu, Yesù.

<sup>183</sup> Mpindyewu, ànu mùdì bààbùngì bàà kunùdì nwènù ba-unitaires bananga nubatiiza mu: "Dìnà dyà Yesù," amu nudi bapilè. Kùdì nkamà yà ba-Yesù pa buloba leelù ewu, kàdi kùdì Mukalenge Yesù Kilistò ànu umwèpelè. Wàkalediibwa Kilistò. Ba-Yesù bùngì cyanàànà. Nkaatu mutwiletwilangane ne bààbùngì bààbo. Kàdi kùdì Mukalenge Yesù Kilistò umwèpelè, Yèyè udi Nzambi.

184 Nènku Taatù, Mwânà, ne Nyumà Mwímpè kî *mmênà* to. Mmyânzù yidi yikumbanyina Dîna dimwepelè. Bàdi bàbàtiiza ne: “Dîna dyà ‘Taatù, Mwânà, Nyumà Mwímpè.’” *Taatù* kî ndîna to, ne *Mwânà* kî ndîna to, ne *Nyumà Mwímpè* kî ndîna to. Mmwânzù, bu mùdi “muntu.” Ki cidiku aci, Nyumà Mwímpè. Muntu. . .Anyi, nyumà, Nyumà Mwímpè. Pashiishe kwamba ne: “Mu dîna dyà ‘Taatù.’” Tàngilàayi baataatù, ne bânà bàà bânà bèenù bàà balùme. Tàngilàayi bantu bàdi muneemu aba. Nwamònu anyi? “Taatù, Mwânà, ne Nyumà Mwímpè” kî ndîna to. Mmwânzù ùdi wenda ne Dîna dyà “Mukalenge Yesù Kilistò.”

185 Mùshindù awu ke ùvwa Èkèleeziyà wa bapostòlò ùbàtiiza, ku cibangidilu. Nènku néndombèku muntu nànsha umwe bwà kupatula mufundu nànsha ùmwè, anyi musangu ùmwè mu maalu malonda, ukàadikù muntu nànsha umwe mubàtiijibwe mu Èkèleeziyà wa beena Kilistò mu mùshindù mukwàbò kanà wònsò pa kuumusha mu. . .pakuumusha mu Dîna dyà “Yesù Kilistò” too ne pàakabangabo èkèleeziyà wa Kàtòlikè. Nènku ke kwangatabò “Taatù, Mwânà, ne Nyumà Mwímpè” bu twitabàayi kampànda. Mpindyewu twalaayaaku bwalubulonda bwènù abu, bàmwè, bafundi bàà maalu-malonda. Èyowà. Cintu bu nàнку kacitukù to. Paanyimà pàà cidimu cyà 304 paanyimà pàà Kilistò, 304, ki kulwaku dibatiiza dyà pasatu bwà Nzambi yisàtù: “Nzambi Taatù, Nzambi Mwânà, Nzambi Nyumà Mwímpè.” Aci’s mbumpanganù.

186 Kumpàla kwà lumingu elu kujika, nèncibadilè mu mikànda bwà kunuleejila ku Bible. Tudi twakula mu dînda emu pa Dibүүлula, ne tujaadika mwaba ùdidi dîbwela, ne mwàkabangadi kwikalaku. Alukila ku Bulelèlè, mwanèètù! Tudi mu ditukù dyà ndekeelu.

187 Indilaayi too ne patwafika ku èkèleeziyà wa Efèsò awu ne kumufwànyikija ne wa Laòdikiyà, ne kutàngila cyàkenzekà pankaci pàayi. Nénùmòne mùshindù wàkadifinda cintu aci’s. Kubwela mu cikondo cyà Luther, kwamba ne: “Udi ne dîna dyà ne udi ‘ne mwoyi,’ kàdi udi mufwè.” Mwaku mene *Saàdi* udi wumvwija ne “mufwè.” Bòbò kucijimija mu bidimu cinunu ne nkamà yitaanu byà Bikondo byà Mìdimà. Yònsò wa ku èkèleeziyà ayi wàkalama aci too ne pa diine dîbà adi. Pashiishe pàakenzàbo Nsangilu wa Nicée mu cidimu cyà 606, ki dîbà adi kushimbulabo Dîna adi ne kuDyenzabù Nzambi yisàtù.

188 Wàkamba mwab’ewu ne: “Mèmè ki Ewu wàkadiku, Ewu udiku, ne wàlwa awu, wa Bukolè bwònsò.” Bushùwà’s.

189 Ùvwa ne Kampànda wa pàsàtu pa buloba apa. PàvwàYe pa buloba, Ùvwa Kampànda wa pàsàtu. Pa buloba, Yèyè uvwa Mupròfetà. Ùdi kàbidì Mwakwidi, mu Dyulu’s. Nènku pàalukilàYe cyàkàbidì pa buloba, Yèyè neikale Mfùmù. Mupròfetà, Mwakwidi, ne Mfùmù. Ewu wakadiku, udiku, ne wàlwa awu’s. “Ewu wakadiku,” uvwa n’Yesù, mupròfetà.

“Ewu wakadiku mpindyewu,” m’Mwakwidi, ùfila milàmbu yà nyumà, Mwakwidi Munène udi mwà kulengiibwa kùdi njiya yà mateketa ètù, kàdi kuDìsokolola ne kujaadika ne Ùdi munkaci mwètù. Mupròfetà, Mwakwidi, ne Mfùmù, kàdi Nzambi Umwèpelè.

<sup>190</sup> PàvwàYe pa buloba, Ùvwa Mupròfetà, Dìyì adi. “Ntèmù wa lulamatu,” mùdi Bible ùMubiikila, paanyimà ndambù. Ntèmù wa lulamatu, mmupròfetà awu. Yèyè uvwa Mwakwidi, nènku pavwa . . . Yèyè ùdi Mwakwidi mpindyewu, ne pààlwàYe, Yèyè neikale Mfùmù.

<sup>191</sup> Nwènù bafikeku, babale Bwàkabuulwibwà 15:3, nudi mwà kumòna mu Bwàkabuulwibwà 15:3. Tubuululààyaaku mwab’ewu bwà kumòna cidiYe . . . piikalàYe Mfùmù, neWikala Mfùmù pààlwàYe. Mpindyewu netùfikè ku Bwàkabuulwibwà, nshapità wa 15 ne ku—ku mvensa mwi3.

*Nènku bavwa bimba musambu wa Mòsà musadidi wa Nzambi, ne musambu wa Mwànà wa mùkòòkò, bàmba ne: Byenzedi byèbè mbinène ne byà dikema, Mukalenge Nzambi wa Bukolè bwònsò; njila yèbè myakane ne milelèlè, wèwè Mfùmù wa bansantu.*

<sup>192</sup> CìvwaYè ncinyi pa buloba? Mupròfetà. Mmunyi mwàkamanya bantu ne Yèyè ùvwa Mupròfetà? Wàkenza cimanyinu cyà Maasiyà, uvwa Mupròfetà awu. Kaa, Dìna dyà Mukalenge dibèneshiibwè’s wè! Mmunyi mwàkapangilabo kuMujingulula? Bwalu bavwa bindile cintu kampànda cikwàbò. Ne Yèyè wàkenza cimanyinu cyà Maasiyà, kàdi bóbò kabàyi baswè kucitèèleja to. Ùvwa Mupròfetà.

<sup>193</sup> Mòsà wàkamba ne: “Mukalenge Nzambi webè neàjuule Mupròfetà mufwànàngane naanyi. Nebyenzeke ne bóbò kabàyi batèèlèje Mupròfetà ewu to, nebuumushiibwe munkaci mwà cisàmbà.”

<sup>194</sup> Yèyè ùvwa Mupròfetà pa buloba apa, mpindyewu, bwalu Yèyè ùvwa cinyi? “Ntèmù wa lulamatu wa Dìyì dyà Nzambi.” Amen. Yèyè uvwa Dìyì dyà Nzambi dimwènèshiibwe patòòke.

<sup>195</sup> Yone Munsantu, nshapità wa 1.

*Ku cibangidilu kwàkadi Dìyì, ne Dìyì dyàkadi ne Nzambi, ne Dìyì dyàkadi Nzambi.*

*Ne Dìyì dyàkavwijiibwa mubidi, ne dyàkasòmbela munkaci mwètù, . . .*

<sup>196</sup> Yèyè ùvwa ntèmù mulelèlè ne wa lulamatu ku Dìyì dyà Cyendèlèlèlè dyà Nzambi. Yèyè ùvwa Dìyì, ùvwa Dìyì dyà Nzambi. Nènku, bu mùvwàye Dìyì, Yèyè ùvwa Mupròfetà. Bwalu Dìyì dyà Nzambi divwa dituuta nkòkà munda Mwèndè. Ùvwa ne cyà kwamba ànu Cintu cimwèpelè aci. “Ncyèna mwà kwenza cintu nànsha cimwè mu Mémè tò, ànu cidi Taatù uNdeeja bwà kwenza aci. Ki m’Mémè udi wenza byenzedi to. Kàdi Taatù udi



musòmbèle munda Mwànyì, Yèyè ngudi wenza byenzi. Mèmè ne Taatù Wanyì tudi Umwe. Taatù Wanyì udi munda Mwànyì,” mwàkamba Yesù, Muntu awu, Tabernacle awu.

<sup>197</sup> Nzambi ùdi ne myânzù yàbùngì: Yèhowàh, Yèhowàh-Yilè, -Laafà, -Manassé. Kaa, ààbùngì! Ùdi ne mènà mwandamutekète mambakaja, à bupikudi. Ùdi ne myânzù yàbùngì: Rose wa Shalòna, Mbata wa mu Cibanda, Mùtootò wa mu Dìndà; Taatù, Mwànà, Nyumà Mwímpè. Byònsò abi. Kàdi Yèyè ùdi ne Dìnà dyà buntu òmwèpèlè. Nzambi ùvwa ne Dìnà ànu òmwèpèlè, ne diine adi òvwa “Mukalenge Yesù Kilistò.”

<sup>198</sup> PààkalediibwaYe, Kilistò, Mukalenge awu. Paanyimà pàà matùkù mwandamukùlù, Nyumà Mwímpè kumwinyika Dìnà Dyèndè ne “Yesù.” Mamwèndè ùvwa muMutengwishe, ne kuMwinyika ne “Yesù.” Ùvwa mulediibwe Kilistò.

<sup>199</sup> Byenze bu ne, ndi mulediibwe Branham. Mwua Branham pangààkalediibwa, kulwabò kumpa dìnà dyà “William.”

<sup>200</sup> Amen. Ne Yèyè wàkalediibwa Kilistò, Musùngidi. Nènkù pààkakùmbajaYe matùkù mwandamukùlù, BààkaMupèèsha Dìnà dyà “Yesù.” Ne Yèyè ùvwa Mukalenge wa Butùmbi, mumwènèshiiibwe. Pa nànkù, Yèyè ùdi Mukalenge Yesù Kilistò, Nzambi wa Butùmbi mumwènèshiiibwe munkaci mwètù. Kaa, s’ki Yèyè awu!

<sup>201</sup> Pa buloba apa, Yèyè ùvwa Mupròfetà. Mu Butùmbi, Yèyè ùdi Mwakwidi. PààlwaYè, Ùdi Mfùmù. Kaa! Mèmè ntu munange aci’s.

Mupròfetà: “Ntèmù wa lulamatu wa Dìyì.”

Mwakwidi: “Ne Mashi Èndè Yèyè mwine kumpàla kwà Nzambi.”

Mfùmù: “Mfùmù wa bansantu.” Kì m’mfùmù wa buloba to, mpindyewu. Yèyè ùdi Mfùmù wa bansantu. Tudi ne bamfùmù bàà pa buloba pa bantu abu. Kàdi tudi ne Mfùmù, kàbìdì, ne Bukalenge. Kì bwà cinyi tudi twenza maalu bishiilàngàne.

<sup>202</sup> Ànu mùmvwà mwambe matùkù mashààle aa, bwà mukàjàànyì, tuvwa tuya ku makàjiinyì muneemu ki twètù kumòna cishimà, bu nànkù awu’s. Kuvwa mmu cikondo cyà muvù wa luuya, mukàji kampànda ùvwa muvwale nkanzu. Kì mèmè kwamba ne: “Aci’s ncintu cyà dikèma’s.” Mèmè ne: “Bu ne mvwa ne cyamu cyànyì cyà fòtò, nùnkù’s ndi mukwateku fòtò wa inàbànza ewu’s.” Nwamònu anyi? Bwalu twètù... Awu’s ùvwa mukàji wa kumpàla utwàkamòna muvwale jipè, nudi bamanye’s, muvwale ànu mutùbi bìkèngela bwà inàbànza kwikalaye muvwale’s, bakàji bònsò mene’s.

<sup>203</sup> Kwambaye ne: “Èè, Bill, mbwà cinyi cisàmbà cyètù cidi civwala nànkù, kàdi twètù mbatufundile nànkù awu anyi’s?”

<sup>204</sup> Mèmè ne: “Kì ncisàmbà cyètù to. Mbantù bàà Nzambi. Bantu bàà Nzambi, mbalòmbiibwe cijila.”

Yèyè ne: “Èè, kabàtu bàya mu èkèleeziyà anyi?”

205 Mémè ne: “Kudi inábànzà *mwaba awu* mene, utu wimba mu korale mu èkèleeziyà kampànda mwab’ewu.”

“Èè, dībà adi, mbwà cinyi ciine aci?”

206 Mémè ne: “Bwalu yèyè kî mmulongèshìibwe mùshindù mushiilàngàne to.” Ncyà bushùwà menemene.

207 S’ki èkèleeziyà wa musunya awu, netùbwelemu lumingu elu; Èkèleeziyà wa nyumà, èkèleeziyà wa musunya. Yidi yònsò yàlukila kùdi èkèleeziyà uvwa muyìlèlè, bu mùdi Bible mwambe, mu Bwàkabuulwibwà 17, ne bàvwa mwa kucyenza. Yidi munkaci mwà kwalukila patùdi twakula apa, yònsò ayi, yenza maalu ànu bu yèyè, yidivwija bulongolodi. “Èè, twètù’s tudi *cikampànda* . . . Tudi tudìvwija bulongolodi. Tudi *cikampànda* ne tudi *cikansanga*.” Kabìvwa nàнку ku cibangidilu to. Bànyenga èkèleeziyà bukolè bwònsò bàbùtèeka pa mwepiskopo anyi paapà. Nzambi ùdi mu Èkèleeziyà Wendè, munkaci mwà cisàmbà Cyèndè, ùDimwèneshila mu beena kwitabuuja ne mu myaba yònsò, mpindyewu. Kàdi mu ditùkù edi . . .

Yèyè ne: “Èè, twètù katwèna beena Àmèrikè anyi?”

208 Mémè ne: “To. Twètù tudi basòmbèle apa, kàdi katwèna beena Àmèrikè to. Twètù tudi beena Kilistò. Bukalenge bwètù mbwà ku Dyulu.”

209 Nènku pìikalabi ne nsòmbelu yètù mmifùmìne kuulu Kwàka, dībà adi’s tudi twenza maalu mùshindù awu. Bwalu, tudi tulwa . . . Mwoyi wètù ngwà ku Mwaba wa cijila. Mbishiilàngàne. Mbyà mwadilù mushiilàngàne. Bakàji bàà kuulu Kwàka bàtù ne nsuki mile. Ne bóbò kabàtu balaaba bilaabu kwìsù to. Ne—ne kabàtù bàvwàla tùpùtulù to. Bóbò—bóbò bàtu bàvwàla njipè, ne nkanzu mileemilè ne nkanzu. Ne bàdi ne nsuki mile, ne bikwàbò. Pa nàнку—ngiikadilu awu, wa kuulu Kwàka awu, ùdi ùdileejila pambidi pèètù.

210 Balùme kabàtù bànwà mfwanka, bàcyànkunya mfwanka, bashima, anyi biiba to. Bàdi bafùma, yàbo nyumà, mmifùmìne mu Mwaba wa cijila, yìbenzeja maalu à cijila, bajingululàngana muntu ne mukwende bu bânà bàà muntu. Uh-huh. Ki cyòci aci’s.

211 Twètù tudi bàà mu Bukalenge kampànda, ne tudi ne Mfùmù. Ne Yèyè ùdi Mfùmù wa bantsu. Ne mwaku *munsantu* ùdi ùfùmina ku mwaku wà “bajidiibwe.” Dībà adi pàdi muntu mujidiibwe, Kilistò, Nyumà Mwìmpè ùdi ùbwela mu mwoyi ne ùlwa Mfùmù pambidi pèndè. Kaa, ekekèkè! Aci’s civwa ne cyà kubwela kuya mu ndòndò. Kaa! Pàdi lupànzà lujidila lwà Nzambi . . . Kilistò, Mfùmù, Nyumà Mwìmpè, ùbwela munda. Ne Yèyè . . . Mfùmù’s ùtu ne citùpà cyà buloba Bwèndè. Amen. Nènku buumùntù bwèbè bwònsò mu kaabujimà mbukòòkesha kùdi Mfùmù wa bantsu. Bukalenge’s! Bukalenge bwònsò bwà pa buloba nebùkankishiibwe, bùsùnsudiibwe ku bukolè bwà

bombes. Kàdi Bible ùdi wàmba ne: “Twètù tudi twakidila Bukalenge bùdi kabùyì mwà kunyungishiibwa to.” Amen. S’ki Yèyè awu, Mfùmù wa bansantu.

212 Ndi muswè bwà nwènù kumòna bimfwànyì byà Kilistò, kàbìdì, mu Bible ne panu pa buloba apa. Pa buloba apa, Yèyè uvwa Mupròfetà. Nudi nwtabuujà aci anyi? Mupròfetà n’Diyi. Aci kaayi tudi bamanye. Mwaku ewu *mupròfetà* ùdi ùmvwija ne “muumvwiji wa Diyì wa kùdì Nzambì.” Diyì dyà Nzambì ndifùndiibwe, ne mupròfetà ùdi ne Nyumà wa Nzambì munda mwèndè. Nènku, nudi bamanye’s, mupròfetà mu Dipungila Dikulukulu ùvwa ubìkidiibwa ne “nzambì.” Mbanganyì bàvwa bamanye aci?

213 Yesù wàkamba ne: “Piikalabi ne bààkabàbìikila ne mbanzambì...Ki mbifùndiibweku mu mikenji yènù ayi, ne bàdi...‘Nudi banzambì’ anyi? Nènku piikalabi ne bààkabàbìikila ne ‘banzambì,’ aba bàvwa Diyì dyà Nzambì dilwila kudìbò abu, mupròfetà, mmunyi munwàmpìisha Mémè pàNdi ngàmba ne Ndi Mwànà wa Nzambì?”

214 Bwalu, yèyè wàkabìikidiibwa ne “nzambì,” bwalu yèyè wàkambula munda mwèndè Diyì dyà Nzambì, EMU MMÙDÌ MUKALENGE WÀMBA. Ki bwà cinyi, mwaku ewu *mupròfetà* ùdi ùmvwija ne: “dyèndè—dyèndè dyumvwija kì ndyà kusambakaja ne cintu to.” Nwamònu anyi? Piikala Nzambì. . . Yèyè ùdi wàmba ne: “Kwòkò kwikale muntu munkacì mwènù, udi wa nyumà, anyi mupròfetà, Mémè Mukalenge nêngàakulangane nendè. Cidiye wàmba cyòci cyènzeke, dìbà adi numutèeleje, bwalu Mémè ndi nendè. Kàdi cyòci kaciyi cyènzeke to, dìbà adi kanùmuteeleji to; Mémè ncyèna mumutume to.” Ki mùshindù wunùdì nucimanya awu’s. Nènku dìbà adi, nudi numòna’s, Dyumvwija dyà kùdì Nzambì dyà Diyì didi ne cyà kukùmbanangana ne dibuulula dyà ndekeelu kùdì èkèleeziyà.

215 Yèyè ùdi Nzambì, wa Bukolè bwònsò. Pa buloba apa, Yèyè ùvwa Mupròfetà, cidi cyumvwija ne mukanku. Mbanganyì bàdi bamanye ne mupròfetà ùtu ubadiibwa bu mukanku?

216 Mukanku ke nyuunyi mutàmbe bukolè udiku, wa bukolè butàmbidile. Yimwè yidi ne mapwàpwà pàdiwu mwolola afika ku metre anaayi ne citùpà, ku ntengu ne ntengu mukwàbò. Ùdi mwà kjuuka ne kubùuka muulu menemene mu mùshindù wa ne nyuunyi mukwàbò yònsò ewu mudidìnge ànu mutèete kumulonda, mmufwànyine kusùsuluka, masàlà mmafwànyine kumupòpoka ne mmufwànyine kutaayika. Bwà bwalu kaayi? Mmwibakìibwe mu mùshindù wà pabwàwù. Nènku nebimwambulwishe ku cinyi bwà kubanda muulu bulemu piikalaye kàyì mwà kumòna cidiye wenza padiye muulu amu apu? Udi wakula bwà dísù dyà kabemba anyi? S’bivwa bikèngela wèwè kumòna dísù dyà mukanku’s.

217 Kabemba kàdi mwà, nkafwànyine kumòna nzòòlo. Ncyà bushùwà. S'ki lutatù lùdiku leelù ewu ne tùmwe twà ku tubemba etu's. Uh-huh. Kàdi, ndi nnwambila ne, mukanku ùtu ùya bikolè mu mùshindù wà ne, kabemba kòkò kadidìnge kuwùlonda, nkafwànyine kufwà's. Mweyelu newùkashiikile. Kakeèna mwà kubwela mu bipaapu bìdì mukanku wubwela abi to.

218 Nènku díbà adi ùdi ne dí'sù, mu mùshindù wa ne ùdi mwà kumòna kule, pàdiwu ufika muulu mwàmwa. Pa nàнку ki bwà cinyi Nzambì wàkabiikila *bapròfetà* Bèndè ne: "mikanku." Ùdi ubànda muulu amu, ne yèyè's mmukanku. Ùdi mwà kumòna, kule menemene.

219 Ne Kilstò pèndè, pa buloba apa, ùvwa Mukanku. PàakafwàYe, Ùvwa Mwakwidi, nènku aci cyàkaMuvwija Mwànà wa mùkòòkò. Ncyà bushùwà anyi? Nènku pàalwaYe cyàkàbìdì, Yèyè ùdi Mfùmù, pa nàнку Yèyè neikale Ntambwe, amen, Ntambwe wa cisàmbà cyà Yuda. Amen. Yèyè m'Mukanku, Mwànà wa mùkòòkò, ne Ntambwe; amen; Taatù, Mwànà, ne Nyumà Mwimpè; Mupròfetà, Mwakwidi, ne Mfùmù; Ewu wakadiku, udiku, ne wàlwa awu; wa Bukolè bwònsò; Alpha ne Omega, kuumukila ku cibangidilu too ne ku ndekeelu, Nzambì wa Cyendèlèèlè.

220 Ndi muswe kunukonka, bàmwè bàà ku nwènu beena Kàtòlikè bàà musinga mukolè, bàdì bàbìikila aci ne: "Buumwànà bwà Cyendèlèèlè bwà Nzambì; Nzambì, buumwànà bwà Cyendèlèèlè bwà Yesù Kilstò ne Nzambì." Mmuniyì mùdì mwà kwamba mwaku wa mùshindù awu? Mémè ewu cimbùluntuntù, cyà mu kàlaasà kàà mwandamutekète, kàdi mémè's ndi mumanye cidi cimpè kutamba aci. Mwaku mwànà ùdi ne cyà kwikala ne mbangilu. Pa nàнку mmuniyì mùdìYe mwà kwikala wa Cyendèlèèlè cikolè mwikale mwànà? Cyendèlèèlè kaciyènakù ne ntwadijilu anyi ne ndekeelu to. Pa nàнку, Yèyè kèna mwà kwikala mwànà, mwànà wa Cyendèlèèlè, kàdi pashiishe kwikala ne mbangilu to, bwalu cintu pàaci ne m'mwànà wa Cyendèlèèlè kacitukù to. Mwànà ùvwa ne mbangilu, nàнку awu kèna mwà kwikala wa Cyendèlèèlè to.

221 Nudi numòna's, Yèyè udi Nzambì wa Cyendèlèèlè, kí mmwànà wa Cyendèlèèlè to. Butùmbi's wè! Wa Bukolè bwònsò, Yèhowàh-yilè, Yèhowàh-laafa, mumwènèshìibwe mu mubidi: "Munda Mwèndè mùvwa musòmbèle kaabujimà kàà Bunzambì mu mùshindù wà mubidi."

222 Nènku mu Ditukù dyà Mpenta, pàakapwekà Dikunji dyà Kapyà adi pa bantu, nuvwaku bamòne ne, DyàkaDyàbanya anyi? Ne ndimi yà Kapyà yàkasòmba pamutù pàà muntu ne muntu wa kudibo. Kapyà, bu ndimi, kusòmba pamutù pàà muntu ne muntu. Civwa Nzambì wenza ncinyi? ÙDyàbanya Yèyè mwine mu Èkèleeziyà, kùdì muntu ne muntu, ùpèèsha bakàjì, balùme,

ne bônso bàà kudibo abu; cìvwa bitùpà byà Nyumà Wendè, ùDipandulula munkaci mwà Èkèleeziyà Wendè.

223 Mmunyi mùdi muntu mwà kulwa apa ne kwamba ne: “Muntu wa cijila’s m’paapà. Muntu wa cijila’s m’mwepiskòpò”? Muntu wa Cijila n’Kilistò, Nyumà Mwîmpè munda mwètù. Mmunyi mùdi mwà kwamba ne mwena kwitabuuja kèna ne díyì nànsha òmwè dyà kwamba? Muntu ne muntu wa kunùdi ùdi ne cyà dyamba. Muntu ne muntu wa kunùdi ùdi ne mudimu wa kwenza. Muntu ne muntu wa kunùdi ùdi ne cyà kutwàla Mukenji. Butùmbi’s wè!

224 Nyumà Mwîmpè wàkaDyàbanya mu Ditùkù dyà Mpenta. Nzambi, ùDyàbanya. “Mu ditùkù adi nenùmanye ne Mémè ndi munda mwà Taatù, Taatù munda Mwànyi; Mémè munda mwènù, ne nwènù munda Mwànyi.”

225 “Ditùkù adi,” Nyumà Mwîmpè, “kumutù kwà bônso, munda mwà bônso, mu bônso.” Amen. Ke cyòci aci’s. Nyumà Mwîmpè ùdi ne bukenji bwà kuya mwaba kanà wónso wùdiYè muswè kuya awu, pa muntu kanà yónso udiYè muswè kuyapu awu. Kabyèna bikèngela bwà wèwè kwangata cidi mwepiskòpò kampànda anyi nsaserdosè kampànda wamba to. Yèyè ki Mwakwidi wetù umwèpelè, cyà bushùwà, Mwakwidi Munene. Mpindyewu: Mupròfetà, Mwakwidi, ne Mfùmù.

226 Mpindyewu:

*Nènku . . . Yesù Kilistò, yèyè udi ntèmù wa lulamatu awu, . . . mwàn’ à-butè wa bafwè, . . . (Netùbwele mu cyòci aci.) . . . ne mfùmù wa bafùmù bàà pa buloba. Kùdi ewu wàkatùnanga, ne kutùsukula ku mpèkaatù yètù mu mashi èndè yèyè mwine,*

227 Mwaku awu *musukula* mwaba awu, mu bushùwà bwà bwalu, mu cyena Ngelika, mbwena kwamba ne “kusùulula.” Yèyè wàkatùsùulula ku yètù. . . Twètù tuvwa baswikila ku buloba, kùdi mpèkaatù wetù. Katùvwakù mwà kumòna to, katùvwakù mwà kuumvwa nànsha, katùvwa nànsha ne cingenyingenyi cyà Dyulu anyi nì ncinyi to. Kàdi pàakalwà Mashi panshi, Akakòsa munyololo ne twètù kusùuludiibwa. Kaa!

228 Ngàkabala bwalu bulonda kampànda musangu mukwàbò, cidi . . . cidi mwà kukumbana mwab’ewu mene. Cidime kampànda wàkakwàta cicololò kàdi yèyè kuciswika ku mwonji. Ki kwambayè ne: “Nèmpeeshè bikololò bikwàboò dileesòna.” Ki kuswikaye cicololò cya kale aci, lwà ku mukòlò, ne nshinga kampànda, ne cikwàcikwètù aci kwamba kufwà lwà nzala’s. Kucyòkaci èyo, kacicyi mwà kunyunguluka mwab’awu to.

229 Aci’s ki cidi, àmwè à ku malongolodi aa ne èkèleeziyà eyi myenze, mmiswikile bantu panshi ku myonji. “Ànu ne kwèna mwà! Èè, *ebu* ke bule bwónso bùdi mwà kwendela. Matùkù à bishima akaadi mamane kupita.” Èyowà. Udi ànu muswikilbwe’s. Kwajiki. “Cintu pàaci ne n’Nyumà Mwîmpè

kacitukù to. Yèyè kàtu wàkula mu myakulu muvwaYe ne ciibidilu cyà kwakula amu to.”

<sup>230</sup> Yèyè’s ùdi Nzambi. “Yèyè ùdi ànu umwèumwè awu makèèlèlà, leelù, too ne kashidi,” Ebèlu 13:8, mwikale ne mwoyi mu èkèleeziyà yònsò. Netùkùfikè paanyimà pàà dishindamija dyà mu dindà emu edi. Nwamònu anyi? Yèyè’s ùdi Nzambi, udi ne mwoyi mu cikondo cyònsò cyà èkèleeziyà. Neikale ne mwoyi mu cikondo cyònsò cyà èkèleeziyà, ne neikale ne mwoyi munda mwà bantu Bèndè bu. . . bwà Cyendèlèlè. Bwalu tudi mpindyewu, munda mwètù, ne Mwoyi wà Cyendèlèlè.

<sup>231</sup> Pa nàнку, dingumba edi divwa dimuswikile panshi, nwamònu’s, “Èè, matùkù à bishimà àkaadi mamane kupita. Cintu pàaci ne ndyondopa dyà kùdi Nzambi kacituku to.” Cikwacikwètù cikulakaji cikwàte ne byà luse aci kutètukaci mu mùshindù wà ne cikaavwa cicyòke menemene kàcìcìyi ne mùshindù wà kwenda to.

<sup>232</sup> Ke dīngà ditùkù kupicilaku muntu mwìmpè mwaba awu, e kwambaye ne: “Udi mumanye’s, cikòlolò cyà kale cikwàte luse aci, ndi ncyùmvwila luse be. Ndekeelu wa byònsò, cìvwa cìfwànyine kwikala cidya matalà èndè awu, kàdi’s ke mùshindù umwèpelè ùdici cishààla ne mwoyi. Bikèngela ciikaleku ne cintu cyà kudyà’s. Pa nàнку kacìvwa ne cikwàbò cyà dyenza to, cidi ànu cipatuka mwaba awu bwà kupetaku matalà. Pa nàнку pìkàla. . .” Pashìshe kwangatayè wèndè. . . kwangatayè keele kèndè ne kukòsa myonji yà cikòlolò cyà kale aci kucilekelela.

<sup>233</sup> Nèнку nudi bamanye’s, ki bikòlolò bikwàbò bìlwalwà ebi, bilwa mwab’awu, byàmba ne: “Lwàku kunu, Johnny Cikòlolò. Lwa tuye ku Sud. Cipeepèlè cyà mashika cilwalwa.”

<sup>234</sup> Nudi bamanyè mùdi bwalu anyi? Cikòlolò aci cìvwa ànu cìfwànyine kuya mu ntàntà ùvwaci paaci mwà kuya kashìkidila awu’s. Cyòci ne: “Ncyèna mwà kukòòkeshaku to. Kabyàkukumbanaku to, kabyena ànu bwètù twètù mu ditùkù edi to. Katwèna—katwèna ànu mwà kucyènta to.” Nwamònu anyi? Cikaavwa ciswikìibwe ntàntà mule menemene, mu mùshindù wa ne cikaavwa ànu cyèla meeji ne cicidi ànu ciswikìibwe. Nwamònu anyi?

<sup>235</sup> Nèнку mùshindù awu ke ùdi bantu bààbùngì, nudi baswikila panshi ne twìtabàayi ne màngumba, kubangila ànu ku maamù ndumba wa kale kwàka, ùnwàmbila, ne: “Yesù Kilistò kèna umwèumwè awu to. Ne cintu pàaci ne ndyondopa kacitukù to. Dibatiiza dyà Nyumà Mwìmpè kaditukù to. Kakwènakù nànsha cìmwè cyà ku bintu bu nàнку to.” Ûteeta kukwambilabi. Nudi baswikìibwe ntàntà mule be mu mùshindù wà ne nucìdi ànu nwela meeji ne nudi baswikìibwe’s.

<sup>236</sup> Muntu mwìmpè, Kilistò, wàkafila Mashi Èndè bwà Wàmòna mwà kutùsukula ne kutùsùulula ku mpèkaatù wetù. Mpèkaatù ncinyi? Ndi ndomba muntu kanà yònsò bwà kungambila.

Mpèkaatù ncinyi? *Mpèkaatù* “mbupidyà.” Ncyà bushùwà. “Ewu udi kàyi wítabuujà mmumane kupiishiibwa.”

<sup>237</sup> Nènku mpèkaatù webè ki cintu cìmwèpèlè cìdi cikupangisha bwà kwikala mudishikamine. Ànu bwalu Nzambi mmunùsùulule ku bupidyà bwènù, kàdi nudi baswikiibwe bikole ne twítabààyi mu mùshindù wà ne nucìdi ànu nwela meeji ne nudi baswikiibwe’s. Biikale ànu bafwa ne nzala, nwamònu’s, batètukangana ne: “Mémè ndi Presbytérien. Ndi Méthodiste. Ndi Baptiste. Bàdi bàngambila ne (Mémè ndi Église de Christ) ne: ‘Matùkù à bishimà akaadi mamane kupita. Cintu bu nànkù kacitukù to.’”

<sup>238</sup> Wèwè cikòlòlò cikwàte ne luse wè! Cyùdi kùyì ulwilà mu dindà emu mbwà cinyi’s? Bwà cinyi kwèna ubùuka uya’s? Àlèluuyàh! “Juuka ne mapwàpwà à dindà, bùuka uye mutangile ku Dìbà dyà Bwakàne, ne dyondopa mu mapwàpwà Àadi.” Amen. Ki cyôci aci. Ki cyôci aci, mwanèètù wa balùme, mwanèètù wa bakàji. Kaa! “Ewu udi Mwànà mupe budishikaminyi, mmushàale mudishikàmine ànu byà menemene ebi.” Èyowà’s, mukalenge!

<sup>239</sup> “Èè, mpaasàtà wanyi. . .” Aci ncyèna naaci bwalu nànsha bùmwè to. Bible mmwambe ne: “Udi mudishikàmine.” Ncyà bushùwà. Udi mudishikàmine.

“Èkèleeziyà wanyi. . .”

<sup>240</sup> Èè, sùulukààyi. “Wàkatùsukula ne kutùsùulula ku mangumba etù, mu Mashi Èndè Yèyè mwine,” ne mutùvwije badishikàmine mu mùshindù wà bafwànyine kudyèlela meeji, ne kudyenzela, ne kudyakwila, ne kudyenzela maalu.

<sup>241</sup> “Èè, bu mémè mwà kwalukila ne kwambila mpaasàtà ne bìvwa bikèngela bwà mémè kubatiijibwa cyàkàbìdi, nùnkù yèyè’s. . .”

<sup>242</sup> Kàdi bishi bwà ne: “Udi mudishikàmine”? Eci ndibuulula, nudi bamanye’s. Èyo. Udi mudishikàmine.

<sup>243</sup> Pawikala mummyamina màyi pamutù à mu kààsù kàà mukele mùshindù ewu, mu dìnà dyà “Taatù, Mwànà, ne Nyuma Mwimpè,” ciinà cyà màyi ncyôci eci citèeka mwab’ewu, cìlongolola mu dindà emu, ciikàle ne màyi munda. Nwamònu anyi? Èyowà’s, mukalenge. Ki mmwômò to.

<sup>244</sup> Pa nànkù, kwèna kàbìdi muswikiibwe to. Udi mudishikàmine, kàdi pàmwàpa kwèna mucimanye to. Kàdi lekelaayi nnwàmbilè mu dindà emu, Bible mmwambe ne: “Yèyè mmutùsùulule ku mpèkaatù yetù, ku bupidyà bwètù, bwà twàmòna mwà kupeta Dibuulula dyà Yesù Kilistò.” Umuka uye, mudishikàmine! . . . bikaadi bikèngela kwangata cìdi èkèleeziyà kanà yònsò wamba pa Bwalu abu. Angata cìdi Nzambi mwambe pa Bwalu abu. Dibuulula Dyèndè ndyòdi edi munkaci mwà kubuulula CìdiYe Yèyè aci’s.

245 “Mvwa misangu yônsò ànu mwitabuuje ne Nzambì Taatù ùvwa ne mwedì mule, mutòòke, ne nsuki mitòòke; ne Mwànà awu uvwa muntu mushindame; ne Nyumà Mwímpè uvwa mwànà wa balùme wa kutuma wa majimbu.” Mwaneèètù, aci’s mbumpangaanu. Aci’s mbumpangaanu pawikala witabuuja Nzambì yisàtù.

246 Dìyì ditùma dyà kumpàla, Dìyì ditùma dyà kumpàla ncinyì? “Teelejàayi, Éyì Izalèlèlè: Mémè ndi MUKALENGE Nzambì webè, Nzambì umwèpelè.” Ki cyòci aci.

247 Yèyè udi Nzambì umwèpelè, kí nzambì yisàtù to. Ùvwa musòmbèle mu midimu yisatu, mukwacile mudimu mu myaba yisatu. Yèyè ùdi Mupròfeta, Mwakwidi, ne Mfùmù. Yèyè ùdi Mukanku, Mwànà wa mùkòòkò, ne—ne Ntambwe. Yèyè ùdi Mbata wa mu Cibanda, Rose wa Shalòna, Mbata wa mu Cibanda, ne Mutòòtò wà mu Dindà, Muji ne Mùtoloku wà Davidi. Yèyè ùdi kuumukila ku A too ne ku Z. Yèyè ùdi Taatù, Mwànà, ne Nyumà Mwímpè. Yèyè ùdi byònsò abi, kàdi Yèyè ùdi Umwe. Yèyè ùdi Nzambì umwèpelè. Ayi mmyànzu Yèndè yidì miMukumbanyine, kàdi kùdi Nzambì umwèpelè.

248 Kacya muntu nànsha umwe, dibèji nànsha dimwè dyà mu Bible anyì mu maalu-malonda, too ne ku èkèleeziyà wa Kàtòlikè, katuku mubàtìijìibwe mu diinyijìibwa mu màyi mu dìnà dyà “Taatù, Mwànà, Nyumà Mwímpè to.”

249 Nwènù mwà kundeeja dibèji anyì cintu nànsha cimwè, ucifunde, ucinshiile mwab’ewu, dilòlòlò edi, nènku nèmputukè mu èkèleeziyà emu, ngàmbe ne: “Mémè ndi mwena lubombo; ndi mulongeshe bantu mashimi.” Nwènù mwà kundeeja mufundu umwèpelè wà Mifundu, anyì nuntwadileku bwalu-bulonda bumwèpelè, bwalu-bulonda bwena diinà, bwikala mwà kundeeja ne mmwaba kaayi ukaadiku bantu babàtìijìibwe, mu Bible emu, mu dìnà dyà “Taatù, Mwànà, Nyumà Mwímpè.” Anyi, ntwadilaayi Mufundu umw-...anyì, mukàndà wà maalu-malonda umwèpelè, dibèji dimwèpelè, dìyì dyamba dimwèpelè mu maalu-malonda, mùdiku muntu nànsha umwe mubàtìijìibwe mu dìnà dyà “Taatù, Mwànà, Nyumà Mwímpè,” too ne ku Nsangilu wa Nicée wa èkèleeziyà wa Kàtòlikè. Lwâyi, nucintwadileku; nènku nëndamike citaata paanyimà pàanyi apa ne kwenda mu Jeffersonville mujimà emu, ne nwènù munyimà mwànyì ne mpungi, nwenda nwela. Nèmfundepù ne: “Mupròfeta wa mashimi, ùpambwisha bantu.”

250 Nènku, mpaasàtà, pawikala kaaba aka mu dindà emu, udi mufwànyine kwenza nànkù, bivwa bikèngela bwà wèwè kungitabila bwà kukwenzela nànkù’s. Nwamònu anyì? Lwâku, undeeje. Kàdi’s ngwèwè awu uciina.

251 Mpindyewu, ncinyì aci? *Eci* s’ki Dibuulula. *Eci* s’ki Dibuulula. Nènku eci s’ki Nyumà Mwímpè, Kilistò, munkaci



mwà kutùma Mukenji Wëndè kùdì maèkèleeziyà. Ùtèèlejaayi. Ùtèèlejaayi. Ki cìdì Bible alongesha.

<sup>252</sup> Cyàkabwelela penyi? Bu nwênù ànu kanùyì mwà kufiika munda to, kanùyì batentemukeku, munda mwà lumingu elu, nudi—nudi nupeta Nsangilu yà Nicée ayi's. Angataayi mukàndà wà *Baabùlònà Yìbidì* wà Hislop. Angataayi. . .

<sup>253</sup> Mpindyewu, bwalu-bulonda bwà Josèphe mbulelèlè, kàdì yèyè wàkafùnda ànu kasaka kàmwpèlè bwà Kilistò, wàmba ne: “Kuvwa muntu dìnà dyèndè Yesù uvwa wendakana eku ne eku, wòndopa bantu. Ne—ne yèyè wàkafwà, anyi, to, Pilaatù wàkamushebeya, ne—ne, anyi Helòode, anyi wàkamushebeya. Ki pashiishe bayiidi kuyabo kwiba mubidi wèndè, ne kuwùsokokabò. Nènku pashiishe dilòlò dyònsò bàyaaya kàdì kukosa katùpà kàwù ne bàkadya.” Yèyè ne: “Bavwa badì bàà munyiinyi wà bantu's.” Kàdì pàabi's, bavwa bangata mèèsà à Mukalenge, nudi numòna's. Meeji à musunya! Josèphe awu kì mmuntu wa kutèèlejakù to.

<sup>254</sup> Kàdì angataayi *Mukàndà Wà Bafwìle Dìitabuujà Wà Foxe*. Ke mwìmpè ùdiku ne wà bushùwà's. *Mukàndà Wà Bafwìle Dìitabuujà Wà Foxe*, mbanganyi bàkààdiku bawùbale? Bushùwà. *Bikondo Byà Mbangilu* byà Pember, anyi—anyi *Baabùlònà Yìbidì* yà Hislop, anyi—anyi ùmwè munène wà mujaadikiibwe. Anyi, mutàmbe—mutàmbe bunène utùdì nawu s'ke Nsangilu wa Nicée, Nsangilu mudyanjidile Nicée ne Nsangilu wa Nicée. Nènku nènùsanganemu ne, aci kacya kacyakatèèdiibwaku to, kùdì muntu nànsha umwe.

<sup>255</sup> Angataayi Mifùndu Minsantu bwà numòne ní kùkaatukù muntu kampànda mu Bible emu ukààdikù mubatìijìbwe, bàkwàta mudimu ne myànzù ayi, dìnà dyà “Taatù, Mwànà, ne Nyumà Mwìmpè.” Bidi byàmba nzambi yisàtù. Abi mbwà dyenza dyà musingà wà bampàngaanu. Nènku cyena Kàtòlikè kì cingà cintu pa buloba to ànu mmwè—mmwènekèlu wa cimpàngaanu wa bwena Kilistò. Nènku ku èkèleeziyà wa Kàtòlikè kulwakù Martin Luther, John Wesley, Baptiste, ba-Presbytériens, ne bakwàbò.

<sup>256</sup> Kàdì mu matùkù à ndekeelu kuvwa ciibi citèèkiibwe pankaci apu, cyòci ke cyàkakàngulà Bulelèlè cyàkàbìdì, ne: “Bible ngudi mwambe nànkù,” ne mupròfetà munène uvwa ne cyà kulwa pa buloba mu matùkù à ndekeelu. Nènku tudi twitabuujà ne yèyè ulwalwa. Tangilàayi. Nènku yèyè neikale ne Èkèleeziyà. Mpindyewu, netùmòne cyòci eci.

<sup>257</sup> Mpindyewu—mpindyewu, vùlukàayi ne, eci n'Dibuulula. Kwèna mwà kuumushilaKu to. Mpindyewu, nkadyombo kaayi aka's wè! Petàayi muntu umwèpèlè mu Bible, mwaba nànsha ùmwè ukaadibuku babàtiizè muntu mu dìnà dyà “Taatù, Mwànà, Nyumà Mwìmpè,” anyi mene bamyamineku muntu kampànda màyi pa mutù, petàayiku aci mu Bible, bwà

dilekelediibwa dyà mpèkaatù yààbo. Kacya kabàtukù banji kucyènza to. Nènku muntu yònsò, nànsha bôbò bamubàtiizè bishi, ùvwa ne cyà kulwa e kubatijiibwa, cyàkàbidì, mu Dîna dyà “Yesù Kilistò,” bwà kupetaye Nyumà Mwîmpè.

<sup>258</sup> Byenzedi 19: “Pòlò kupicilaye ku nseke mitùmbùke yà ku Efèso, kusanganaye bayiidi kampànda.” Yèyè ne... Bayiidi, bavwa munkaci mwà kwenza disangisha dinène. Bavwa benda balonda muntu kampànda dîna dyèndè Apòlò, uvwa mwakwidyanganyi mukùdimune mucima; Baptiste uvwa mwitabuuje Yone Mubatiiji, ne mwikale ujaadika ku Mifundu ne Yesù nguvwa Kilistò awu.

<sup>259</sup> Pòlò kupicilaye mwaba awu e kumònaye Akùlà ne Piisikilà, mu nshapità wa 18 wa Byenzedi. Ki pashiishe kuyaye bwà kudya cyàkudya cyà mundaamuunya, anyi cintu kampànda cikwàbò, ne Akùlà ne Piisikilà. Kumwambilabò bwà mwine muntu munène ewu. Kuyabò bwà kamutèeleja. Yèyè kumutèeleja dilòlò adi. Yèyè ne: “Ùdi bîmpè be. Abi’s mbilenga be. Abi’s mbîmpè. Kàdi,” yèyè ne, “nukàadi bapete Nyumà Mwîmpè kacya nwítabuujà anyi?”

<sup>260</sup> Kàdi nwênù ba-Baptistes bakwàte ne byà luse bàdì pààpa baba, bàdì nwela meeji ne nudi bapete Nyumà Mwîmpè *panùdì* nwitabuujà apu?

Yèyè ne: “Nwàkapeta Nyumà Mwîmpè *kacya* nwítabuujà anyi?”

Muntu kampànda kwamba ne: “Aci kacivwa cifùnda amu to.”

<sup>261</sup> Ndi ngeela aci kadyòmbò. Ndi ne nkudimwinu wà cyena Ngelika mujaadika mwab’ewu mene’s, ne cyena Ebèlu, kàbidì. Bible ùdi wamba mu cyena Ngelika, ne byònsò bibìdì, cyena Ebèlu, ne kàbidì mu ci-Alàmàyikà. Mu byòbi byònsò bisàtù abi, ndi naabi mwab’ewu mene, mbàmbe ne: “Nwakapeta Nyumà Mwîmpè *kacya* nwítabuujà anyi?” Ncyà bushùwà. “Nwakapeta Nyumà Mwîmpè *kacya* nwítabuujà anyi?”

<sup>262</sup> Mpindyewu, yèyè ne: “Katwèna bamanyeku ne Nyumà Mwîmpè ùtukù to.”

Ki yèyè ne: “Nwàkabàtiijiibwa mu dibatiiza kaayi?”

<sup>263</sup> Bôbò ne: “Twètù tukaadi bamane kubatijiibwa kùdì muntu wàkabàtiiza Mukalenge Yesù Kilistò awu. Twètù tudi babàtiijiibwe mu dibatiiza dyà Yone,” mu ciina cìmwècìmwè cyà mâyi aci, pàmwàpa, “muntu umweumwe awu.”

<sup>264</sup> Pòlò wàkamba ne: “Aci kacyàkukùmbanakù to. Wàkabatiiza ànu bwà kanyinganyinga cyanàànà, kacivwa bwà dilekelediibwa dyà mpèkaatù nànsha.”

<sup>265</sup> Mpindyewu, bàmwè bàà ku nwênù ba-Unitaires bàdì balwa mwab’awu ne—ne babàtiize nàнку, bibì. Nudi nubatiiza nàнку, bwà lupandu. Mâyì kaèna asungila muntu to; m’Mashi,

kanyinganyinga. Kí mmu dibatiiza bwà difùkùludiibwa to. To, mukalenge. Difùkùludiibwa dilwalwa ku Nyumà. Dibatiiza didi—didi ncyenzi cyà patòòke cyà mudimu wà difùkùludiibwa udi wenzeka munda. Nwamònu anyi? Èyo. Mònaayi.

<sup>266</sup> Yèyè ne: “Nwakapeta Nyumà Mwîmpè kacya nwítabuujja anyi?” Bòbò ne . . .

Yèyè ne: “Katwèna bamanye ne Nyumà Mwîmpè ùtukù to.”

Yèyè kwamba ne: “Nwènú nwákabàtìijìibwa bìshi?”

Bwòbò ne: “Twètù tudi babàtìijìibwe mu Yone.”

<sup>267</sup> Wákamba ne: “Bulelèlà Yone wákabàtìiza bwà kanyinganyinga, bwà kanyinganyinga, wamba ne ‘bivwa bìkèngela bwà nwènú kuMwítabuujja Yèyè,’ Mwànà wa mùkòòkò awu, Mulàmbu ùvwa ne cyà kulwa, Mukalenge Yesù Kilistò.” Nènkù pààkumvabò cyòci eci, bààkabàtìijìibwa cyàkàbìdì mu Dìná dyà Yesù Kilistò. Ki Pòlò kubàtentekelayè byanza ne kupetabò Nyumà Mwîmpè, ne kwakulabò mu myakulu ne kwambabò cipròfetà.

<sup>268</sup> Ngambilaayaaku aci ne kí m’Mufundu to, ne nundeeje mwaba kampànda mukwàbò, ùkààtùku muntu kanà yònsò ewu mubàtìijìibwe mungà mùshindù mu Dipungila Dipyadipyà pa kuumusha mu Dìná dyà Mukalenge Yesù Kilistò. Ndeejayai.

<sup>269</sup> Munsantu Agàbò ne bààbùngì, kùvwa bakwàbò, bààkabàtìijìibwa too ne ku cikondo cyà—cyà Nsangilu wa Nicée, ne yònsò wa kùdìbò wákabàtìijìibwa mu Dìná dyà Yesù Kilistò. Ba-missionnaires bààkabundulula madimi à bwambi ne Dìná dyà Yesù Kilistò.

<sup>270</sup> Kàdi pààkalwa Nsangilu wa Nicée, byàkakèngela bìikale ne nzambi yisàtù. Kuumushabò Pòlò . . . anyi kuumushabò Jupiter, kàdi kwalujabò Pòlò pa kaaba kèndè aku. Kuumushabò Venus, ne kutèèkabò Mariyà pa kaaba kèndè aku’s. Bavwa ne nzambi yà mìshindù yònsò, bansantu bàà mìshindù yònsò ne bikwàbò byònsò, ne kwenza dibatiiza dyà busatu ne kudidiisha beena Mishòonyi. Ne bàcidi ànu batungunuka ne kucisùkumina.

<sup>271</sup> Kàdi Makènkè à dilòòlò àfikì mpindyewu. Mupròfetà wákamba ne: “Nekwikalè Bukènkè ku ìbaamulòòlò.”

Nekwikalè—nekwikalè Bukènkè ku ìbaamulòòlò,

Kajila kàà ku Butumbi nenùkàpetè bushùwà;

Mu njila wa màyi, ki Bukènkè leelù ewu,

Bajijika mu Dìná dyà mushinga dyà Yesù.

Bànà ne bakolè, nyingàlalaayi ku mpèkaatù yènú yònsò,

Nyumà Mwîmpè neàbwele bushùwà;

Makènkè à dilòòlò àfikì,

Mbulelèlà ne Nzambi ne Kilistò bàdi Umwe.

272 Nudi nuCìitabuuja anyi? Peetèlo wàkamba, mu Ditùkù dyà Mpenta ne: “Eci cìmanyiibwè, kunùdi nwènù, nzùbu wa Izalèlèlè, ne Nzambì mmwenze Yesù umwèumwè ewu, Unùdi bapoopèlè pa nkùruse ewu, byònsò bibìdi Mukalenge ne Kilistò;” mvensa wa 16 wa nshapità mwi2. Èyowà. “Nzambì mmwenze Yesù umwèumwe ewu, Unùdi bapoopèlè pa nkùruse ewu, byònsò bibìdi Mukalenge ne Kilistò. Nzùbu mujimà wa Izalèlèlè amanye, ne ditwishiibwa dyònsò.”

273 Mvwa nyiikila ne mwena Yuda kampànda ànu àbìdi àdì panshi aa, mu Nzùbu wa Davìdi emu, kwambaye ne: “Nwènù bantu bàà Bisàmbà byà bendè kanwèna mwà kukosolola Nzambì mu bitùpà bisàtu kàdi kuMupa mwena Yuda to. Twètù tudi bamanye bìmpè bipite abi.”

274 Mémè ne: “Cìdi ànu aci, Laabi. Katwèna tukosa Nzambì mu bitùpà bisàtu to.” Mémè ne: “Utu witabuuja baprófetà anyi?”

Yèyè ne: “Cyà bushùwà’s.”

Mémè ne: “Udi witabuuja Yeshàayi 9:6 anyi?”

Yèyè ne: “Èyowà.”

Mémè ne: “Uvwa muprófetà wàmba awu nganyi?”

“Maasiyà.”

Mémè ne: “Mbulelè kaayi bwìkalà Maasiyà naabu ne Nzambì?”

Yèyè ne: “Yèyè neìkalè Nzambì.”

Mémè ne: “Aci ncyà bushùwà.” Amen.

Nwamònu’s, s’ki bwalu abu’s. Nwamònu’s, kanwèna mwà kuMukòsa mu bitùpà bisàtù to.

275 Nwènù ba-missionnaires bàdi mwaba ewu aba... Umwe wa kudibo ùyaaya kùdi beena Yuda, ngeela meeji, muntu udi musòmbe *apa* ewu. Kudìdingiku bwà kupèèsha mwena Yuda nànsha umwe “Taatu, Mwànà, ne Nyumà Mwìmpè to”. Neàkwàmbilè ne lukasa lwònsò ne, mmumanye kùdìci cifumina ne: “Nsangilu wa Nicée.” Yèyè kààkutèèlejakù aci to. Kàdi mufikishe ku dimòna mwaba ùvwa Nzambì muvwijìbwe mubidi, ne Yèyè ke Nzambì umwèpelè udiku. Nzambì, muvwijìbwe mubidi mu mmwenekelu wa buntu ne musòmbele munkaci mwètù, bwà kutujidila; kuumusha, bwà Yèyè mwine Wàmòna mwà kulwa mu mmwenekelu wa Nyumà Mwìmpè. Nzambì, Taatu, Nyumà Mwìmpè, m’Mupèrsona umwèumwè awu.

276 Bible mmwambe mu—mu dilondangana dyà bankambwa bàà Yesù Kilistò, mu nshapità wa 1 wa Maataayi, Mmwambe ne: “Abraham wàkalela Izàkà. Izàkà wàkalela Yakòbò.” Wenda utungunuka ànu nànkù, wamba, ne pashiishe mu... Ngánjìbi kucibala tǔng, nènku dìbà adi mpindyewu nènùshiishè kumanya

cîndi munkaci mwà kwakula. Maataàyi, nshapitá wa 1. Nènku netwikalè. . . Mpindyewu tubangilaayi ku mvensa wa 18.

*Mpindyewu dilediibwa dyà Yesù Kilistò dyàkenzeka mùshindù ewu: Pàvwà. . . mamw'Èndè Mariyà mubangila kùdì Yòzefù, kumpàla kwà kushààlabo pàmwè, wàkasanganyiibwa ne difù. . .*

277 “Nzambi Taatù anyi”? Aci cìdi cìbàdiibwa mùshindù awu anyi? [Disangisha didi dyàmba ne: “To.”—Muf.] Musangana ne Difù dyà Nganyi? [“Nyumà Mwímpè.”] Kùdì. . . [Katùpà kàà mukàbà wà mèyi munda mutupu.] S'mvwa ngeela meeji ne Nzambi Taatù ki Tatw'Èndè? Dìbà adi, Nzambi, Taatù ne Nyumà Mwímpè, bàdi Nyumà umweumwe awu, anyi Ûvwa ne Baataatù bàbìdi.

*Pashiishe Yòzefù bàyendè, bu mùvwàye muntu mujaalàme, . . . kabiyi ku budiswile bwà kumufwìshaye bundu, ùvwa wela meeji. . . kumubengaye mu musokoko.*

*Kàdi pàcìvwàye wèlangana meeji pa maalu aa, mònaayi ne, mwanjèlò wa Mukalenge wàkamumwènekela mu cilòòtà, wàmba ne: Yòzefù, wèwè mwànà wa Davidi, kuciinyi nànsha. . . angatà Màriyà mukajèèbè, bwalu udi mwimita munda mwèndè awu ngwa kùdì. . .*

278 “Nzambi Taatù anyi”? Huh? [Disangisha didi dyàmba ne: “To. ‘Nyumà Mwímpè.’”—Muf.] “Nyumà Mwímpè.” Dìbà adi Nganyi uvwa Tatw'Èndè wa Yesù Kilistò? [“Nyumà Mwímpè.”] Nyumà Mwímpè. Ncinyi cìdi munda mwèbè? [“Nyumà Mwímpè.”] Èè, aci's n'Nzambi, Taatù awu, kàbìdi's. Ki mmwòmò anyi? Bushùwà's.

*Nènku yéyè nèalèlè mwànà wa balùme, nènku wèwè nèumwinyike dìnà dyèndè YESÙ: . . .*

279 Nzambi Taatù nyéyè ewu, Nzambi Nyumà Mwímpè nyéyè ewu, ne ki Nzambi Mwànà nyéyè ewu, nwamònu's, ki Nzambi yisatù nyóyi ayi's. Bible kèna wàmba nànkù to. Bikèngela bàbìdi aba bìikale bàà mwomùmwè, cyanàànà Yéyè uvwa ne baataatù bàbìdi. Nwamònu anyi? Yéyè kèna mwà kwikala ne baataatù bàbìdi to. Aci kaayi nudi bamanye.

*Mpindyewu, yéyè nèalèlè mwànà wa balùme, nènku bôbò nèbàmwinyike dìnà ne YESÙ: bwalu yéyè ki wàsungila cisàmbà cyèndè ku mpèkaatù yàbò.*

*Mpindyewu byònsò ebi byàkenzeka, bwà kumònabi mwà kuuja cìvwà cyakula kùdì Mukalenge ku mupròfetà, wàmba ne:*

*. . . virgo nèimite, ne nèalèlè mwànà wa balùme, ne nèbàmwinyike dìnà ne Emanùwèlè, cìdi ku dyumvwija cyàmba ne, Nzambi neetù.*

280 Ki nshapità wa 1 wa Maataàyi nyèyè awu's.

281 Maataàyi 28:19, mùdi Yesù mwambe ne: “Ndaayi, nubatiize mu Dinà dyà Taatù, Mwànà, ne Nyumà Mwímpè.” Dinà dyà Taatù, Mwànà, Nyumà Mwímpè ncinyi? Yesù Kilistò, mu bushùwà bwà bwalu's.

282 Udi ubala bwalu bulonda bwà dinanga, bwàmba ne: “John ne Marie bavwa ne nsòmbelu wa disànkà pashìishe.” John ne Marie mbanganyi? Alùkila ku mbangilu wa bwalu-bulonda abu, bwà ucijandule's.

283 Kòkù kakùyi cintu bu nànkù to, kakùyi dìnà dyà: “Taatù, Mwànà, anyi Nyumà Mwímpè,” dībà adi Nganyi, Dinà adi ndyà Nganyi? Alùkila, ku mbangilu wa bwalu-bulonda abu, bwà umòne ne Mwena bwalu bùvwàbo bààkula Nganyi.

284 Peetèlo, mu Ditùkù dyà Mpenta, wàkamba ne: “Nyingàlalaayi, muntu ne muntu wa kunùdi, nubatiijibwe mu Dinà dyà 'Yesù Kilistò' bwà dilekelediibwa dyà mpèkaatù.” Úvwa ne dibuulula.

Yone uvwa ne dibuulula.

285 Yesù uvwa Dibuuulula adi, Yèyè wàkaDipatula mwab'ewu mene mu Mifundu ne: “Mémè ki Ewu wàkadiku, udiku, ne wálwa, wa Bukolè bwònsò.” Yoyòyò! Èyo.

286 Mpindyewu, twàngatàayi mvensa wa 7, ne lukasalukasa mpindyewu, kumpàla kwà twètù kupatuka, ne lukasa ne mwètù mwònsò. Wa Bukolè bwònsò.

*. . .bukòòkes-. . .butùmbi ne bukòòkeshi bwà kashidi ne kashidi. Amen.*

*Ne. . .mmutuwije bamfùmù ne baakwidi bwà Nzambi. . .Tatwëndè; ne kùdiye kwikale butùmbi ne bukòòkeshi bwà kashidi ne kashidi. Amen.*

287 Nudi numòna dibuulula adi mwaba awu, mùdiDi dibuulùdiibwe anyi? Mùshindù ùdi Nzambi. . .Bantu bàdikoonya mu mitù ne bàdituula nsuki, ne bikwàbò, bàteeta bwà kujandula cidi “Taatù, Mwànà, Nyumà Mwímpè” ne ncinyi, benza yisàtu, mu umwe.

Kwikadi wàditùula nsuki ne wàdikoonya mu mutù to. Banduluka cyanààna. Dibuuulula's didi difumina mu Dyulu. Nènku aci's ncyà bushùwà. Yèyè neàbuulule ne, kî “n'Taatù, Mwànà, ne Nyumà Mwímpè to.” Mmidimu yisàtu yidi Nzambi musòmbèlemu.

288 Yèyè uvwa mu mudimu wà, “Nyumà,” ku Yèyè nkàayende, bwalu muntu wetù ewu awu ùdi wenza bu udi ùdipwekesha milongo, pashìishe Yèyè kuDyenzela mubidi, kusòmbelamù, bwà kupatula Mashì Èndè Yèyè sungasunga; kabiyi ku disangila dyà mulùme ne mukàjì to, bu mwàkadibi mu budimi bwà Edènà amu to, kàdi kupatula mubidi wa mufùka. Nènku ku mubidi

mulela kùdì virgo awu, Yèyè wàkafila Mashì àvwa matùjidile ne matùsùùlule ku bupidyà bwètù, bwà kuMwitabuuja. Dìbà adi, tudi twenza nàнку, tudi tuMupeta mu mwoyi wètù, aci's n'Nzambì munda mwètù; Nzambi: Taatù, Mwànà, ne Nyumà Mwîmpè. Nwamònu anyì? Ànu bu Mupròfetà, Mwakwidi, ne Mfùmù, ki cintu cìmwècìmwè aci. Èyo.

<sup>289</sup> Mpindyewu, mvensa wa 7, eci ndimanyisha. Dimanyisha dìdì ne:

*Mònaayi, yèyè ùdì ùlwa ne matutu; ne dísù dyònsò nedimùmòné, . . . aba kàbìdì bàakamutwà difumà abu: ne bifuku byònsò byà pa buloba nebìdile mwadi bwà bwalu bwèndè.*

<sup>290</sup> Kaa! Tudi ne dìbà bungi kaayi? Abi's mbilenga be mwab'awu. Nudiku mwà kulama tukwàbò tusunsa makumi àsàt- . . . makumi àbìdì anyì? [Disangisha dìdì dyàmba ne: "Èyowà."—Muf.] Nudiku bafwànyine kwenza nàнку anyì? ["Amen."] Èyo. Mpindyewu, dìbà adi, mààlabà. . . Dilòlò edi, netùteetè bwà kwangatakù bikwàbò byà ku *Cisanga Cyà Paatèmò* abi, dilòlò edi. Leelù ewu, netùjikije ne mamanyisha.

<sup>291</sup> Kaa! Nudi badyūmvwè bìmpè anyì? [Disangisha dìdì dyàmba ne: "Amen."—Muf.] Nudi banange Bible wa kale ewu anyì? ["Amen."] N'Dibuulula. Ncinyì, ncinyì ciine aci? Nzambì utùùluka, mu Mukàndà ewu, ne wumusha cibwikilu aci, wàmba ne: "S'ki Yèyè awu: Mupròfetà, Mwakwidi, Mfùmù; Taatù, Mwànà, Nyumà Mwîmpè; Èwu wàkadiku, udiku, ne wàlwa awu. Bintu byònsò ebi, Yèyè ùdì Nzambi."

<sup>292</sup> Mpindyewu, twànji tuumushaayi cibwikilu aci, ànu bwà tusunsa tukesè cyanààná mpindyewu, bu Mukalenge mwà kutùkwacisha, kuumusha cibwikilu aci ku mèsù kwètù. Ne kupeta. . .

*Mònaayi, yèyè ùdì ùlwa ne matutu; . . .*

<sup>293</sup> Mpindyewu, Yèyè ulwalwa bishi? "Ne matutu." Ditutu dyà mùshindù kaayi? Matutu à butùmbi. Ki ndimwè dyà ku mavuba mafìkuluke à citwàla-mvula awu, divuba dyà mvula to, kàdì mmatutu à butùmbi.

<sup>294</sup> Nènùmòne ne nditutu dyà mùshindù kaayi muvwaYe muDìjìngile pàakamòná Peetèlo ne bakwàbò abu cìkèèná-kumòna Cyèndè pa Mukùnà wà Dikudimuka dyà mpala, ditutu dyàkaMubwikila. Bilùlù Byèndè kubàlakanabi. Úvwa mujìngila kùdì ditutu, bukòlè bwà Nzambi.

<sup>295</sup> Kaa, tudi tukafika ku cyôci aci, apa mu bikondo byà èkèleeziyà ebi's. Ndi nzwambila ne, bìdì ànu—bìdì ànu bingoocha ku muntu wànyì wa munda awu, pàndì ngeelaku meeji's. Civwa dilwa Dyèndè. . . Ndi mmòna ditùkù ditùdimu ne mwoyi edi, mùdì kamùyi mushààle kantu nànsha kàmwè, ditekemena nànsha dyà kànà, pa kuumusha Dilwa Dyèndè.

296 Mpindyewu netùfike ku cyôci eci ne lukasa lwônsò. Mpindyewu vùlukàayi.

*. . . dîsù dyônsò nedîmumònè, . . .*

297 Mpindyewu, nènku aci kacivwa Dyambwibwa to, mmwômò anyi? [Disangisha didi dyamba ne: “To.”—Muf.] Nwamònu anyi? Kacivwa Dyambwibwa to. Kacivwa Dyambwibwa to. CivwaYè wakwila aci cinyi? Dilwa dyà cyàkàbìdì.

*. . . ne aba kàbìdì bàakamutwa difùmà abu: ne bifuku byônsò byà pa buloba nèbìdile mwadi bwà bwalu bwèndè.*

298 Mpindyewu netwàlukile bwà kwangata bùmwe bwalu-bulonda. Twàlukilàayi mu Zekàayi, bwà twàngate nshapità wa 12 wa Zekàayi. Zekàayi's. Eyo.

299 “Nènku Mukalenge ùvwà ùsàkidila ku èkèleeziyà ku ditùkù ne ku ditùkù aba bavwà mwà kusungidiibwa abu.” Mùshindù mwine wutùdi ne kusàkidila bwà dibuulula dîmpè dyà Yesù Kilstò's wè! Kwènàku ne disànkà bwà bwalu Bwèndè anyi? Mpindyewu, netwèlè eci mu mmwenekelu wa mukàndà ànu ne lukasa ne mwètù mwônsò, bwà bantu, nènku dîbà adi nudi mwà kucipeta, bwà kucibala mu cinyàànya cyà mu cibambalu cyènù amu ne bikwàbò, kàdi kucilonga, wèwè mwine. Eyo.

300 Zekàayi, Zekàayi awu, nshapità wa 12 mpindyewu wa Zekàayi. Nènku tudi baswè, kwangata eci munkaci mwà disambila mpindyewu. Nènku ndi muswè kwangata eci bwà butumbi bwà Nzambi. Mpindyewu, Zekàayi 12, tubangilàayi ku mvensa wa 9. Teelejàayaaku ne ntema mpindyewu. Udi wakula bwà Dilwa. Zekàayi 12, nènku netùbangile ku mvensa wa 9, mu mvensa wa 9.

*Nènku nebyènzeke ne . . .*

Zekàayi, wamba cipròfetà, bidimu nkàmà yinaayi ne makumi mwandamukùlù ne mwandamutekète kumpalà kwa dilwa dyà Kilstò.

*Nènku nebyènzeke mu ditùkù adi ne, nènkébe mwà kubutula ônsò. . . matunga àlwà kulwisha Yelusàlèma. (Anji elàayiibi meeji pa bwalu abu's.)*

*Nènku mêmè nêngìcikijè pa nzùbu wa Davìdì, ne pa bantu bàdì basòmbèle mu Yelusàlèma, nyumà wa ngàsà ne wa misengeleelu, ne bôbò nebàtàngijè mèsù kùndì mêmè wàkatwabò difùmà, . . .*

301 Mpindyewu, ndìbà kaayi dyàlukila Èvànjeeliyò kùdì beena Yuda? Piikala ditùkù dyà bàà Bisàmbà byà bendè dijike, Èvànjeeliyò ùkaadi pabwìpi, bwà kuya kùdì beena Yuda. Kaa, mvwa mufwànyine, bu mêmè mwà kudyanjila kunwambila kaacintu kampànda kàdi kàmba kwenzeka ànu mwab'ewu mene, nwamònu's, mu ditùkù edi mene. Nudi numòna anyi? Cidi pabwìpi ne kwenzeka. Tudi bacyùmvwè mu Cikondo cyà



Èkèleeziyà. Nènku cintu cinène eci cidi pabwipi ne kwenzeka, necikwobekè too ne ku Bwàkabuulwibwà 11 ne cyàngata baprófetà bábidi abu, Eliyà ne Mósà baàlukila cyàkàbidi bwà beena Yuda. Tudi badilongòlòle bwà cyòci aci. Byònsò mbitèeka mu bulongame, mbimana kulongolola. Mukenji wa bàà Bisàmbà byà bendè ewu, ànu müvwà beena Yuda bawütwadila bàà Bisàmbà byà bendè amu, bàà Bisàmbà byà bendè nebàwalùje cyàkàbidi kùdi beena Yuda. Nènku Dyambwibwa nedilwe.

<sup>302</sup> Mpindyewu vùlukàayi ne, eci cilwalwà eci, paanyimà pàà Dikenga dinène. . . Èkèleeziyà kèna ùpicila mu Dikenga dinène to. Tudi bamanye aci. Bible ngudi mwambe nàнку. Nwamònu anyi? Eyo.

<sup>303</sup> Mpindyewu, Yéyè neàpòngololè pa nzùbu wa Izalèèlà, (cinyi?) Nyumà Mwimpè umwèumwè awu, nwamònu's, paanyimà pàà Èkèleeziyà wa bàà Bisàmbà byà bendè mumane kuya.

*. . . nènku bóbò kutangija mèsù kùndi mèmè wakatùbulabò ne difùmà awu, ne bóbò nebàmudilè, mùdi muntu udi udila mwanèndè umwèpelè wa balùme, ne nebìikalè mu kanyinganyinga bwà bwalu bwèndè, mùdi muntu mu kanyinganyinga bwà mwanààbutè wèndè.*

*Nènku mu ditùkù adi nekwikalè. . . madilu manène mu Yelusàlèma, . . . ne madilu. . . mu—mu cibandabanda cyà Meegidòdòna.*

*Ne—ne ditùnga nedidile, dikù ne dikù dyònsò pa bwàdi; dikù dyà nzùbu wa Davidi pa bwàdi, ne. . . dikù dyà nzùbu wa Natànà pa bwàdi, ne umwe ne umwe wa ku nzùbu pa bwèndè; (pààmònabo, cyenzeka aci, cyenzeka pàalwaYe mu matutu à butùmbi, ku dimwènèka Dyèndè diibidi.)*

<sup>304</sup> Nènku piikala beena Yuda bààkaMutwà difùmà abu. . . Nudi bamanye's, Mufundu mukwàbò ùdi wàmba ne nebàMukonke, mwaba ùvwàYe mupetèle mputà eyi's.

Yéyè ne: “Mu nzùbu wa mulunda Wanyi.”

<sup>305</sup> Nènku kacyàkwikala ànu cikondo cyà madilu bwà beena Yuda nkàyaabò bààkaMubenga, bu Maasiyà abu to, kàdi neciikalè cikondo cyà madilu bwà bàà Bisàmbà byà bendè biikala bashàale paanyimà apa abu, bàdi biitàbe. . . bàdi baMubènge bu Maasiyà wabò wa ditùkù edi abu. Nebiikalè munkaci mwà kudila mwadi ne kudila. Virgo mukùtakàne neikalè munkaci mwà kudila mwadi. Ki èkèleeziyà wàkabènga kwikala ne Maanyi mu bukènkè bwèndè awu. Kuvwa bavirgo dikumi bàkapatuka, bònsò bantu bimpè, kàdi bataanu bà ku bôwò bavwa ne Maanyi mu myèndù yàbò. Bakwàbò bataanu bàvwa bantu bimpè, bantu bimpè, kàdi bapangile bwà kwangata

Maanyì mu myëndù yàbò. “Nènku bàkiipaciibwa mu mîdimà yà pambelu mwikala myadi, ditwà dyà mikemu, ne disumakaja dyà mênù.”

<sup>306</sup> S’ki cyôci eci ne: “Bôbò nebîikalè mu didila dyà mwadi.” Bible mmwambe apa ne: “Bôbò nebîikalè mu didila dyà mwadi, ne myoyi micibùlùke be, mu mùshindù wà ne nànsha . . .”

<sup>307</sup> Mwab’ewu, nênnùpèèshèku mukwàbò, Genèsè 45, panwikalà bàswè kufika ku cyôci aci. Tuyaayiku ànu bwà katancì kakesè cyanààna bwà kubala kàbidì cyôci aci mu Genèsè, kùdì . . . ngeela meeji, ku nshapità wa 45 wa Genèsè. Ndi muswè kwangata eci kaaba aka, Yòzefù ùdimanyisha kùdì bàà—bàà kwàbò. Nènku netùpetè eci, ànu kuleeja bi—bimfwinyi byà ciikalà mwà kwenzeka mu ditùkù adi aci, dîbà adi netùciswikè pàmwè.

*Dìbà adi Yòzefù kàvwa mwà kudikànda yéyè mwine kumpàla kwà . . . aba bàvwà biimane nendè abu to; ne kuboobolayè mwadi, Enzaayi bwà muntu yònsò aye . . . kule naanyi.*

<sup>308</sup> Mpindyewu vùlukàayi ne, Yòzefù, ùdimanyisha, kwelaye lubila ne: “Muntu yònsò ùmuke kumpàla kwànyì.”

*Nènku kakwàkashàalakù muntu nànsha umwe mwimàne pàmwè nendè to, pàvwà Yòzefù ùdimanyisha kùdì bàna bààbò apu.*

*Ki kwelayè cibòbò wa mwadi, ne beena Ejiipitu ne bàà mu nzùbu wa Pàlò kumutèelejàbo. (Üvwa ne cyà kwikala mwelè mbilà mikolè.)*

*Ki Yòzefù kwambilaye bàna bààbò ne: Mémè ndi Yòzefù; taatù wanyi ùcidi ne mwoyi anyi? Kàdi bàna bààbò kabàakapeta mùshindù wa kumwandamuna to; bwalu barwa batàcishùbwe mu bwikadi bwèndè.*

*Ki Yòzefù kwambilaye bàna bààbò ne: Seemenaayi pabwìpì . . . naanyi, ndi nnùsengeleela. Ki kuseemenabo pabwìpì. Ki yéyè ne: Mémè ndi Yòzefù mwanèènu, udi . . . unùvwà—unùvwà basùmbishe mu Ejiipitu.*

*Ki bwà cinyi mpindyewu kanwikadi nwàbungamijùbwa to, anyi kudikwàcila ciiji, bwà ne nuvwà bansùmbishe bwà kulwa muneemu nànsha, bwalu Nzambì ngwàkantuma kumpàla kwènù bwà kunupàndisha. (Kaa, bilenga kaayipu’s we!)*

*Bwalu mu bidimu bìbidì ebi kùdì . . . ciyòòle cidi mu ditùnga, ne . . . mwikala, kakwàkwikala ní mmwepu ní dinowa nànsha.*

*Nènku Nzambì ngwàkantuma kumpàla kwènù bwà kusungidila ndelanganyi mu buloba, ne bwà kupandisha myoyi yènù ku dipikudiùbwa dinène.*

309 Ngánjibi kwangata mpindyewu ne kucipalakaja ne Zekààyi, wa 12, ànu bwà katanci cyanààna. Mpindyewu, tudi bamanye aci, mu cifwànyikijilu. Nwênù balongeshe bifwànyikijilu, dîbà adi nenùcipetè misangu yònsò ànu mu cyôci, ngeela meeji, mu—mu cifwànyikijilu.

310 Mpindyewu, Yòzefù, pààkalediibwaye, ùvwà mukinyiibwe kùdi bânà bààbò. Ncyà bushùwà anyi? Mpindyewu ndi muswè kunuleeja ne, Yòzefù udi uleeja Èkèleeziyà mûle tente ne Nyumà. Yòzefù ùvwà mukinyiibwe kùdi bânà bààbò. Bwà cinyi? Bwalu yéyè ùvwà wa nyumà. Yòzefù kàvwà ne cìvwàye mwà kwenza to bwalu ùvwà mwà kumòna cikèèna—kumòna. Kàvwà ne cìvwàye mwà kwenza to bwalu ùvwà uloota bilòòta, nwamònu's, ne ùvwà mwà kuumvwija bilòòta. Yéyè, ke cìvwà munda mwèndè ncyôci aci. Kàvwà mwà kuleeja cintu cikwàbò nànsha cìmwè cìvwà kaciyi mu yéyè to. Èè, ki dîbà adi, bânà bààbò kumukinabo, kakùyi bwalu to. Kàdi tatwèndè ùvwà mumunange, bwalu tatwèndè ùvwà mupròfètà.

311 Nudi numòna muvwabi ne Yesù anyi? Nzambì ùvwà munange Mwàn'Èndè. Kàdi bânà bààbò, Bafaalèsà ne Basadoka, bààkaMukina, bwalu Yéyè ùvwà mwà kwondopa babèèdi, ne kudyanjila kwamba maalu, ne kumòna bikèèna—kumòna, kuumvwija. Nudi bumvwe cîndi muswè kwamba aci anyi? “BààkaMukina, kakùyi bwalu to.”

312 Kàdi cyàkenzelàbo Yòzefù ncinyi? Bàakadyambidila ne mmufwè, ne kumwelabò mu mukidi. Kwàngatabo cinkutu cyà mashi, cyà meekala mwandamutekète, cìvwà tatwèndè. . .

313 Kùdi ànu meekala mwandamutekète mu mwanzankòngòlò. Ne mwanzankòngòlò, tudi bamanye ne ncinyi, bwà ne netùkafikekù pashiishe ndambu, ngeela meeji, dilòòlò edi. Mwanzankòngòlò kumutù Kwèndè eku, Yesù, mwaba udi ne: “Bikèngela Yéyè ikale ne mmwenekelu wa dibwe dyà jaspe ne sardoine, ne mwanzankòngòlò.” Mwanzankòngòlò ncipungidi.

314 Ne aci cìvwà cipungidi cyà Nzambì pa Yòzefù. Ki pashiishe kulaababò mashi pa cinkutu cyèndè, ne kwalukilabo naaci kùdi taatù. Nènku bàakacinkila ne yéyè ùvwà mufwè. Nènku. . .

315 Kàdi wàkabiishiibwa kupatudiibwa mu mùkidi amu ne kutèekiibwa mu—mu. . .kupanyishiibwa kùdi Pàlò, muntu kampànda mu Ejiipitu amu's, ke ka—kalààl kàà masàlaayi kampànda kumulama. Nènku pààkenzabo nànkù, yéyè, cintu cibi kumufiikilaci, ne kumwelabo mu bùlokò. Nènku mwômò amu kwambaye cipròfètà, ne kwambila bantu bàbìdì kùvwà umwe mwà kuya ne kùvwà mukwàbò ne cyà kuya; mufidi wa mvinyo ne mu—ne mufidi wa màmpà, bilondeshile bilòòta byàbò.

316 Ki pashiishe kubandishiibwaye kubangila ànu mwaba awu, too ne ku dyàbalùme dyà Pàlò. Ne muntu nànsha umwe kàvwaku

mwà kulenga Pâlò to, ànu mupicile kùdì Yòzefù. [Katùpà kàà mukàbà wà méyì munda mutupu—Muf.]

317 Cinyì eci. Mpindyewu, kùdì. . . dībà adi pààkasùmbishiibwà Yòzefù mu beena Ejiipitu. Nènku, tàngilàayi, cintu cyònsò cyàkenzaye cìvwa cimfwànyì cyà Kilistò. Tàngilàayi mufidi wa mvinyo ewu ne mufidi wa màmpà ewu muntwamu, ne bùbìdì bwàbò bàvwa ne bilòòta. Nènku Yesù, pàvwàYe mu nzùbu Wendè wa lukanu. Vùlukàayi ne, Yòzefù uvwa mu bùlokò. Nènku pàvwa Yesù mu Bwèndè bùlokò, (mùshindù kaayi?) mupoopela ku nkùruse, kwàkasùngidiibwa muntu umwèpelè ne umwe kujiminaye. Yòzefù, pàvwàye mu bwèndè buloko, umwe wàkapànda, umwe wàkajimina.

318 Kàdì mònaayi. Pashiishe paanyimà pàà Yesù mumane kuumushiibwa ku nkùruse, Yéyè wàkazànjikiibwa mu Dyulu, ne mmusòmbe ku dyàbalùme dyà Nyumà munène, Yehowàh. “Muntu nànsha umwe kèna mwà kulwa kùdì Nzambì kàyi mupicile kùNdì nànsha.” Kakwèna byà *Mwoyi Mariyà* to, kakwèna byà ne wa dyàkalenga *kampànda* anyì wa dyàkalenga *kansanga* to. Kàdì, ku Yesù Kilistò: “Mutwangaji umwèpelè udiku pankaci pàà Nzambì ne bantu,” mubidi wà mushinga mukolè ùvwa Nzambì musòmbèlemù, munkaci mwètù awu, wàkangata Dìna dyà Nzambì. Ki Nzambì kwangata dìnà dyà buntu. Nzambì kwangata. . .

319 Tàngilàayi kuneeku. Ku cibangidilu, pàvwà Adàmà. . . Ncyèna ànu mwà kuumuka ku aci to. Mbimweneke ànu bu ne muntu kampànda kèna ùCyùmvwa to, mwaba kampànda. Tàngilàayi. Ku cibangidilu. . . Lekelaayi nnùleeje cyàkàbìdì cintu kampànda. Nyumà Mwìmpè ùdì undimwija bwà mèmè kwenza cyòci eci. Ndi nshiyaku cyena-bwalu cyànyì bwà katancì kakesè. Pààkafika luumu lwà kumpàla mu Butùmbi, bwà ne mwànà wa balùme ùvwa mujimine, Adàmà, Nzambì wàkatuma Mwanjèlo anyì? Wàkatùma mwànà wa balùme anyì? Wàkatùma muntu mukwàbò anyì? Wàkalwa, Yéyè mwine, bwà kupikula mwàn’Èndè wa balùme mujimine awu. Àlèluuyàh! Nzambì kàakacyèyemeja kùdì muntu nànsha umwe to pa kuumusha Yéyè mwine. Nzambì wàkavwijiibwa mubidi ne wàkasòmbela munkaci mwètù, ne wàkapikula muntu, Yéyè mwine. Bìdì ne. . . “Tudi basùngidiibwe,” mùkdi Bible mwambe, “ku Mashi à Nzambì.” Cyà cifwàka, Nzambì uvwa. . . Nzambì uvwa kàyi ufwa awu wàkavwijiibwa wa cifwàka, bwà kuumusha mpèkaatù, bwà kwikala Mwànà wa mùkòòkò, Yéyè mwine; bwà kubwela mu Butùmbi, mubwikila, ne Mashi Èndè Yéyè mwine kumpàla Kwèndè, dyàmwàmwa dyà cilàmbà cikudika.

320 Mpindyewu, ki Yòzefù, uyààya mu Ejiipitu wàwa’s. Nènku mwòmò amu kuzanjikiibwaye kuumukila ku bùlokò bwèndè aku, too ne ku dyàbalùme dyà Pâlò, ne kuvwijiibwaye mulami wa bintu byònsò. Nènku bintu byònsò kutantabì mu matùkù à Yòzefù.

321 Mpindyewu, pààlukilà Yesù, nànsha cipèela ciine necisàsè bu cilòngo cyà rose. Yèyè m’Mwànà wa ditanta, cifwànyikijilu cyà Yòzefù.

322 Bààkatèèka Yòzefù mu. . . Kalààlà kàà màsàlaayi awu uvwa nendè mwèndè mu nzùbu; byònsò bìvwàye wènza, wàkatanta. Kumwelabo mu bùlokò, ne bùlokò bujimà kutantabù. Byònsò byàkenzabo, yèyè wàkatanta. Ne pààkabàndishiibwàye, mutàmbe kutumbuka, wa Pàlò, cindondà cyà Pàlò, bintu byònsò mu Ejiipitu kutantabi kumutù kwà ní ncinyi cyònsò pa buloba apa.

323 PààlukilàYe, nekwikalè buloba bwà ditanta. Bipèela byà kale nebisampilè, ne nekwikalè cyàkudya myaba yònsò. Nènkuru tudu mwà kusòmbèla, muntu ne muntu, mwinshi mwà mucu wètù wà mfigi awu, ne kuseka ne kusànkà, ne kwikala ne mwoyi kashidi mu Bwikadi Bwèndè, pààpinganaYe bu Mfùmù.

324 Ùvwa Mwànà wa muntu, Mupròfetà. Amen. Ùvwa Mwànà wa muntu, Mulambu, Mwakwidi. Yèyè udi Mwànà wa muntu, bu Mfùmù, Mwànà wa Davidi musòmbè pa nkwasà wa butumbi wa Udi Mutàmbe bunène. Mwànà wa muntu, Yèyè ùdi cish- . . . Nzambi mumwènèshìibwe bu Mwànà wa muntu. Yèyè wàkatuuluka ne kushààlaye muntu, bwà kuumusha mpèkaatù kùdi bàà pa buloba. Wàkashààla muntu, bu Mupròfetà. Wàkashààla muntu, bu Mwakwidi. Wàkashààla muntu, bu Mfùmù; Mfùmù wa mu Dyulu, Mfùmù wa bansantu, Mfùmù wa Cyendèlèlèlè; misangu yònsò ùvwa ànu Mfùmù, ke wìkala misangu yònsò ànu Mfùmù, Mfùmù wa Cyendèlèlèlè.

325 Mpindyewu mònaayi, pashìishe, Yòzefù. Kumpàla kwà Yòzefù kupatukaye, bìvwà bikèngela kwanjibu kwela mpungi, dyàmbedi. Ne bantu bàvwà beela mbila mikolè ne: “Twàyi cinù panshi bwà Yòzefù.” Civwa muntu wenza nànsha ciikale cinyi, ní uvwa usumbisha cintu kampànda mu mùsèsù, pàvwà mpungi awu udila, ùvwa ùtwa cinù cyèndè panshi. Muntu ùkaavwa pabwipi ne kwolola cyanza bwà kwangata mfranga, kàdi ùvwa ùtwa cinù cyèndè panshi, Yòzefù ùvwa munkaci mwà kulwa. Kaa! Kùdi mwen- . . . mwen—mwen—mwenji wa bikasa ní ukaavwa wàmba kwenza cikasa cyèndè aci, kàdi ciikalaye mwà kwenza ncinyi? Bìvwà bikèngela bwà kwimanyikaye. “Yòzefù nyèyè awu ùlwa.” Mpungi kudilaye.

326 Dimwè dyà ku matùkù adi panshi àà, bintu byònsò, nànsha cikondo, nebiimane. “Pààdilà mpungi wa Nzambi awu, ne bafwè mu Kilistò nebàbiikè, ne dindà dibwayika dyà Cyendèlèlèlè, dyà dibàlakana ne dilenga kumòna.” Byònsò nebitwe cinù panshi. “Cinù cyònsò necitwe panshi, ne ludimi lwònsò nelùCijikulè.”

Bangaayi mpindyewu. “Mpèkaatù yà bàmwè bantu yitu yidànyidila, yimwè yilonda.”

327 Kàdi mpindyewu mònaayi cyàkenzekà aci. Mùshindù mwine ùvwàci cyà butumbi’s wè! Dìbà adi pàvwà Yòzefù. . . paanyimà

pàà yéyè mumane kusela muntu wa Bisàmbà byà bendè ne mupete dîkù, Efàlàyimà ne Maanàsè, bânà bendè bàà balùme. Nukààvwaku bamòne ku ndekeelu anyi? Pàvwà Yòzefù... Yakòbò kubanga kubènesha Efàlàyimà ne Maanàsè. Mmwenze ànu ubanga kutenteka byanza byèndè anyi, kutèekaye Efàlàyimà ku dyàbalùme, Maanàsè ku dyàbakàji, bwà ne cianza cyà balùme aci cibèneshe mukulumpe. Kàdi mmwenze ànu ubanga kusambila, byanza byèndè kucyàmakanabi, nènku kupeeshaye mwànà mukesè menemene awu dibènesha dyà cianza cyà balùme pamutù pàà ewu uvwa usanganyiibwa ku dyàbalùme awu.

328 Ki Yòzefù kwamba ne: “Kabyèna nànkù to, Taatù.” Yéyè ne: “Wéwè’s udi mutèèke dibènesha pa Maanàsè pamutù pàà Efàlàyimà.”

Ki yéyè ne: “Nzambì ngudi mucyàmàkaje cianza cyànyì.”

329 Cinyi? Kuumukila ku beena Yuda, bakulumpe menemene abu, basungula bàà nzànzànzà bàà Nzambì, ku Nkùruse dibènesha kulwadi kùdi bàà Bisàmbà byà bendà, bwà kupeta Mukàji-musèla. Dibènesha ndilwile ku Nkùruse, kuumukila kùdi beena Yuda kuya ku bàà Bisàmbà byà bendè. Mubèngiibwe, bààkabenga Nkùruse, ki bwà cinyi Yéyè wàkapeta Mukàji-musèla wa Bisàmbà byà bendè.

330 Mpindyewu pàvwà Yòzefù, kumpàlà kwà cyôci eci, pàvwàye...mumvwe bwà bânà bààbò, bàvwà...Bàvwa pambelu pàà bwobùmwe munda mwà bidimu byàbùngi, beena Yuda abu.

331 Mpindyewu tàngilàayi. Tudi munkaci mwà kwalukila ku Zekàayi mpindyewu, mwàkatwàbu mikemu amu, ne kwasa myadi ne kutwà mikemu. Nènku nànsha mèkù neàtapuluke ôwò miine ne makwàbò mèkù, kupatuka, bàmba ne: “Tudi bacyènzè bishi? Mmunyi mutùdi mwà kwikala bacyenze’s?” Pàakambabo ne: “Ebi bibangu Udi mubipetèle penyì, bishidilu bìdi mu byanza Byèbè abi’s?” nànsha bààkaMutwà difùmà abu mene. “Yéyè neàlwe mu matutu. Nènku nebàMumòne, nànsha mene bààkaMutwà difùmà abu. Nènku nzùbu yònsò neàse mwadi, ne nebàtwe mikemu.” Kabààkumanya cyà kwenza to.

332 Nènku pàvwà Yòzefù...Nudi bamanye bwalu-bulonda abu’s. Pàakamònyaye bânà bààbò, ki kwenzaye bu ne kàvwa mwà kwakula cyena Ebèlu to, ki kukebaye mwandamunyi bwà kumwandamvwinaye. Nènku kavwa mwà kwakula cyena Ebèlu to, kwenzaye bu nànkù awu’s; kàdi’s úvwa úswa kujandula. Nènku ki ndekeelu wa byònsò, dîngà ditùkù, pàakatwàlàbò mwakunyèndè wa balùme mutekète awu, nukaavwaku bamòne anyi? Úvwa m’Benyàminà wàkasalula musùukà wà Yòzefù awu’s?

333 Ncinyi aci, leelù ewu, cìikalà mwà kusalula musùukà Wèndè, Yòzefù wetù, Yesù? Èkèleeziyà wa citende udi mu Iran mwàmwa,

udi mulamè mikenji yà Nzambì awu. Nènku mbantu balediibwe cyàkàbìdì bàdì badikungwiye mu Palestine, ne baalujuludiibwe cyàkàbìdì. Mùtootò wà Davidì wà matumba àsambòmbò awu, dibendela dyà kale ne kale dyà pa buloba, ditunga ndilediibwe mu ndambù wa bidimu bishààle ebi. Ki Izàlèlèlà nyéyè awu's.

Matungà àdi àpanduluka, Izàlèlèlà nyewu  
ùtàbuluka,

Bimanyinu byàkadyànjlà Bible kwamba;  
Matùkù à bàà Bisàmbà byà bendè mmabala ku  
byanza, mùle tètè ne bintu bìdì bikwàcishà  
bwôwà;

“Alùkilaayi, Éyì nwènù bàdì batangalàjìibwe,  
kùdì beenu sungasunga.”

Ditùkù dyà bupikudi dikaadi pabwîpì,  
Myoyi ya bantu ki kufwayi ne bwôwà eku;  
(Anji citàngilaayi ànu's, nyawu bônso  
bashààle banyunguluke mitù.)

Ujìibwà ne Nyumà, mwëndù wèbè  
mulongolola kakùyi dikàla ne musukula,  
Bàndulukà! Bupikudi bwèbè bùkaadi  
pabwîpì.

Bapròfetà bàà mashimi bàdì bàshima, bàdì  
bàvila Bulelèlèlà bwà Nzambì,  
Bwà ne Yesù Kilistò awu ki Nzambì wetù to;  
(Butùmbi's wè!) Kàdi Dibuulula ndilwe's.  
Pa nàнку netwèndele myaba yìdì bapostòlò  
badyacile. (Ànu mu mwaba wàbo  
ùm wèùm wè awu menemene.)

Bwalu ditùkù dyà bupikudi dikaadi pabwîpì,  
Myoyi yà bantu ki kufwayi ne bwôwà eku's;  
Ujìibwà ne Nyumà wa Nzambì, mwëndù wèbè  
mulongolola kakùyi dikàla ne musukula,  
Bàndulukà! Bupikudi bwèbè bùkaadi  
pabwîpì.

<sup>334</sup> Kaa! Kaa, Yözefù, pààkamònaye Benyàmìnà mutekète mwimane mwaba awu! S'ki mwakunyèndè wa balùme awu's. Nudi numòna Benyàmìnà mwànà awu mpindyewu kuntwaku...? . . . kwàka naka, musòmbe mwaba awu anyi? Bifuku byà—byà buloba, byà beena Yuda, kwalukilabi mwaba wìkala binunu lukama ne makumi anaayi ne bìnàayi bààbò biimane awu, bwà kwakidila Kilistò pààMumònàbò Ülwa. Bòbò nebàmbè ne: “Mònaayi, ewu s'ki Nzambì wetù Utùvwà bindile awu's.” Dìbà adi nebàmònè mutwibwe difùmà awu... “Ebi mbilwe penyì?”

Yéyè ne: “Mu nzùbu wa mulunda Wanyì.”

<sup>335</sup> Nènku nebàtwe mikemu ne nebàdilè. Ne dîkù dyònsò, bifuku byàbò byà Davidì ne Nefàtàlimà ne bônso, nebiikalè batàpuluke

bôbô biine, dîkù ne dîkù dyónsò, ne bàdididila pààmumònabo mwimane mu mpeepèlè, Ewu wàkatwàbo difùmà awu.

<sup>336</sup> Mukenji Wendè newikale cinyi? Tàngilàayi cyàkamba Yòzefù. Pàakambàye. . .

<sup>337</sup> Tangilaayi cikwàbò cintu. Pàakapeta Yòzefù bânà kumpàla kwèndè, yéyè kubàtàngila, kumònaye Benyàminà mutekète awu. Yéyè kumòna Efàlàyimà, kumònaye bakwàbò abu mwaba awu, Gaadà ne bônso baa kùdibo. Nènku bifuku dikumi ne bibìdì, bifuku dikumi abi musangu awu, biimane kumpàla kwèndè. Kubàmónayè bônso biimane mwaba awu. Ùvwa mumanye ne bavwa mbànà bààbò. Kàdi kutàngilaye Benyàminà mutekète awu, dyàkamwè, cyà mu dibòdi kumba kumupata. Kumanyaye ne mbànà bààbò. Cyàkambaye ncinyi? “Bantu bônso banshiile kaaba.” Cyàkenzekelà mukàjèndè ne bânà bèndè ncinyi? Bôbò kubwela mu nzùbu wa bukalenge.

<sup>338</sup> Èkèleeziyà wa bàà Bisàmbà byà bèndè neàye penyi mu Dyambwibwa? Mu Nzùbu wa bukalenge. Mukàjì-musèla, Àlèluuyàh, Mukàjì-musèla neùmushiiabwe pa buloba, uya mu Dyambwibwa. Pashiishe pàalukilàYe, Mukàj’Èndè-musèla kààkwikalakù pàdiYe ùDìmanyisha kùdì bânà Bààbò, beena Yuda nànsha, bàvwà baMutwè difùmà abu, bàvwà baMubenge abu.

<sup>339</sup> Kàdi mukàjèndè ne munanga wèndè awu, balunda bèndè bàà pa mwoyi abu, ba—banyàndè batuma kùdì Nzambì, bàvwà mu ntempelu. Nènku mmwenze ànu utàngila anyi, kwambaye ne bàvwà. . . Kabàvwa bamanye to. Kwambabò ne: “Kaa, mfùmù munène ewu’s wè!” Kubangabò kwambilangana, umwe ne mukwèndè, kaa, bwà bintu bivwàbò benze abi.

<sup>340</sup> Ngeela meeji ne ùvwa ng’Efàlàyimà, anyi kî ng’Efàlàyimà to, kàdi ndi mupwe ne mwoyi ni ùvwa nganyì mene mpindyewu, wà—wàkamba ne: “Èè, kabivwa bikèngela bwà twètù kwikala bashipe mwanèètù, Yòzefù to.” Yéyè ne: “Udi umòna’s, tukaadi munkaci mwà kufuciibwa.” Luubènà, Luubènà kwamba ne: “Kabivwa bikèngela twètù kwikala bashipe mwanèètù to,” yéyè ne: “bwalu, nudi numòna’s, tudi munkaci mwà kufuciibwa bwà bitùvwà benze.”

<sup>341</sup> Nènku Yòzefù mwimane mwaba awu; kabàvwa beela meeji ne ùvwa mwà kuumvwa cyena Ebèlu to. Kàdi’s yéyè ùvwa mucìmanye.

<sup>342</sup> Bàmwè beela meeji ne, kèna mwà kwakula. . . kuumvwaku dyakula dyà mu myakulu to, kàdi’s Yéyè mmumanye byònsò abi. Èyowà, Yéyè mmumanye. Bukalenge bwà bàà Bisàmbà byà bèndè bwàkabanga ne dyakula dyà mu myakulu ne dyandamuna, mu mutù wa ngòlò (mutù wa kumpàla) kumpàla kwà kupònawù. Cyàkajikijà cipungu cyà kumpàla cyà bàà Bisàmbà byà bèndè aci ncinyi? Mufundu wa mu myakulu myenyi ku cimanu, ne muntu mwaba awu uvwa mwà kuwùmvwija ne kwamba ne



ncikampànda. Bìdi bìpatuka mùshindù wùm>wùm>wè awu. Amen. Bìbwela ne bìpatuka mùshindù wùm>wùm>wè awu.

343 Bavwa beela meeji ne kàvwa mwà kuumvwa myakulu yìvwàbo bàakula ayi to, kàdi's ùvwa muyimanye. Bòbò ne: "Nudi numòna citùdi bapete anyi?"

Nènku ki Yòzefù dìbà adi kumònaye ne bàdi banyingalala bwà cìvwàbo benze aci's.

344 Mpindyewu Ùdi umòna cinyongopelu ne kanyinganyinga bwà muùvwàbo baMubenge, pa nàнку Yèyè mMulengùbwe ne muminu Wèndè mmupate mpindyewu. Ùdi pabwìpi bwà kutangalaja Èkèleeziyà Wèndè pa buloba, kuMubweja mu Butùmbi. Pashiishe kwalukila, ne dìbà adi bifuku byònsò byà pa buloba nebyase mwadi.

345 Bàakenza cinyi? Luubènà, bònsò bwàbù, bàakabanga kwela mbila, kwambabò ne: "Kaa! Kaa!" Kuumvwabò bwòwà ne kwambabò ne: "Ewu's n'yèyè. Bwà mpindyewu kaayi tudi tusuna tudyàmbika's. Mpindyewu yèyè's neatushipe. Mpindyewu yèyè. . . Tudi bamanye ne netùbutudiibwe mpindyewu mene, bwalu n'Yòzefù uvwa kule neetù kukaadi ntàntà awu. S'n'Yòzefù, mwanèètù awu, bwà mpindyewu kaayi tudi tusuna tudyàmbika's."

346 Yèyè ne: "Kanufìkidyanganyi munda to. Nzambì ngwakenza cyòci eci bwà kunùpàndisha."

347 Cyàkenza Nzambì ncinyi? Bwà cinyi beena Yuda bàakabenga Yesù? Bwà twètù bàà Bisàmbà byà bendè, bwà ne, bantu bàakabùikilàYè bwà bwalu bwà Dìnà Dyèndè abu, Nzambì wàkacyenza bwà kupàndisha mwoyi wà Èkèleeziyà wa bàà Bisàmbà byà bendè, Mukàji-musèla.

348 Bifuku byònsò byàkaMubèngà abi nebyase mwadi. Nebàdisokokè mu nyòngòlo, ne mu mbwebwe, ne bikwàbò, bàmba ne: "Tusokòkaayi, tùpònènaayikù, nwènù mikuna." BààkaMubenga, Yèyè. Bisàmbà byà pa buloba nebidilè mwadi bwà bwalu Bwèndè. Nènku dìkù ne dìkù mu Izalèlèlà nebùikè batàpuluke. Mèkù neatapulukè, òmwè ne dikwàbò, bàmba ne: "Cituvwà bacyènzèle ncinyi? Mbitùfikile munyi bwà kuMubènga? Munyi's? Ki Yèyè udi mwimane wàwa's. Ki Nzambì Utùvwà bindilèndile wàwa. Kàdi's ki Yèyè awu, mwikàle ne bibangu byà mputà yà misonso mu byanza Byèndè, kàdi twètù's ke bàakacyèna."

349 Ki cyòci aci menemene cìvwa bàna bèètù abu bàmbe ànu mwaba awu mene's, pààkaalukilabo e kwamba ne: "S'ki Yòzefù, utwàkasùmbisha awu's."

Yèyè ne: "Mémè ndi Yòzefù, mwanèènù, unwàkasùmbishà mu Ejiipitu awu."

350 “Kaa!” Bàvwa ne bwôwà. Nènku bavwa munkaci mwà myadi ne batwa mikemu, bàdyèla muntu kùdì mukwèndè ne: “Citùdì mwà kwenza ncinyi’s?”

351 Yèyè ne: “Kanudifikidi munda to, bwalu Nzambi nguvwa mwenze byònsò ebi. Nzambi nguvwa muntume kumpàla.”

352 Nzambi ngwàkafuka bantu bònsò; batòòke, bafìke, bafìkuluke, bàà kalaabi, muntu yònsò. Nzambi ngwàkafuka muntu yònsò wendenda ewu. Wàkafùka muntu wa Bisàmbà byà bendè, kufùka mwena Yuda. Wàkafùka bwònsò. Byònsò bidi bwà butùmbi Bwèndè. Ne byàkakèngela bwà beena Yuda kubèngiwbabò bwà kwangata Mukàjì-musèla wa bàà Bisàmbà byà bendè.

353 Ki bwà cinyi bifwànyikijilu byònsò ebi bidi nànkù. Bwà ne Mukàjì-musèla wa bàà Bisàmbà byà bendè ne ndelàngànyì Yèndè, Èkèleeziyà wa butùmbi wa cyena mpenta awu musukula mu Mashi a Mwànà wa mùkòòkò, ne bukolè bwònsò bwà dibiiika dyà ku lufù busòmbèle munda mwàbo, neàbiike dīngà ditùkù mu Dyambwibwa (mu katanci, mu mubùnyì wà dīsù) bwà kuya kashààla mu Bwikadi bwà Yesù, pàdiYe wàlukila (ne utangalaja bintu byònsò) bwà kuDimanyisha kùdì bàà Bààbò.

354 Tàngilàayi cìdì Mufùndu wàmba mwab’ewu, bwà kujikija. Kaa!

*Mònaayi, yèyè ùdì ùlwa ne matutu; ne dīsù dyònsò nedimùmòné, (mpindyewu ùdì wàkula bwà Dilwa diibìdì, kī n’Dyambwibwa nànsha), ne aba bààkamutwa difuma kàbìdì: . . .*

355 Nshapità wa 7, mvensa wa 1 . . . Anyi, mvensa wa 7 wa nshapità wa 1.

*. . . dīsù dyònsò nedimùmòné, ne aba bààkamutwa difuma kàbìdì: ne bifuku byònsò byà pa buloba nebitwe mikemu bwà bwalu bwèndè. Amu nànkù, Amen.*

356 Pashìshe Ùdì uteela dìyì dyamba dinène adi. Ewu nùnkù nganyi’s? Nganyi Ewu udibo ne cyà kwindila’s?

*Mèmè ndi Alpha ne Omega, ndi A ne Z, (A wa cyena Ngelika ne Z, alphabèt wa cyena Ngelika) . . .*

357 Byenzedi 2:36, kùdì . . . Peetèlo wàkamba ne: “Kakwèna dīngà dīnà difila mwīnshi mwà Dyulu didì bantu ne cyà kusungidiibwaku to.” Anyì, to, mfwilaayiku luse; ndi mucitèele bibi’s. Wàkamba ne: “Nzùbu yònsò wa Izàlèlèlè àmanyè bulelèlè ne, Nzambi mmwenze Yesù umwèumwe ewu, unùdì bapoopèlè pa nkùruse ewu, byònsò bibìdì Mukalenge ne Kilstò.”

358 Yone 14:7 ne 12, Toomààsè wàkamba ne: “Mukalenge, tùleejè Taatù, aci necitùsànkishè.”

359 Yèyè ne: “Mèmè ndi neenù ntàntà mule be, kàdì wèwè kwèna mummanyè anyi?” Yèyè ne: “Ewu udi muMmòne mmumòne

Taatù. Bwà cinyi udi wamba ne: ‘Ndeeje Taatù?’ Mémè ne Taatù Wanyì tudi Umwe.”

<sup>360</sup> Mémè kwambila muntu kampànda cyòci aci musangu kampànda. Inábànza awu kwambaye ne: “Anji indila kakesè, Mukalenge Branham.” Yèyè ne: “Wèwè ne mukàjèèbè’s nudi umwe, nwènù pèènu.”

Mémè ne: “Kàdi aci kî mmu mùshindù awu to.”

Yèyè ne: “Mfwileku luse.”

Mémè ne: “Udi mummòne anyi?”

Yèyè ne: “Ndi mukumòne’s.”

Mémè ne: “Udi umòna mukàjàànyì anyi?”

Yèyè ne: “To.”

<sup>361</sup> Mémè ne: “Dìbà adi, Bòbò’s bàdi mu mùshindù mushiilàngàne’s. Yèyè ne: ‘Paùdi uMmòna, wámònu Taatù.’” Pa nàнку aci civwa cikumbane bwà cyòci aci.

<sup>362</sup> Pa nàнку mu Yone Munsantu, anyi mu Yone wa Kumpàla 5:7 too ne ku 8, nwènù bònsò bàdi bàcìfùnda abu. Yone wa Kumpàla 5:7 too ne ku 8, Bible ngudi mwambe. Mwakudi awu, muntu ànu umwèumwè wàkafùnda Dibuulula òvwà Yesù mumupe edi, wàkamba ne: “Kùdi bàsàtu bàdi bàfila bujaadiki mu Dyulu: Taatù, Dìyì (Dìyì s’ki Mwànà) . . . Taatù, Dìyì, ne Nyumà Mwímpè, ne bàsàtu aba bàdi umwe. Kùdi bisàtu bìdi bìfila bujaadiki pa buloba: màyi, Mashi, ne Nyumà, ne bìdi bìpetangana; kî ne bìdi cintu cimwè to, kàdi bìdi bipetangana mu cimwè.”

<sup>363</sup> Kwèna mwà kwikala ne Taatù kùyì ne Mwànà to. Kwèna mwà kwikala ne Taatù anyi Mwànà kùyì ne Nyumà Mwímpè to. Cyà bushùwà. Kàdi wèwè . . . Nènku màyi, Mashi, ne Nyumà, s’ki bintu bìdi bìkèngela bwà kubwela mu Mubidi Wèndè mbyòbì abi.

<sup>364</sup> Pàdi dilediibwa dyà mu mubidi dyènzeka, ncintu kaayi cyà kumpàla cìdi cyenzeka pàdi mukàjì ulela mwànà? Cintu cyà kumpàla, mmàyi. Cintu ciibìdi, mmashi. Ncyà bushùwà anyi? Cintu cìdi cìlondà, n’nyumà. Mwànà ùdi ubakula mweyelu wèndè, utwadija kweyela. Màyi, mashi, ne nyumà, ki bìdi byenza dilediibwa dyà mu mubidi.

<sup>365</sup> Kàbìdi, Dilediibwa dyà mu nyumà. Dibatiiza dyà mu màyi mu Dìna dyà Yesù Kilistò; dibingishiibwa ku diitabuuja, kwitabuuja Mukalenge Yesù Kilistò. Màyi! Cìdi cìlondà ncinyi? Mashi; dijidiibwa, disukula, dimupàtula.

<sup>366</sup> Ki mwaba ngwòwò awu unùdi nwènù ba-Nazaréens bapangile’s; nudi baye ànu too ne mwaba awu kàdi kanùyì batámbe kuya kule to. Dibungu dìdi dijidiibwe pa cyoshelu, dilongolola bwà mudimu, kàdi kadyèna ku mudimu to. “Bàà disànkà ng’aba,” masànkà, “bàdi ne nzala ne nyoota yà bwakàne,

bwalu bôbò nebuukucishiiibwe.” Dibungu ndijidiibwe. Aci’s mbulelèlè.

<sup>367</sup> Aci’s cidi ànu bu virgo. Mwaku ewu *virgo* ùdi umvwija ne “mukezùke, wa cijila, kàyi musopakaja to, mujidiibwe.” Yitaanu yìvwa ne maanyi, ne yitaanu kayìvwa ne maanyi to; yitaanu yìvwa myùjiibwe, ne mikwàbò ayi yìvwa ànu kacya yàshààla mu dijidiibwa’s. “Nukaadi bapete Nyumà Mwîmpè *kacya* nwítabuujaja anyi,” nwênù ba-Baptistes, ba-Presbytériens?

“Katwèna bamanye mene ne Nyumà Mwîmpè ùtukù to.”

“Àpu, nwàkàbàtìiijibwa mùshindù kaayi’s?” Uh-huh.

<sup>368</sup> Paanyimà pàà yéyè mumane kubatentekela byanza, bavwa dîba adi, paanyimà pàà bamane kusùngidiibwa ne kujidiibwa, bààkuujiibwa tente ne Nyumà Mwîmpè. Cyà bushùwà.

<sup>369</sup> Mâyì, Mashi, Nyumà! Yesù wàkalwa bwà kwowesha mâyi ne kukezula, ne bwà kujidila Èkèleeziyà, bwà Wàmòna mwà kulwa ne kusòmbelamù. Ne Mashi Èndè Yéyè mwine; Yéyè wàkafila Mashi Èndè Sungasunga malela à kùdi Nzambì, bwà Wàmòna mwà kutukezula ku dilediibwa dyètù dyà ku disangila dyà mulùme ne mukàji adi, ne kutupa lupanza lujidila, lwà cijila bwà Yéyè mwine kulwamù.

<sup>370</sup> “Katancì kakesè aka, bàà pa buloba kabààkuMmòna kàbìdì to; kàdi nwênù nenùMmòne bwalu Mémè,” mupinganyi muleeji muntu, “nèngìkale neenù, munda mwènù mene, too ne ku ndekeelu kwà dikùmbana dyà maalu ònsò.” Amen. “Too ne ku ndekeelu, Mémè nèngìkalè neenù ne munda mwènù. Byenzedi bìndì Mémè ngenza nenùbyènzè pèènù. Bimanyinu ebi nebifile bàdì bìitabuujaja.” Nzambì mu Èkèleeziyà! Kaa, ekèlekèlè! Bunzambi! “Kùdi basatu bàdì bàfila bujaadiki mu Dyulu: Taatù, Dîyi (Mwânà), Nyumà Mwîmpè. Bàdì Umwe.”

<sup>371</sup> Mpindyewu, udi mwà kusùngidiibwa kùyi mujidiibwe to. Udi mwà kwikala mujidiibwe kàdi kùyi ne Nyumà Mwîmpè to; cyà bushùwà, nyumà mujidila, kùyi mùjiibwe tètè to. Dijidila dyà mwoyi wèbè, dizekula dyà mwoyi wèbè, kawùyì ùjiibwa tètè ne cintu kampànda to. Ki cyàkambaYe ne: “Pàdi nyumà wa bukooya ùpàtuka munda mwà muntu awu, ùdi wèndakana mu myaba myùmè. Wàlukila, usangana nzùbu wèndè awu mulengeja yònsò, kàdi kubwelamù. Ngìikadilu wa ndekeelu wa muntu awu ùdi misangu yàbùngì, misangu mwandamutekète, mutàmbe kubìipa kupita muvwabi ku cibangidilu amu.”

<sup>372</sup> Ki cyàkanwènzekelà nwênù ba-Pèlerins de la Sainteté, ba-Nazaréens, ne bakwàbò. Nwênù kwitaba. Nènku pàkalwa Nyumà Mwîmpè, kubanga kwakula mu myakulu, ne kufila bimanyinu ne maalu à kukèma, nwênù kucìbìikila ne “ndémon” ne kupenda byenzedi byà Nzambì, kubìbìikila ne “nnyumà wa bukooya.” Kàdi nudi bamòne kwàkaya èkèleeziyà wènù anyi? Pàtukàayi munda mwèndè! Dìbà ndyèdì, Dibүүлula dyà Yesù Kilistò didi munkaci mwà kulongeshiibwa, Nzambì

ngwàkabuulula mu bukòlè bwà dileeja Dyèndè dyà patòòke dyà Nyumà Mwimpè. Amen. Ditùkù dyà bupikudi dikaadi pabwìpì.

<sup>373</sup> Mpindyewu, Bunzambì munda Mwèndè, Timòte wa Kumpàla 3:16.

*...kaküyi dikòkangana to bwalu busokoka bwà difwànà dyà Nzambì mbunène: bwalu Nzambì wàkamwèneshiibwa mu mubidi, ...mumòna kùdi banjèlo, ...mwitabùùjùibwe pa buloba, mwakidila mu butumbi.*

<sup>374</sup> Kaa, ànu nàнку ànu nàнку ànu nàнку's. Kàdi mpindyewu tudi penyì? Ku ndekeelu kwà mvensa wa 8.

<sup>375</sup> Dilòlòlò edi tudi tubanga mvensa wa—wa 9, *Cikèèná-kumò cyà Patèmò*. Kaa, kùdi bintu binène mu cibucilu bwètù twètù's. Nudi baMunangè anyì?

Ndi muMunange, ndi muMunange  
Bwalu Yèyè wàkannanga kumpàla  
Ne wàkampetela lupàndu  
Pa mucì wà Kàlvaryò.

<sup>376</sup> Ncyà bushùwà ne nudi nwenza nàнку anyì? Nzambì mmuDimanyishe kùdi, mubuuludiibwe ne Yèyè ùdi Mwànà wa Nzambì, Yesù Kilistò, Nzambì mumwèneshiibwe mu mubidi, bwà kuumusha mpèkaatù? Ùdi munkacì mwà kuDibuulula mu matùkù à ndekeelu aa mu èkèleeziyà Yèndè, uDimanyisha.

<sup>377</sup> Mpindyewu, bintu biine bìdi munkacì mwà kwenzeka mu Èkèleeziyà ebi, tàngilàayi numòne, ku ndekeelu kwà Mukenji ewu, Bible ne kèna wamba ne maalu aa àdi ne cyà kwenzeka, ànu mu wòwù menemene. Kumòna ní kabyàkenzeka ànu menemene, mu Cikondo cyà Efèso, ne cyà Pegàmò, cyà Twatilà, kutungunuka, mu cikondo cyònsò.

<sup>378</sup> Kwamba mùvwà Luther mwà kwenza, ne mùvwà Wesley mwà kwenza. Ne mùshindù mwine wikalà dingumba dyà beena Mpenta edi mwà kubwela mu ngiikadilu wa Laòdikiyà, wa civùmvù ewu, kàdi, mu byònsò abi, Yèyè ùvwà mwà kukoka bantu. Ncyà bushùwà. Mmwòmò menemene. Tukaadi ku ndekeelu. Kaa, mèmè's ndi ne disànkà dyàbùngì be! Nènku, kaa, ànu mungàdimònu ngenda ncyòka, ne ntàngila balunda bàanyi ne bikwàbò, ne pa kumòna buloba ne—ne cimvundu cinènè cidibu busanganyiibwamu eci, ne pashiishe kudyambidila ne Dilwa dyà Mukalenge dikaadi pabwìpì menemene. Tukaadi ku ndekeelu wa cikondo.

<sup>379</sup> Myoyi ya bantu yìdi yàmba kwimana bwà bwòwà. Myaba yònsò, bantu bònsò, bàdi ànu badilakana ku bisanji, díbà dyònsò, "Ikalaayi badilongòlòle ku dibundiibwa dyà mvità yà mu lupeepèlè. Angataayi *cikampànda*, angataayi *cikansanga*, nubwele mu nzùbu wa mwinshi mwà buloba." Mmunyi muwàsokoma aci? Kanwèna mwà kusokoma aci to. Èè, cintu

aci necibwele mwinshi mwà buloba mu bwondòkè bwà metèlè makumi anaayi ne ataanu, mu bule bwà kilòmèètà nkamà yìbìdì ne makumi anaayi, mu nseke yònsò yinaayi. Mòna's, munyùkunyuku wààci newikale... Cyòci cilenge apa nùku, ncifwànyine kunyukusha Indianapolis too ne mwinshi mwà buloba. Mòna's, mbifwànyine ànu kutaayisha Indianapolis kumusùsulula, kulenga mene mu Louisville emu, nwamònu's, cimwè cyà ku byòbì abi's. Mbikolè bwà kwamba cidìbo naaci pa kuumusha aci.

<sup>380</sup> Nèku, tàngila, kabyèna bìkèngela bwà wèwè ku... Udi mumanye's, kabyèna bìkèngela bwà Russie kwenzayè nàku to. Cuba udi mwà kwenza nàku. Dìna kaaba kakesè kwònsò, kaaba ka—kakesè kàà bunènè bwà Alcatraz udi kwaka wàwa, nkafwànyine kucyènza, ne cikwàta buloba bujimà. Cintu cimwèpelè cidi cikèngela kwenza cidi ànu kumuteeka mu njila kàdi kukoka kaanshinga kàmwèpelè. Kwèna dijinga ne cilwilu to. Bidi bìkèngela ànu mukoleshi wa maalu umwèpelè cyanààna bwà kucyènza, mu byanza byà dyabùlù. Ncyà bushùwà menemene. Úvwa mwà kucyènza, nèku dìbà adi cintu cyònsò mu kaabujima's ncijike. Dìbà adi kwònsò's nkumane kujika.

<sup>381</sup> Kàdi, kaa, lekèlè nkupèèshèku cintu cibènesha eci. Patùdì tumòna aci pabwìpi menemene, patùdì tumòna ne ncifwànyine kwenzeka kumpàla kwà dindà. Vùlukààyi ne, Èkèleeziyà mmumane kwalukila kumbelu kumpàla kwà aci kwenzekaci. Dyambwibwa didi dyènzeka kumpàla.

<sup>382</sup> Mpindyewu, bwà kanwikadi nwàlwa kukònyangajiibwa, vùlukààyi ne, Yesù wàkamba ne: “Ànu mwàkadibi mu matùkù à Noà, ànu mwàkadibi mu matùkù à Lotà.” Vùlukààyi ne, kumpàla kwà mvula kanà yònsò ewu kumatayè, Noà ukaavwa mu bwàtu. Nwamònu anyi? Noà ukaavwa mu bwàtu. Wàkangaciibwa, ku cyòci eci. Nèku mpindyewu, Noà uvwa cimfwànyi cyà beena Yuda. Kàdi Henoka wàkaalukila kumbelu kàyi mufwè to. Nèku Noà mmwenze ànu ùmòna Henoka uya, kumanyaye ne civwa ncikondo, bwà kutwàdija kwenza bwatu. Ncyà bushùwà. Aci civwa ncimanyinu cyà Noà, pààkayà Henoka kumbelu apu. Nèku pàdi ànu Èkèleeziyà wa bàà Bisamba byà bendè ne cyà kuumushiibwa, dìbà adi Udi uDimanyisha kùdì Izalèlèla. Nwamònu anyi? Ncyà bushùwà.

<sup>383</sup> Vùlukààyi ne, mu matùkù à Lotà, bu mwàkambà Yesù, kumpàla kwà kasunsukila nànsha kàmwè kàà kapyà kulengaku buloba, Mwanjèlo awu wàkamba ne: “Lwijakaja. Ambuluja. Patuka mwab'ewu, bwalu ncyèna mwà kwenza cintu nànsha cimwè paùdì kuyi mwanji kuumuka apa to.” Kumpàla kwà kapyà kanà kònsò kulengaku, Lotà ne dìkù dyèndè bavwa bamane kupatuka bayè. Pa nàku, Dyambwibwa nedilwe kumpàla kwà Dikenga dinène kubweladi.

<sup>384</sup> Dikenga dinènè, bantu bààbùngì bàtu babwejakaja

aci's. Netùcilongòlòle, lumingu elu, byàsàwà Mukalenge, ku dikwacisha dyà Mukalenge. Vùlukàayi ne, nudi bindile Cikondo cyà Dikenga dinène, civwa ne, bu nwènù mwà kucifwànyikija mu Bible, civwa mmatùkù à lutàtù à Yakòbò, nudi numòna's, pàakatacishiihwaye. Aci kacivwa citangila bàà Bisàmbà byà bendè to. Bàà Bisàmbà byà bendè kabeena ne cyà dyanza naaci to. Kakwèna cifwànyikijilu mu Bible bwà aci to. Èkèleeziyà wa bàà Bisàmbà byà bendè mmwambwibwe.

<sup>385</sup> Ne nwènù nudi nukeba bwà “mâyi àndamuke mashi,” ne bintu byà mùshindù awu. Aci cidi cyàlukidila kàbìdì Izalèèlà, kuntu kwaka ne Mòsà ne Eliyà, pàalukilabò. Eliyà, bwà musangu mwinâyi, ùdi wàlukila mu nyumà. Nànsha umwe wa ku bôbò abu kàakafwà to, anyi, Mòsà wàkafwà, bôbò kabàakamanya mwaba wàkajiikiibwaye to. Ûvwa ne cyà kwikala mujuke mwaba kampànda pankaci pàà cikondo aci ne mwaba awu, bwalu, pa Mukùnà wà Dikudimuka dyà mpàla, s'ki yèyè awu, uyiikila ne Yesù, kî mmwômò anyi? Nwamònu anyi?

<sup>386</sup> Pa nàнку nebàalukile ne nebàshebeyiibwè, ne nebàbàlàadikè mu mùsèèsù wà nyumà awu wùdìbò babìkila ne “Sodoma,” mùvwà Mukalenge wetù mupoopèdìibwe pa nkùrusè, Yèlusalèmà. Bôbò nebàyiishè beena Yuda, ne nebèlè buloba milawu, ne nebàkangè maulu, ne bikwàbò byà mùshindù awu. Nèngu ndekeelu wa mudimu wà bwambi wà bàà Bisàmbà byà bendè neùtungunuke ne neùswikakanangane ne cyôci aci, ne bàà Bisàmbà byà bendè nebàye kumbèlu, ne mudimu wà bwambi awu newùtungunukè. Ki kwikala kabutu kàà bintu byònsò. Byàbisàtu bibìdì byà bàà pa buloba nebifwe, ne bikwàbò byònsò. Pàvwà mibidi mifwè ayi milàadika mu mùsèèsù amu, munda mwà matùkù àsàtu, tàngilàayi numòne ne civwa ncinyi.

<sup>387</sup> Tàngilàayi bimfwànyi ebi bindi mmupete bifumina ku Àmèrikè wa ku Sud, pàakashipabo missionnaire wa cyena Mpenta awu mwaba awu, mukàjèndè, mwadija mu mùsèèsù, ne yèyè ne bânà bèndè bakesè bàbìdì. Mwànà mukesè wa bakàji, ne kafù kèndè kakesè aku kuulakane mùshindù *awu*. Kabàvwaku nànsha baswè kubajiika to. Bavwa babapicila ku luseke, babatwila mate mwab'awu mùshindù ewu, munda mwà matùkù àsàtu anyi anaayi. Mwanèètù Kopp kukwàtayè bindìdimbi. Ndi naabi kumbèlu, nwamònu's, mùshindù ùdìbò benza's.

<sup>388</sup> Pashìishe bàdi bàtùminangana mapà, ewu ne ewu. Tàngilàayi mùdì aci cifwànyikijibwe mu Bible, nudi numòna ne ng'èkèleeziyà kaayi wikala mwà kwenza aci. Ncyà bushùwà, pabwìpì menemene, ne kubwela buludi bu nyoka mpindyewu mene, ànu ne budimù muvwabo naabu amu, cimanyinu cyà bintu mpindyewu mene.

<sup>389</sup> Tàngilàayi cipròfeta cyàkampà Mukalenge mu cidimu cyà '33, muvwaci mwà kwenzeka ne: “Mbwànyine kwitabila

bakàjì bwà kwenzabo masungulangana. Mu dyela dyà tukàndà, bôbò nebàsungule muntu udi kàyi ùkengediibwa to.” Bintu mwandamutekète byàkafidiibwa, ne bitaanu byà ku byôbì bikaadi byenzèke. Cintu civwa cìlondà civwa mmukàjì munène, èkèleeziyà, bukòlè kampànda anyi cintu kampànda, civwa mwà kwangata États-Unis ewu, bwà kukòdkesha. Pashiishe mèmè kumumòna mwenze bu butù, butangalaja, mwaba wàkafikaye ku ndekeelu. Civwa ncikondo cyà nshùkidilu.

<sup>390</sup> Cyàkamba ne: “Nekwikale màshinyi ikalà mwà kwenda. Kabyàkukengela kwikala ne mwendeshimù to.” Bààfumu ku diàpwàngaja. Kwambacì, bidimu dikumi ne cimwè . . .

<sup>391</sup> Nyumà Mwímpè kungambilaye. S’ki cyôci aci pa dibèji. Kwèna mwà . . . Kacyèna mwà kuvidiibwa to. S’ki cyôci aci pa dibèji, ànu bu mwàkambà Nyumà Mwímpè amu.

<sup>392</sup> Bidimu dikumi ne cimwè kumpàla kwa Cimanu cyà Maginot kwibakiibwaci, Mèmè ne: “Beena Allemagne . . . Àmèrikè neikalè ànu . . . Mfùmù wa ditùnga Roosevelt ki wikalà mucimbàkàne wa ku bònsò.” Nènku ncyà bushùwà. Ki civwàYe.

<sup>393</sup> Ki nkunutapa ku mwoyi nwènù ba-Démocrates to, kàdi ndi—ndi nnwambila. Kì Démocrate anyi Républicain mpindyewu to. N’Yesù Kìlistò, Mwànà wa Nzambi, utùdi twamba ewu. Mèmè ncyèna ní Démocrate anyi Républicain to. Mèmè ndi mwena Kìlistò. Nènku dîbà adi, bôbò, cyònsò cìvwàku aci, kàdi nudi numòna mwaba awu’s.

<sup>394</sup> Kàdi tàngilàayi kuneeku, ditùkù adi, bu nwènù baswè kumòna mùdibu musùmbà wa bavile diitabuuja. Bàngata màshinyi awu ne baàlongolola, bwà ne, musangu wònsò wùdi mufwànyine kwelela Mukalenge Nixon tukàndà awu, uvwa ne cyà kwelela mulumyana mukwabo ewu, ànu musangu ùmwèùmwè awu. Ed- . . . J. Edgar Hoover kupàtulaye màshinyi awu. Mbanganyi bakaadiku bacibale? Mòna’s, cyà bushùwà, byònsò’s mbifundìibwe mu bibejibèji byònsò nkông, nguumu, ne bikwàbò byònsò. Nudi bamòne kutwafiki anyi?

<sup>395</sup> Kakucyèna cikwàbò cintu cyà meeji matòoke to pa kuumusha ànu Kìlistò. Amen. Kaa, Mukàndà mubèneshiibwe wà kale awu! S’ki Cyôci aci’s. Ki Umwèpelè ùdi ukwambila ne wèwè udi nganyi, kùdi mufùmìne, ne kùyaayà (Èyowà’s, mukalenge.), m’Mukàndà mubèneshiibwè wà kale ewu, kaa, aci’s cìdi cimfikisha ku diMunanga. Kàdi nwènù?

Diitabuuja mu Taatù, diitabuuja mu Mwànà,  
Diitabuuja mu Nyumà Mwímpè, basatu aba  
bàdi Umwe;  
Démons neyizakalè, ne bangènzàmpèkààtù  
nebàtabulukè;  
Diitabuuja mu Yèhowàh dìdi dinyukusha cintu  
kanà cyònsò.



<sup>396</sup> Amen. Nditùkù kaayipu dinène didi kumpàla kwètu, balunda bàanyi's! “Dibuulula dyà Yesù Kilistò divwà Nzambi mupèeshe mwanjèlo Wendè, ne mulwè ne mudijaadikile Yone, bwà byàmònaku mwà kumanyikila ku Bikondo byà Èkèleeziyà, cintu cidì mu cibucilu bwètù twètù aci.”

<sup>397</sup> Mukalenge àtùbènèshèku mpindyewu, patùdi tujuukila kuulu apa. Nènku ewu yònsò udi wimba pyano awu, utupeku cyona túng bu wèwè mwà kuswa, *Angata Dîna Dyà Yesù Wendè Naadi*.

<sup>398</sup> Mpindyewu tèelejàayi. Kùdi, kakùyi mpatà to, kùdi beenyi mwaba ewu munkaci mwètù mu tabernacle emu mu dindà emu. Ndi muswè bwà nubàlabulè ku byanza. Nubàbiikileku, nuye naabu mu mènù, ne bikwàbò kàbìdi. Nènku nwàkidileku muntu yònsò bîmpè. Ndi muswè bwà bantu bònsò biikale batwishiiabwe bwà kwenza nàнку.

<sup>399</sup> Nènku nwavùlukaayi ne disangisha neditwàdije pa dîbà mwandamutekète jaajaaja, dilòlò edi. Nènku pa dîbà mwandamutekète ne tusunsa makumi àsàtu, nêngàkulè pa *Cikèèna-kumòna Cyà Mu Patèmò*. Maalaba dilòlò, bu Mukalenge mwà kwanyisha, nêngàkulè pa cikondo cyà kumpàla cyà èkèleeziyà, Efèsò, cyà Cikondo cyà Èkèleeziyà.

<sup>400</sup> Mpindyewu netwimbè *Angata Dîna Dyà Yesù Wendè Naadi*, kaamusambu kètu kakesè kàà mu tabernacle kàà ditangalajangana naaku aku. Nènku muntu ne muntu ìmbè mpindyewu. Eyo.

Angata Dîna dyà Yesù wèndè naadi,  
Wèwè mwànà wa tunyinganyinga ne dikènga;  
Nedìkupè disànkà ne busàmbi,  
Nda naaDi kwònsò kúyaaya.

Dîna dyà mushinga, Éyì dyà bupolè be!  
Ditèkemena dyà buloba ne disànkà dyà Dyulu;  
Dîna dyà mushinga, (Dîna dyà mushinga!) Éyì  
dyà bupolè be!  
Ditèkemena dyà buloba ne disànkà dyà Dyulu.

<sup>401</sup> Mpindyewu kumpàla kwà twètù kwimba cituminyi cidì cilondà, ndi muswè bwà ba-Méthodistes, ba-Baptistes, beena Mpenta, beena Kàtòlikè, ba-Nazaréens, ba Pèlerin de la Sainteté, bwònsò kwòlola ànu cyanza cyanàànà, kulabulangana ku cyanza ne muntu kampànda udi kumpàla kwèbè, ku luseke lwèbè, lwà paanyimà pèèbè apu awu, wamba ne: “Mwena Kilistò mwena lwendu naanyi, mulunda wanyi, ndi ne disànkà dyà kwikalaku neebè kaaba aka mu dindà emu. Ndi ne disànkà dyà kwikalaku neebè mu bwobùmwè, banyùngùlùkile maalù à Nzambi. Ndi mumanye ne tudi bapete cikondo cyà dicyònkomoka. Ndi ntèkemena ne nènnumònè cyàkàbìdi mwab'ewu dilòlò edi.” Cintu cyà mùshindù bu nàнку, panùdi nulabulangana ku cyanza

ne bantu apu, kumpàla kwèbè apu, paanyimà pèèbè apu, ne eku ne eku.

Twinamina Dîna dyà Yesù, (Tumòngane dilòòlò edi, Mwanèètù Neville. Tumòngane dilòòlò edi.)

. . . makàsà,

Mfùmù wa bamfùmù, mu Dyulu, netùMwase  
cifulu cyà butùmbi,  
Pààjika lwendu lwètù.

Kaa, Dîna dyà musinga, Éyì dyà bupolè be!  
Ditèkemena dyà buloba ne disànkà dyà Dyulu;  
Dîna dyà musinga, Éyì dyà bupolè be!  
Ditèkemena dyà buloba ne disànkà dyà Dyulu.

Too ne patwàsangilà! too ne patwàsangilà!

Too ne patwàsangilà ku makàsà à Yesù; (Too ne  
patwàsangilà!)

Too ne patwàsangilà! too ne patwàsangilà!

Nzambi ikalè neenù too ne patwàsangilà  
cyàkàbìdì!

Mpindyewu patùdì twinyika mitù yètù apa:

Too ne patwàsangilà! too ne patwàsangilà! 🐦

60-1204M Dibuulula Dyà Yesù Kilstò  
Branham Tabernacle  
Jeffersonville, Indiana États-Unis

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bìngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)